

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

४३

उत्तरज्झयणं-चउत्थं

मुनि दीपरत्नसागर

Date : / / 2012

Jain Aagam Online Series-43

कमंको	अज्झयणं	सुत्तं	गाहा	अणुककमो	पिडुंको
१	विनयसुयं	-	०१-४८	०१-४८	३
२	परीसहविभत्ती	१	४९-९४	४९-९५	६
३	चाउरंगिज्जं	-	०९५-११४	०९६-११५	९
४	असंखयं	-	११५-१२७	११६-१२८	१०
५	अकाममरणिज्जं	-	१२८-१५९	१२९-१६०	११
६	खुड्डागनियंठिज्जं	-	१६०-१७७	१६१-१७८	१३
७	उरब्भिज्जं	-	१७८-२०७	१७९-२०८	१४
८	काविलीयं	-	२०८-२२७	२०९-२२८	१६
९	नमिपवज्जा	-	२२८-२८९	२२९-२९०	१७
१०	दुमपत्तयं	-	२९०-३२६	२९१-३२७	२१
११	बहुस्सुयपुज्जं	-	३२७-३५८	३२८-३५९	२३
१२	हरिएसिज्जं	-	३५९-४०५	३६०-४०६	२५
१३	चित्तसंभूइज्जं	-	४०६-४४०	४०७-४४१	२८
१४	उसुयारिज्जं	-	४४१-४९३	४४२-४९४	३०
१५	सभिकखुयं	-	४९४-५०९	४९५-५१०	३३
१६	बंधेचरसमाहिठाणं	२-१२	५१०-५२६	५११-५३८	३४
१७	पावसमणिज्जं	-	५२७-५४७	५३९-५५९	३७
१८	संजइज्जं	-	५४८-६००	५६०-६१३	३९
१९	मियापुत्तिज्जं	-	६०१-६९८	६१४-७१२	४२
२०	महानियंठिज्जं	-	६९९-७५८	७१३-७७२	४८
२१	समुद्धपालीयं	-	७५९-७८२	७७३-७९६	५२
२२	रहनेमिज्जं	-	७८३-८३१	७९७-८४६	५२
२३	केसिगोयमिज्जं	-	८३२-९२०	८४७-९३५	५६
२४	पवयणमाया	-	९२१-९४७	९३६-९६२	६१

२५	जण्णइज्जं	-	९४८-९९१	०९६३-१००६	६३
२६	सामायारी	-	०९९२-१०४३	१००७-१०५८	६६
२७	खलुंकिज्जं	-	१०४४-१०६०	१०५९-१०७५	६९
२८	मोक्खमग्गई	-	१०६१-१०९६	१०७६-१११११	७०
२९	सम्मत्तपरक्कमे	१३-८८	१०९७-	१११२-११८८	७२
३०	तवमग्गई	-	१०९८-११३४	११८९-१२२५	७८
३१	चरणविही	-	११३५-११५५	१२२६-१२४६	८१
३२	पमायट्ठाणं	-	११५६-१२६६	१२४७-१३५७	८२
३३	कम्मपयडी	-	१२६७-१२९१	१३५८-१३८२	८९
३४	लेसज्झयणं	-	१२९२-१३५२	१३८३-१४४३	९०
३५	अणगारमग्गई	-	१३५३-१३७३	१४४४-१४६४	९४
३६	जीवाजीवविभत्ती	-	१३७४-१६४०	१४६५-१७३१	९५

४३

उत्तरज्झयणं-चउत्थं मूलसुत्तं

० पढमं अज्झयणं-विनयसुयं ०

- [१] संजोगा विप्पमुक्कस्स , अनगारस्स भिक्खुणो ।
विनयं पाउकरिस्सामि , आनुपुत्विं सुणेह मे ॥
- [२] आणानिद्धेसकरे, गुरुणमुववायकारे ।
इंगियागारसंपन्ने, से विनीए त्ति वुच्चई ॥
- [३] आणाऽनिद्धेसकरे, गुरुणमनुववायकारे ।
पडिनीए असंबुद्धे , अविनीए त्ति वुच्चई ॥
- [४] जहा सुणी पूइक ण्णी, निक्कसिज्जई सव्वसो ।
एवं दुस्सीलपडि नीए, मुहरी निक्कसिज्जइ ॥
- [५] कणकुंऽगं चइत्ताणं , विट्ठं भुंजइ सूयरो ।
एवं सीलं चइत्ताणं , दुस्सीले रमई मिए ॥
- [६] सुणियाऽभावं साणस्स , सुयरस्स नरस्स य ।
विनए ठवेज्ज अप्पाणं इ च्छंतो हियमप्पणो ॥
- [७] तम्हा वि नयमेसिज्जा, सीलं पडिलभेज्जओ ।
बुद्धपुत्त नियाग ड्डी, न निक्कसिज्जइ कण्हुई ॥
- [८] निसंते सिया अ मुहरी, बुद्धाणं अं तिए सया ।
अट्टजुत्ताणि सिक्खिज्जा , निरट्ठाणि उ वज्जए ॥
- [९] अनुसासिओ न कुप्पिज्जा , खंतिं सेविज्ज पं डिए ।
खुड्ढेहिं सह संसग्गिं , हासं कीडं च वज्जए ॥
- [१०] मा य चं डालियं कासी , बहुयं मा य आलवे ।
कालेणं य अहिज्जित्ता , तओ झाइज्ज एगओ ॥
- [११] आहच्च चं डालियं कुट्टु , न निण्ह इज्ज कयाइ वि ।
कडं कडे त्ति भासेज्जा , अकडं नो कडे त्ति य ॥
- [१२] मा गलियस्सेव कसं , वयणमिच्छे पुणो पुणो ।
कसं व दट्टुमाइण्णे , पावगं परिवज्जए ॥
- [१३] अनासवा थूलवया कुसीला , मिउंपि चं डं पकरें ति सीसा ।
चित्ताणुया हु दक्खोववेया , पसायए ते हु दुरासयंपि ॥

- [१४] नापुट्टो वागरे किंचि , पुट्टो वा नालियं वए ।
कोहं असच्चं कुवेज्जा , धारेज्जा पियमप्पियं ॥
- [१५] अप्पा चेव दमेयव्वो , अप्पा हु खलु दुद्धमो ।

अज्झयणं-१

- [१६] अप्पा दं तो सुही होइ , अस्सिं लोए प रत्थ य ॥
वरं मे अप्पा दं तो, संजमेण तवेण य ।
माऽहं परेहि दम्मंतो , बंधणेहिं वहेहि य ॥
- [१७] पडिनीयं च बुद्धाणं , वाया अदुव कम्मणा ।
आवी वा जइवा रहस्से , नेव कुज्जा कयाइवि ॥
- [१८] न पक्खओ न पुरओ , नेव किच्चाण पिट्ठओ ।
न जुंजे ऊरुणा ऊरुं , सयणे नो पडिस्सुणे ॥
- [१९] नेव पल्हत्थियं कुज्जा , पक्खपिंडं च संजए ।
पाए पसारिए वाऽवि , न चिट्ठे गुरुणं तिए ॥
- [२०] आयरिएहिं वाहित्तो , तुसिणीओ न कयाइ वि ।
पसायट्ठी नियाग ट्ठी, उवचिट्ठे गुरुं सया ॥
- [२१] आलवंते लवं ते वा , न निसीएज्ज कयाइ वि ।
चइऊणं आ सनं धीरो , जओ जुत्तं पडिस्सुणे ॥
- [२२] आसनगओ न पुच्छेज्जा , नेव सेज्जागओ कयाइ वी ।
आगम्मुककडुओ सं तो, पुच्छिज्जा पंजलीउडो ॥
- [२३] एवं वि नयजुत्तस्स, सुत्तं अत्थं च तदुभयं ।
पुच्छमाणस्स सीसस्स , वागरिज्ज जहासुयं ॥
- [२४] मुसं परिहरे भिक्खू , न य ओहारिणिं वए ।
भासादोसं परिहरे , मायं च वज्जए सया ॥
- [२५] न लवेज्ज पुट्टो सावज्जं , न निरट्ठं न मम्मयं ।
अप्पणट्ठा परट्ठा वा , उभयस्संतरेण वा ॥
- [२६] समरेसु अगारेसुं , गिहसंधीसु य महापहे सु ।
एगो एगत्थिए सद्धिं , नेव चिट्ठे न संलवे ॥
- [२७] जं मे बुद्धाणुसासं ति, सीएण फरुसेण वा ।
मम लाभो त्ति पेहाए , पयओ य तं पडिस्सुणे ॥
- [२८] अनुसासनमोवायं, दुक्कडस्स य चोयणं ।
हियं तं म न्नेए पण्णो , वेसं होइ असाहुणो ॥
- [२९] हियं विगयभया बुद्धा , फरुसंपि अ नुसासणं ।
वेसं तं होइ मूढाणं , खंतिसोहिकरं पयं ॥
- [३०] आसने उवचि ट्ठेज्जा, अणुच्चे अकुए थिरे ।
अप्पुट्ठाई निरु ट्ठाई, निसीएज्जऽप्पकुक्कुए ॥

- [३१] कालेण निक्खमे भिक्खू , कालेण य पडिक्कमे ।
कालं च विवज्जिता , काले कालं समायरे ॥
- [३२] परिवाडीए न चि ड्वेज्जा, भिक्खू दत्तेसणं चरे ।

अज्झयणं-१

- पडिरूवेण एसित्ता , मियं कालेण भक्खए ॥
- [३३] नाइदूरमणासन्ने, नन्नेसिं चक्खुफासओ ।
एगो चि ड्वेज्ज भत्त डा, लंघित्ता तं नइक्कमे ॥
- [३४] नाइउच्चे व नीए वा , नासन्ने नाइदूरओ ।
फासुयं परकडं पिं डं, पडिगाहेज्ज संजए ॥
- [३५] अप्पपाणेऽप्पबीयंमि, पडिच्छन्नंमि संवुडे ।
समयं संजए भुंजे , जयं अपरिसाडियं ॥
- [३६] सुकडित्ति सुपक्कित्ति , सुच्छिन्ने सुहडे मडे ।
सुनिट्ठिए सुल द्दित्ति, सावज्जं वज्जए मु नी ॥
- [३७] रमए पं डए सासं , हयं भद्वं व वाहए ।
बालं सं मइ सासंतो , गलियस्सं व वाहए ॥
- [३८] खड्डुया मे चवेडा मे , अक्कोसा य वहा य मे ।
कल्लाणमनुसासंतो, पावदिट्ठित्ति मन्नई ॥
- [३९] पुत्तो मे भाय नाइ त्ति , साहू कल्लाण मन्नई ।
पावदिट्ठि उ अप्पाणं , सासं दासे त्ति मन्नई ॥
- [४०] न कोवए आयरियं , अप्पाणंपि न कोवए ।
बुद्धोवघाई न सिया , न सिया तोत्तगवेसए ॥
- [४१] आयरियं कुवियं नच्चा , पत्तिएण पसायए ।
विज्झवेज्ज पंजलीउडो , वएज्ज न पु णोत्तिय ॥
- [४२] धम्मज्जियं च ववहारं , बुद्धेहायरियं सया ।
तमायरंतो ववहारं , गरहं नाभिगच्छई ॥
- [४३] मनोगयं वक्कगयं , जाणित्तायरियस्स उ ।
तं परिगिज्झ वायाए , कम्मुणा उववायए ॥
- [४४] वित्ते अचोइए निच्चं , खिप्पं हवइ सुचोइए ।
जहोवइडुं सुकयं , किच्चाइं कुव्वई सया ॥
- [४५] नच्चा नमइ मेहावी , लोए कित्ती से जायए ।
हवई किच्चाणं सरणं , भूयाणं जगई जहा ॥
- [४६] पुज्जा जस्स पसीयं ति, संबुद्धा पुव्वसंथुया ।
पसन्ना लाभइस्संति , विउलं अट्ठियं सुयं ॥
- [४७] स पुज्जसत्थे सुवि नीयसंसए, मनोरुई चिड्डइ कम्मसंपया ।
तवोसमायारिसमाहिसंवुडे, महज्जुई पंच वयाइं पालिया ॥

[४८] स देवगंधव्वम नुस्सपुइए, चइत्तु देहं मलपंकपुव्वयं।
सिद्धे वा हवइ सासए देवे आ अप्परए महि इट्ठिए ॥ त्ति
बेमि

• पढमं अज्झयणं सम्मत्तं •

अज्झयणं-२

• बीयं अज्झयणं - परीसहविभत्ती •

[४९] सुयं मे आउसं तेणं भगवया एवमक्खायं। इह खलु बावीसं परीसहा समणेणं
भगवया महावीरेणं कासवेणं पवेइया। जे भिक्खू सोच्चा नच्चा जिच्चा अभिभूय भिक्खायरियाए
परिव्वयंतो पुट्ठो नो विनिहन्नेज्जा। कयरे खलु ते बावीसं परिसहा समणेणं भगवया महावीरेणं कासवेणं
पवेइया, जे भिक्खू सोच्चा नच्चा जिच्चा अभिभूयभिक्खायरियाए परिव्वयं तो पुट्ठो नो विनिहन्नेज्जा ?
इमे खलु ते बावीसं परिसहा समणेणं भगवया महावीरेणं कासवेणं पवेइया , जे भिक्खू
सोच्चा नच्चा जिच्चा अभिभूय भिक्खायरियाए परिव्वयंतो पुट्ठो नो विनिहन्नेज्जा ; तं जहा -दिगिंछा-
परीसहे, पिवासापरीसहे, सीयपरीसहे, उसिणपरीसहे, दंसमसगपरीसहे, अचेलपरीसहे, अरइपरीसहे, इत्थी-
परीसहे, चरियापरीसहे, निसीहियापरीसहे, सेज्जापरीसहे, अक्कोसपरीसहे, वहपरीसहे, जायणापरीसहे,
अलाभपरीसहे, रोगपरीसहे, तणफासपरीसहे, जल्लपरीसहे, सक्कारपुरक्कारपरीसहे, पण्णापरीसहे, अन्नाण-
परीसहे, दंसणपरीसहे ॥

- [५०] परीसहाणं पविभत्ती , कासवेणं पवेइया ।
तं भे उदाहरिस्सामि , आनुपुत्विं सुणेह मे ॥
- [५१] दिगिंछापरिगए देहे , तवस्सी भिक्खू थामवं ।
न छिंदे न छिंदावए न पए न पयावए ॥
- [५२] कालीपव्वंगसंकासे, किसे धम निसंतए ।
मायन्नो अस नपानस्स, अदीनमनसो चरे ॥
- [५३] तओ पुट्ठो पिवासाए , दोगुंच्छी ल द्दसंजए ।
सीओदगं न सेविज्जा , वियडस्सेसणं चरे ॥
- [५४] छिन्नावाएसु पंथेसु , आउरे सुपिवासिए ।
परिसुक्कमुहेऽदीने, तं तितिकखे परीसहं ॥
- [५५] चरंतं विरयं लूहं , सीयं फुसइ एगया ।
नाइवेलं मु नी गच्छे , सोच्चाणं जि नसासनं ॥
- [५६] न मे निवारणं अत्थि छवित्ताणं न विज्जई ।
अ हं तु अग्गिं सेवामि , इइ भिक्खू न चिंतए ॥
- [५७] उसिणं परियावेणं , परिदाहेण तज्जिए ।
घिसु वा परियावेणं , सायं नो परिदेवए ॥
- [५८] उण्हाहितत्ते मेहावी , सिणाणं नो वि पत्थए ।
गायं नो परिसिंचेज्जा , न वीएज्जा य अप्पयं ॥
- [५९] पुट्ठो य दंसमसएहिं , समरे व महामु नी ।

नागो संगामसीसे वा , सूरु अभि भवे परं ॥
 [६०] न संतसे न वारेज्जा , मनं पि न पओसए ।
 उवेहे न हणे पाणे , भुंजंते मंससोणियं ॥
 [६१] परिजुण्णेहिं वत्थेहिं , होक्खामि त्ति अचेलए ।

अज्झयणं-२

अदुवा सचे लए हो क्खं, इइ भिक्खू न चिंतए ॥
 [६२] एगयाऽचेलए होइ , सचेले यावि एगया ।
 एयं धम्महियं नच्चा , नाणी नो परिदेवए ॥
 [६३] गामाणुगामं रीयं तं, अनगारं अकिंच नं ।
 अरई अ नुप्पवेसेज्जा, तं तित्तिक्खे परीसहं ॥
 [६४] अरइं पिट्ठओ किच्चा , विरए आयरक्खिए ।
 धम्मारामे निरारं भे, उवसंते मु नी चरे ॥
 [६५] संगो एस मणूसाणं , जाओ लोगं मि इत्थिओ ।
 जस्स एया परिन्नाय , सुकडं तस्स सामण्णं ॥
 [६६] एवमादाय मेहावी , पंकभूया उ इत्थिओ ।
 नो ताहिं वि निहन्नेज्जा, चरेज्जत्तगवेसए ॥
 [६७] एग एव चरे लाढे , अभिभूय परीसहे ।
 गामे वा नगरे वाऽवि , निगमे वा रायहाणिए ॥
 [६८] असमाणे चरे भिक्खू , नेव कुज्जा परिग्गहं ।
 असंसत्ते गिहत्थेहिं , अनिएओ परिच्चए ॥
 [६९] सुसाणे सुन्नगारे वा , रुक्खमूले य एगओ ।
 अकुक्कुओ निसीएज्जा , न य वित्तासए परं ॥
 [७०] तत्थ से चिट्ठमाणस्स , उवसग्गेऽभिधारए ।
 संकामीओ न गच्छेज्जा , उट्ठित्ता अन्नमास नं ॥
 [७१] उच्चावयाहिं सेज्जाहिं , तवस्सी भिक्खू थामवं ।
 नाइवेलं विहन्निज्जा , पावदिट्ठी विहन्नई ॥
 [७२] पइरिक्कुवस्सयं लद्धं , कल्लाणं अ दुव पावयं ।
 किमेगराइं करिस्सइ ? , एवं तत्थऽहियासए ॥
 [७३] अक्कोसेज्जा परो भिक्खुं , न तेसिं पडिसंजले ।
 सरिसो होइ बालाण , तम्हा भिक्खू न संजले ॥
 [७४] सोच्चाणं फसुसा भासा , दारुणा गामकं टगा ।
 तुसिणीओ उवेहेज्जा , न ताओ म नसीकरे ॥
 [७५] हओ न संजले भिक्खू , मनंपि न पओसए ।
 तित्तिक्खं परमं नच्चा , भिक्खू धम्मं समायरे ॥
 [७६] समणं संजयं दंतं , हणिज्जा कोऽ वि कत्थ वि ।

नत्थि जीवस्स नासुत्ति , एवं पेहेज्ज संजए ॥

[७७] दुक्करं खलु भो ! निच्चं , अनगारस्स भिक्खुणो ।
सव्वं से जाइयं होइ , नत्थि किंचि अजाइयं ॥

[७८] गोयरग्गपविट्ठस्स, हत्थे नो सुप्पसारए ।

अज्झयणं-२

सेओ अगारवासुत्ति , इइ भिक्खु न चिंतए ॥

[७९] परेसु घासमेसेज्जा , भोयणे परि निट्ठिए ।
लद्धे पिण्डे अलद्धे वा , नाणुत्तप्पेज्ज पंडिए ॥

[८०] अज्जेवाहं न लब्भामि , अवि लाभो सुए सिया ।
जो एवं पडिसंचिकखे , अलाभो तं न तज्जए ॥

[८१] नच्चा उप्पइयं दुक्खं , वेयणाए दुहट्ठिए ।
अदीनो ठावए पन्नं, पुट्ठो तत्थहियासए ॥

[८२] तेगिच्छं नाभिन्देज्जा , संचिकखस्सत्तगवेसए ।
एवं खु तस्स सामण्णं , जं न कुज्जा न कारवे ॥

[८३] अचेलगस्स लूहस्स , संजयस्स तविस्सणो ।
तणेसु सुयमाणस्स , हुज्जा गायविराहणा ॥

[८४] आयवस्स निवाएणं , अउला हवइ वेयणा ।
एवं नच्चा न सेवंति , तंतुजं तणतज्जिया ॥

[८५] किलिन्नगाए मेहावी , पंकेण व रएण वा ।
घिंसु वा परियावेणं , सायं नो परिदेवए ॥

[८६] वेएज्ज निज्जरापेही , आरियं धम्मं ऽनुत्तरं ।
जाव सरीरभेउत्ति , जल्लं काएण धारए ॥

[८७] अभिवायणं अ भ्भुट्ठाणं, सामी कुज्जा निमंतणं ।
जे ताइं पडिसेवं ति, न तेसिं पीहए मु नी ॥

[८८] अणुक्कसाई अप्पिच्छे , अन्नाएसी अलोलुए ।
रसेसु ना नुगिज्जेज्जा, नानुत्तप्पेज्ज पन्नवं ॥

[८९] से नू नं मए पुव्वं , कम्माऽनाणफला कडा ।
जेणाहं नाभिजाणामि , पुट्ठो केणइ कण्हई ॥

[९०] अह पच्छा उइज्जं ति, कम्माऽनाणफला कडा ।
एवमस्सासि अप्पाणं , नच्चा कम्मविवागयं ॥

[९१] निरट्ठगंमि विरओ , मेहुणाओ सुसंवुडो ।
जो सक्खं नाभिजाणामि , धम्मं कल्ला ण पावगं ॥

[९२] तवोवहाणमादाय, पडिमं पडिवज्जओ ।
एवं पि विहरओ मे , छउमं न निय वृई ॥

[९३] नत्थि नू नं परे लोए, इइढी वाऽवी तवस्सिणो ।

- अदुवा वंचिओ मित्ति, इइ भिक्खू न चिंतए ॥
 [९४] अभू जिणा अत्थि जिणा , अदुवाऽवि भविस्सई ।
 मुसं ते एवमाहंसु , इइ भिक्खू न चिंतए ॥
 [९५] एए परीसहा सव्वे , कासवेण पवेइया ।

अज्झयणं-२

जे भिक्खू न विहम्मज्जा , पुट्ठो केणइ कण्हई ॥ त्ति बेमि
 • बीअं अज्झयणं समत्तं •

• तइयं अज्झयणं-चाउरंगिज्जं •

- [९६] चत्तारि परमंगाणि दुल्लहाणिह जं तुणो ।
 माणुसत्तं सुई सद्धा , संजमंमि य वीरीयं ॥
 [९७] समावन्नाण संसारे , नाणागोत्तासु जाइसु ।
 कम्मा ना नाविहा कट्ठु , पुट्ठो विस्संभया पया ॥
 [९८] एगया देवलोएसु , नरएसु वि एगया ।
 ए गया आसुरं कायं , अहाकम्महिं गच्छई ॥
 [९९] एगया खत्तिओ हो इ, तओ चं डालबुक्कसो ।
 तओ कीडपयंगो य , तओ कुं थुपिपीलिया ॥
 [१००] एवमावट्टजोणीसु, पाणिणो कम्मकिच्चिसा ।
 न निविज्जं ति संसारे , सव्वट्टेसु व खत्तिया ॥
 [१०१] कम्मसंगेहिं सं मूढा, दुक्खिया बहुवेयणा ।
 अमाणुसासु जोणीसु , विनिहम्मंति पाणिणो ॥
 [१०२] कम्माणं तु पहाणाए , आनुपुव्वी कयाइ उ ।
 जीवा सोहिम नुप्पत्ता, आययंति मणुस्सयं ॥
 [१०३] मानुस्सं विग्गहं लद्धं , सुई धम्मस्स दुल्लहा ।
 जं सोच्चा पडिवज्जं ति, तवं खंतिमहिंसयं ॥
 [१०४] आहच्च सवणं लद्धं , सद्धा परमदुल्लहा ।
 सोच्चा नेआउयं मग्गं , बहवे परिभस्सई ॥
 [१०५] सुइं च लद्धं सद्धं च , वीरियं पुण दुल्लहं ।
 बहवे रोयमाणावि , नो य णं पडिवज्जए ॥
 [१०६] मानुसत्तंमि आयाओ , जो धम्मं सोच्चा सद्धहे ।
 तवस्सी वीरीयं लद्धं , संवुडे निद्धुणे रयं ॥
 [१०७] सोही उज्जुयभूयस्स , धम्मो सुद्धस्स चिद्धई ।
 निव्वाणं परमं जाइ , घयसित्तिव्व पावए ॥
 [१०८] विगिंच कम्मणो हेउं , जसं संचिणु खंतिए ।
 सरीरं पाढवं हिच्चा , उइढं पक्कमई दिसं ॥

- [१०९] विसालिसेहिं सीलेहिं , जक्खा उत्तरउत्तरा ।
महासुक्का व दिप्पंता , मन्नंता अपुणोच्च यं ॥
- [११०] अप्पिया देवकामाणं , कामरुव विउत्विणो ।
उड्ढं कप्पेसु चि ङ्गति, पुच्चा वाससया बहू ॥

अज्झयणं-३

- [१११] तत्थ ठिच्चा जहाठाणं , जक्खा आउक्खए चुया ।
उवेत्ति मा नुसं जोणिं , से दसंगेऽभिजायई ॥
- [११२] खेत्तं वत्थुं हिरण्णं च , पसवो दासपोरुसं ।
चत्तारि कामखं धाणि, तत्थ से उववज्जई ॥
- [११३] मित्तवं नायवं होइ , उच्चागोए य वण्णवं ।
अप्पायंके महापन्ने , अभिजाए जसोबले ॥
- [११४] भोच्चा माणुस्सए भोए , अप्पडिरुवे अहाउयं ।
पुत्विं विसुद्धसद्धम्मे , केवलं बोहि बुज्झिया ॥
- [११५] चउरंगं दुल्लहं नच्चा , संजमं पडिवज्जिया ।
तवसा धुयकम्मंसे , सिद्धे हवइ सासए ॥ त्ति बेमि

• तइयं अज्झयणं सम्मत्तं •

• चउत्थं अज्झयणं असंखयं •

- [११६] असंखयं जीवियं मा पमायए , जरोवणीयस्स हु नत्थि ताणं ।
एवं वियाणाहि जणे पमत्ते , किण्णु विहिंसा अजया गहिंति ॥
- [११७] जे पावकम्महेहिं घनं म नूस्सा, समाययंती अमइं गहाय ।
पहाय ते पासपयट्टिए नरे , वेरानुबद्धा नरयं उवेत्ति ॥
- [११८] तेणे जहा संधिमुहे गहीए , सकम्मुणा किच्चइ पावकारी ।
ए वं पया पेच्च इहं च लोए, कडाण कम्माण न मोक्खो अत्थि ॥
- [११९] संसारमावन्न परस्स अट्ठा , साहारणं जं च करेइ कम्मं ।
कम्मस्स ते तस्स उ वेयकाले , न बंधवा बंधवयं उवेत्ति ॥
- [१२०] वित्तेण ताणं न लभे पमत्ते , इमंमि लोए अदुवा परत्था ।
दीवप्पणट्ठे व अ नंतमोहे, नेयाउयं दडुमदडुमेव ॥
- [१२१] सुत्तेसु यावी पडिबुद्धजीवी , नो वीससे पं डिए आसुपन्ने ।
घोरा मुहुत्ता अबलं सरीरं , भारंडपखीव चरेऽपमत्तो ॥
- [१२२] चरे पयाइं परिसंकमाणो , जं किंचि पासं इह म न्नमाणो ।
लाभंतरे जीवियं बूहइता , पच्छा परिन्नायमलावधंसी ॥
- [१२३] छंदं निरोहेण उवेइ मोक्खं , आसे जहा सिक्खियवम्मधारी ।
पुच्चाइं वासाइं चरेऽप्पमत्तो , तम्हा मुनी खिप्पमुवेइ मोक्खं ॥
- [१२४] स पुच्चमेवं न लभेज्ज पच्छा , एसोवमा सासयवाइयाणं ।

- विसीयई सिढिले आउयम्मि , कालोवणीए सरीरस्स भए ॥
 [१२५] खिप्पं न सक्केइ विवेगमेउं , तम्हा समुद्वाय पहाय कामे ।
 समिच्च लोयं समया महेसी , आयाणरक्खी व चरेऽप्पमत्तो ॥
 [१२६] मुहुं मुहुं मोहगुणे जयं तं, अनेगरूवा समणं चरं तं ।

अज्झयणं-४

- फासा फुसंति असमंजसं च , न तेसिं भिक्खू म नसा पउस्से ॥
 [१२७] मंदा य फासा बहुलोहणिज्जा , तहप्पगारेसु म नं न कुज्जा ।
 रक्खिज्ज कोहं विणएज्ज माणं, मायं न सेवेज्ज पहेज्ज लोहं ॥
 [१२८] जे संख्या तुच्छपरप्पवाई , ते पिज्जदोसा नुगया परज्झा ।
 एए अहम्मे त्ति दुगुंछमाणो , कंखे गुणे जाव सरीरभेउ ॥ त्ति
 बेमि

• चउत्थं अज्झयणं सम्मत्तं •

• पंचमं अज्झयणं-अकाममरणिज्जं •

- [१२९] अन्नवंसि महोघंसि , एगे तिण्णे दुरुत्तरे ।
 तत्थ एगे महापन्ने , इमं पण्हमुदाहरे ॥
 [१३०] संतिमे य दुवे ठाणा , अक्खाया मारणं तिया ।
 अ काममरणं चेव , सकाममरणं तहा ॥
 [१३१] बालाणं अकामं तु , मरणं असइं भवे ।
 पंडियाणं सकामं तु , उक्कोसेण सइं भवे ॥
 [१३२] तत्थिमं पढमं ठाणं , महावीरेण देसियं ।
 कामगिद्धे जहा बाले , भिसं कूराइं कुव्वई ॥
 [१३३] जे गिद्धे कामभोगेसु , एगे कूडाय गच्छई ।
 न मे दि ढे परे लोए , चक्खुदिट्ठा इमा रई ॥
 [१३४] हत्थागया इमे कामा , कालिया जे अ नागया ।
 को जाणइ परे लोए , अत्थि वा नत्थि वा पुणो ? ॥
 [१३५] जनेन सद्धिं होक्खामि , इइ बाले पगब्भई ।
 कामभोगानुराएणं, केसं संपडिवज्जई ॥
 [१३६] तओ से दं डं समारभई , तसेसु थावरेसु य ।
 अट्ठाए य अण ट्ठाए, भूयगामं विहिंसई ॥
 [१३७] हिंसे बाले मुसावाई , माइल्ले पिसुणे सढे ।
 भुंजमाणे सुरं मंसं , सेयमेयं ति मन्नई ॥
 [१३८] कायसा वयसा मत्ते , वित्ते गिद्धे य इत्थिसु ।
 दुहओ मलं संचिणइ , सिसुनागु व्व मट्ठियं ॥
 [१३९] तओ पुट्ठो आयंकेणं , गिलाणो परितप्पई ।

- पभीओ परलोगस्स , कम्माणुप्पेहि अप्पणो ॥
 [१४०] सुया मे नरए ठाणा , असीलाणं च जा गई ।
 बालाणं कूरकम्माणं , पगाढा जत्थ वेयणा ॥
 [१४१] तत्थोववाइयं ठाणं , जहा मेयम नुस्सुयं ।
 अहाकम्ममेहिं गच्छं तो, सो पच्छा परितप्पई ॥

अज्झयणं-५

- [१४२] जहा सागडिओ जाणं , समं हिच्चा महापहं ।
 विसमं मग्गमोइण्णो , अक्खे भग्गं मि सोयई ॥
 [१४३] एवं धम्मं विउक्कम्मं , अहम्मं पडिवज्जिया ।
 बाले मच्चुमुहं पत्ते , अक्खे भग्गे व सोयई ॥
 [१४४] तओ से मरणं तंमि, बाले संतसई भया ।
 अ काम मरणं मरई , धुत्ते व कलिणा जिए ॥
 [१४५] एयं अकाममरणं , बालाणं तु पवेइयं ।
 एत्तो सकाममरणं , पंडियाणं सुणेह मे ॥
 [१४६] मरणं पि सपुण्णाणं , जहा मेयम नुस्सुयं ।
 विप्पसण्णमनाघायं, संजयाण वुसीमओ ॥
 [१४७] न इमं सव्वेसु भिक्खूसु , न इमं सव्वेसु गारिसु ।
 नानासीला गारत्था , विसमसीला य भिक्खुणो ॥
 [१४८] संति एगेहिं भिक्खूहिं , गारत्था संजमुत्तरा ।
 गारत्थेहि य सव्वेहिं , साहवो संजमुत्तरा ॥
 [१४९] चीराजिणं नगिणिणं , जडी संघाडि मुंडिणं ।
 एयाइं वि न तायं ति, दुस्सीलं परियागयं ॥
 [१५०] पिंडोलए व्व दुस्सीले , नरगाओ न मुच्चई ।
 भिक्खाए वा गिहत्थे वा , सुव्वए कम्मई दिवं ॥
 [१५१] अगारिसामाइयंगाइं, सद्धी काएण फासए ।
 पोसहं दुहओ पक्खं , एगरायं न हावए ॥
 [१५२] एवं सिक्खासमावन्ने , गिहिवासे वि सुव्वए ।
 मुच्चई छविपव्वाओ , गच्छे जक्खसलोगयं ॥
 [१५३] अह जे संवुडे भिक्खू , दोणहं अन्नयरे सिया ।
 सव्व दुक्खपहीणे वा , देवे वाऽवि महिइडिए ॥
 [१५४] उत्तराइं विमोहाइं , जुईमंताणुपुव्वसो ।
 समाइण्णाइं जक्खेहिं , आवासाइं जसंसिणो ॥
 [१५५] दीहाउया इ इडिमंता, समिद्धा कामरुविणो ।
 अ हुणोववन्नसंकासा, भुज्जो अच्चिमालिप्पभा ॥
 [१५६] ताणि ठाणाणिं गच्छं ति, सिक्खित्ता संजमं तवं ।

- भिक्षाए वा गिहित्थे वा , जे सं ति परिनिव्वुडा ॥
 [१५७] तेषिं सोच्चा सपुज्जाणं , संजयाण वुसीमओ ।
 न संतसंति मरणंते , सीलवंता बहुस्सुया ॥
 [१५८] तुलिया विसेसमादाय , दयाधम्मस्स खं तिए ।
 विप्पसीएज्ज मेहावी , तहाभूएण अप्पणा ॥

अज्झयणं-५

- [१५९] तओ काले अभिप्पेए , सद्धी तालिसमं तिए ।
 विणएज्ज लोमहरिसं , भेयं देहस्स कंखए ॥
 [१६०] अह कालं मि संपत्ते , आघायाय समुस्सयं ।
 सकाममरणं मरई , तिण्हमन्नयरं मु नी ॥ त्तिबेमि
 • पंचमं अज्झयणं समत्तं •

• छट्ठं अज्झयणं - खुड्डागनियंठिज्जं •

- [१६१] जावंतऽविज्जा पुरिसा, सव्वे ते दुक्खसंभवा ।
 लुप्पंति बहुसो मूढा , संसारंमि अ नंतए ॥
 [१६२] समिक्ख पं डिए तम्हा , पास जाईपहे बहू ।
 अप्पणा सच्चमेसेज्जा , मेतिं भूएसु कप्पए ॥
 [१६३] माया पिया ण्हुसा भाया , भज्जा पुत्ता य ओरसा ।
 नालं ते मम ताणाए , लुप्पंतस्स सकम्मुणा ॥
 [१६४] एयमद्धं सपेहाए , पासे समियदंसणे ।
 चिंधं गेहिं सिणेहं च , न कंखे पुव्वसंथुयं ॥
 [१६५] गवासं मणिकुं डलं, पसवो दासपोरुसं ।
 सव्वमेयं चइत्ताणं , कामरूवी भविस्ससि ॥
 [१६६] थावरं जंगमं चेव , धणं धन्नं उवक्खरं ।
 पच्चमाणस्स कम्ममेहिं , नालं दुक्खाओ मोअणे ॥
 [१६७] अज्झत्थं सव्वओ सव्वं , दिस्स पाणे पिया उए ।
 न हणे पाणिणो पाणे , भयवेराओ उवरए ॥
 [१६८] आयाणं नरयं दिस्स , नायएज्ज तणामवि ।
 दोगुंछी अप्पणो पाए , दिन्नं भुंजेज्ज भोयणं ॥
 [१६९] इहमेगे उ मन्नं ति, अप्पच्चक्खाय पावगं ।
 आयरियं विदित्ताणं , सव्वदुक्खा विमुच्चई ॥
 [१७०] भणंता अकरें ता य बं , धमोक्खपइण्णिणो ।
 वायाविरियमेत्तेण, समासासेंति अप्पयं ॥
 [१७१] न चित्ता तायए भासा , कुओ विज्जा नुसासनं ? ।
 विसन्ना पावकम्ममेहिं , बाला पंडियमाणिणो ॥

- [१७२] जे केई सरीरे सत्ता , वण्णे रुवे य सव्वसो ।
मनसा कायवक्केणं , सव्वे ते दुक्खसं भवा ॥
- [१७३] आवन्ना दीहमद्धानं , संसारंमि अ नंतए ।
तम्हा सव्वदिसं पस्सं , अप्पमत्तो परिव्वए ॥
- [१७४] बहिया उ इढमादाय, नावकंखे कयाइ वि ।

अज्झयणं-६

- पुव्वकम्मकखयद्वाए, इमं देहं उदाहरे ॥
- [१७५] विविच्च कम्मणो हेउं , कालकंखी परिव्वए ।
मायं पिंडस्स पाणस्स , कडं लद्धूण भक्खए ॥
- [१७६] सन्निहिं च न कुव्वेज्जा , लेवमायाए संजए ।
पक्खी पत्तं समादाय , निरवेक्खो परिव्वए ॥
- [१७७] एसणासमिओ लज्ज , गामे अ नियओ चरे ।
अप्पमत्तो पमत्तेहिं , पिंडवायं गवेसए ॥
- [१७८] एवं से उदाहु अ नुत्तरनाणी, अनुत्तरदंसी अणुत्तरनाण ।
दंसणधरे अरहा नायपुत्ते , भगवं वेसालिए वियाहिए ॥ त्ति बेमि

• छड्डं अज्झयणं सम्मत्तं •

• सत्तमं अज्झयणं-उरब्भिज्जं •

- [१७९] जहास्सएसं समुद्धिस्स , कोइ पोसेज्ज एलयं ।
ओयणं जवसं देज्जा , पोसेज्जावि सयं गणे ॥
- [१८०] तओ से पुढे परिवूढे , जायमेए मुहोदरे ।
पीणिए विउले देहे , आएसं परिकंखए ॥
- [१८१] जाव न एइ आएसे , ताव जीवइ सेऽदुही ।
अह पत्तं मि आएसे , सीसं छेत्तूण भुज्जई ॥
- [१८२] जहा से खलु उरब्भे , आएसाए समीहिए ।
एवं बाले अहं मिढ्ढे, ईहति नरयाउयं ॥
- [१८३] हिंसे बाले मुसावाई , अद्धानंमि विलोवए ।
अन्नदत्तहरे तेणे , माइ कं नु हरे सढे ।
- [१८४] इत्थीविसयगिद्धे य , महारंभपरिग्गहे ।
भुंजमाणे सुरं मंसं , परिवूढे परंदमे ॥
- [१८५] अयकक्करभोइ य , तुंडिल्ले चियलोहिए ।
आउयं नरए कंखे , जहाएसं व एलए ॥
- [१८६] आसनं सय नं जाणं , वित्तं कामे य भुंजिया ।
दुस्साहडं धणं हिच्चा , बहु संचिणिया रयं ॥
- [१८७] तओ कम्मगुरु जंतू , पच्चुप्पन्नपरायणे ।
अएव्व आगयास्से , मरणंतंमि सोयई ॥

- [१८८] तओ आउपरिक्खीणे , चुया देहा विहिंसगा ।
आसुरीयं दिसं बाला , गच्छंति अवसा तमं ॥
- [१८९] जहा कागिणिए हेउं , सहस्सं हारए नरो ।
अपत्थं अं बगं भोच्चा , राया रज्जं तु हारए ॥
- [१९०] एवं मा नुस्सगा कामा , देवकामाण अं तिए ।

अज्झयणं-७

- सहस्सगुणिया भुज्जो , आउं कामा य दिव्विया ॥
- [१९१] अनेग वासा नउया, जा सा पन्नवओ ठिई ।
जाणि जीयं ति दुम्मेहा , ऊणे वाससयाउए ॥
- [१९२] जहा य तिन्नि वणिया , मूलं घेत्तूण निग्गया ।
एगो ऽत्थ लहई लाभं , एगो मूलेण आगओ ॥
- [१९३] एगो मूलं पि हारित्ता, आगओ तत्थ वाणिओ ।
ववहारे उव मा एसा , एवं धम्मे वियाणह ॥
- [१९४] मानुसत्तं भवे मूलं , लाभो देवगई भवे ।
मूलच्छेएण जीवाण , नरगतिरिक्खत्तणं धुवं ॥
- [१९५] दुहओ गई बालस्स , आवई वहमूलिया ।
देवत्तं मा नुसत्तं च , जं जिए लोलुयासढे ॥
- [१९६] तओ जिए सइं होइ , दुविहिं दोग्गइं गए ।
दुल्लहा तस्स उम्मग्गा , अद्दाए सुचिरादवि ॥
- [१९७] एवं जियं सपेहाए , तुलिया बालं च पं डियं ।
मूलियं ते पव संति, मानुसं जोणिमिं ति जे ॥
- [१९८] वेमायाहिं सिक्खाहिं , जे नरा गिहिसुव्वया ।
उवैति मा नुसं जोणिं , कम्मसच्चा हु पाणिणो ॥
- [१९९] जेसिं तु विउला सिक्खा , मूलियं ते अइच्छिया ।
सीलवंता सविसेसा , अदीणा जं ति देवयं ॥
- [२००] एवमदीणवं भिक्खू , अगारिं च वियाणिया ।
कहण्णु जिच्चमेलिक्खं , जिच्चमाणे न संविदे ॥
- [२०१] जहा कुसग्गे उदगं , समुद्देण समं मिणे ।
एवं मा नुसग्गा कामा , देवकामाण अंतिए ॥
- [२०२] कुसग्गमेत्ता इमे कामा , सन्निरुद्धंमि आउए ।
कस्स हेउं पुराकाउं , जोगक्खेमं न संविदे ? ॥
- [२०३] इह कामा नियट्टस्स, अत्तट्ठे अवरज्झई ।
सोच्चा नेयाउयं मग्गं , जं भुज्जो परिभस्सई ॥
- [२०४] इह कामा नि यट्टस्स, अत्तट्ठे नावरज्झई ।
पूइदेहनिरोहेणं, भवे देवि त्ति मे सुयं ॥

- [२०५] इड्ढी जुई जसो वण्णो , आउं सुहम नुत्तरे ।
भुज्जो जत्थ म नुस्सेसु, तत्थ से उववज्जई ॥
- [२०६] बालस्स पस्स बालत्तं , अहम्मं पडिवज्जिया ।
चिच्चा धम्मं अहं मिट्ठे, नरएसु उववज्जई ॥
- [२०७] धीरस्स पस्स धीरत्तं , सच्चधम्मामनुवत्तिणो ।

अज्झयणं-७

- चिच्चा अधम्मं धम्मि ट्ठे, देवेसु उववज्जई ॥
- [२०८] तुलियाण बालभावं , अबालं चेव पंडिए ।
चइरुण बालभावं , अबालं सेवई मु नि ॥ त्तिबेमि
• सत्तमं अज्झयणं सम्मत्तं •

• अड्ढमं अज्झयणं - काविलीयं •

- [२०९] अधुवे असासयं मि, संसारमि दुक्खपउराए ।
किं नाम होज्ज तं कम्मयं ? जेणाहं दुग्गइं न गच्छेज्जा ॥
- [२१०] विजहित्तु पुव्वसंजोयं , न सिणेहं कहिंचि कुव्वेज्जा ।
असिणेह सिणेहकरेहिं, दोसपओसेहिं मुच्चए भिक्खू ॥
- [२११] तो नाणदंसणसमग्गो , हियनिस्सेसाय सव्वजीवाणं ।
तेसिं विमोक्खणद्वाए , भासई मु निवरो विगयमोहो ॥
- [२१२] सव्वं गंथं कलहं च , विप्पजहे तहाविहं भिक्खू ।
सव्वेसु कामजाएसु , पासमाणो न लिप्पई ताई ॥
- [२१३] भोगामिसदोसविसन्ने, हियनिस्सेयसबुद्धिवोच्चत्थे ।
बाले य मं दए मूढे , बज्जई मच्छिया व खेलं मि ॥
- [२१४] दुप्परिच्चया इमे कामा , नो सुजहा अधीरपुरिसेहिं ।
अह सं ति सुव्वया साहू , जे तरं ति अतरं वणिया वा ॥
- [२१५] समणा मु एगे वयमाणा , पाणवहं मिया अयाणं ता ।
मंदा निरयं गच्छं ति, बाला पावियाहिं दिट्ठीहिं ॥
- [२१६] न हु पाणवहं अणुजाणे , मुच्चेज्ज कयाइ सव्वदुक्खाणं ।
एवं आयरिएहिं अक्खायं, जेहिं इमो साहुधम्मो पन्नत्तो ॥
- [२१७] पाणे य नाइवाएज्जा , से समीइ त्ति वुच्चई ताई ।
तओ से पावयं कम्मं , निज्जाइ उदगं व थलाओ ॥
- [२१८] जगनिस्सिएहिं भूएहिं , तसनामेहिं थावरेहिं च ।
नो तेसिमारभे दंडं , मनसा वयसा कायसा चेव ॥
- [२१९] सुद्धेसणाओ नच्चाणं , तत्थ ठवेज्ज भिक्खू अप्पाणं ।
जायाए घासमेसेज्जा , रसगिद्धे न सिया भिक्खाए ॥
- [२२०] पंताणि चेव सेवेज्जा , सीयपिंडं पुराणकुम्मासं ।

- अदु बुक्कसं पुलागं वा , जवणद्वाए निसेवए मंथुं ॥
 [२२१] जे लक्खणं च सुविणं च , अंगविज्जं च जे पउंजंति ।
 न हु ते समणा वुच्चंति , एवं आयरिएहिं अक्खायं ॥
 [२२२] इह जीवियं अ नियमेत्ता, पब्भद्वा समाहिजोएहिं ।
 ते कामभोगरसगिद्धा , उववज्जंति आसुरे काए ॥

अज्झयणं-८

- [२२३] तत्तो वि य उव्वट्ठित्ता , संसारं बहु अ नुपरियटंति ।
 बहुकम्मलेवलित्ताणं, बोही होइ सुदुल्लहा तेसिं ॥
 [२२४] कसिणंपि जो इमं लोयं , पडिपुण्णं दलेज्ज इ क्कस्स ।
 तेणावि से न संतुस्से , इइ दुप्पूरए इमे आया ॥
 [२२५] जहा लाहो तहा लोहो , लाहा लोहो पव इढई ।
 दोमासकयं कज्जं , कोडीए वि न नि द्वियं ॥
 [२२६] नो रक्खसीसु गिज्जेज्जा , गंडवच्छासु अनेगचित्तासु ।
 जाओ पुरिसं पलोभित्ता , खेल्लंति जहा व दासेहिं ॥
 [२२७] नारीसु नोवगिज्जेज्जा , इत्थी विप्पजहे अ नगारे ।
 धम्मं च पेसलं नच्चा , तत्थ ठवेज्ज भिक्खू अप्पाणं ॥
 [२२८] इअ एस धम्मे अक्खाए , कविलेणं च विसुद्धपन्नेणं ।
 तरिहिंति जे उ काहिं ति, तेहिं आराहिया दुवे लोग ॥ त्ति बेमि

• अड्ढमं अज्झयणं सम्मत्तं •

• नवमं अज्झयणं - नमिपव्वज्जा •

- [२२९] चइऊण देवलोगाओ , उववन्नो माणुसं मि लोगं मि ।
 उवसंत मोहणिज्जो, सरई पोरणियं जा इं ॥
 [२३०] जाइं सरित्तु भयवं , सयंसंबुद्धो अ नुत्तरे धम्मे ।
 पुत्तं ठवेत्तु रज्जे , अभिनिक्खमई नमी राया ॥
 [२३१] से देवलोगसरिसे , अंतेउरवरगओ वरे भोए ।
 भुंजित्तु नमी राया , बुद्धो भोगे परिच्चयई ॥
 [२३२] मिहिलं सपुरज नवयं, बलमोरोहं च परियणं सव्वं ।
 चिच्चा अभिनिक्खं तो, एगंतमहिइडिओ भयवं ॥
 [२३३] कोलाहलगभूयं, आसी मिहिलाए पव्वयं तंमि ।
 तइया रायरिसिं मि, नमिमि अभि निक्खमंतंमि ॥
 [२३४] अब्भुट्ठियं रायरिसिं , पव्वज्जाठाणमुत्तमं ।
 सक्को माहणरूवेण , इमं वयणमब्बवी ॥
 [२३५] किं नु भो ! अज्ज मिहिलाए , कोलाहलगसंकुला ।
 सुव्वंति दारुणा सद्दा , पासाएसु गिहेसु य ? ॥

- [२३६] एयमद्वं निसामित्ता , हेऊकारणचोइओ ।
तओ नमी रायरिसी , देविंदं इणमब्बवी ॥
- [२३७] मिहिलाए चेइए वच्छे , सीयच्छाए म नोरमे ।
पत्तपुप्फफलोवेए, बहूणं बहुगुणे सया ॥
- [२३८] वाएण हीरमाणं मि, चेइयंमि म नोरमे ।

अज्झयणं-९

- दुहिया असरणा अत्ता , एए कं दंति भो ! खगा ॥
- [२३९] एयमद्वं निसामित्ता , हेऊकारणचोइओ ।
तओ नमिं रायरिसिं , देविंदो इणमब्बवी ॥
- [२४०] एस अग्गी य वाऊ य , एयं डज्झइ मं दिरं ।
भयवं अं तेउरं तेणं , कीस णं नावपेक्खह ॥
- [२४१] एयमद्वं निसामित्ता , हेऊकारणचोइओ ।
तओ नमि रायरिसी , देविंदं इणमब्बवी ॥
- [२४२] सुहं वसामो जीवामो , जेसिं मो नत्थि किंचणं ।
मिहिलाए डज्झमाणीए , न मे डज्झइ किंचणं ॥
- [२४३] चत्तपुत्तकलत्तस्स, निव्वावारस्स भिक्खुणो ।
पियं न विज्जई किंचि , अप्पियं पि न विज्जई ॥
- [२४४] बहुं खु मुणिणो भद्वं , अनगारस्स भिक्खुणो ।
सव्वओ विप्पमुक्कस्स , एगंतमनुपस्सओ ॥
- [२४५] एयमद्वं निसामित्ता , हेऊकारणचोइओ ।
तओ नमिं रायरिसिं , देविंदो इणमब्बवी ॥
- [२४६] पागारं कारइत्ताणं , गोपुरद्वालगाणि य ।
उस्सूलए सयग्घीओ, तओ गच्छसि खत्तिया ॥
- [२४७] एयमद्वं निसामित्ता , हेऊकारणचोइओ ।
तओ नमी रायरिसी , देविंदं इणमब्बवी ॥
- [२४८] सद्धं नगरं किच्चा , तवसंवरमग्गलं ।
खंतिं निउणपागारं , तिगुत्तं दुप्पधंसयं ॥
- [२४९] धनुं परक्कमं किच्चा , जीवं च इरियं सया ।
धिइं च केयणं किच्चाण , सच्चेण पलिमं थए ॥
- [२५०] तवनारायजुत्तेण, भित्तूण कम्मकंचुयं ।
मुनी विगयसंगामो , भवाओ परिमुच्चए ॥
- [२५१] एयमद्वं निसामित्ता , हेऊकारणचोइओ ।
तओ नमिं रायरिसिं , देविन्दो इणमब्बवी ॥
- [२५२] पासाए कारइत्ताणं , वड्ढमाणगिहाणि य ।
वालग्गपोइयाओ य , तओ गच्छसि खत्तिया ॥

- [२५३] एयमद्वं निसामित्ता , हेऊकारणचोइओ ।
 तओ नमी रायरिसी , देविंदं इणमब्बवी ॥
- [२५४] संसयं खलु सो कुणई , जो मग्गे कुणई घरं ।
 जत्थेव गं तुमिच्छेज्जा, तत्थ कुव्वेज्ज सासयं ॥
- [२५५] एयमद्वं निसामित्ता , हेऊकारणचोइओ ।

अज्झयणं-९

- तओ नमिं रायरिसिं , देविंदो इणमब्बवी ॥
- [२५६] आमोसे लोमहारे य , गंठिभेए य तक्करे ।
 नगरस्स खेमं कारुणं , तओ गच्छसि खत्तिया ॥
- [२५७] एयमद्वं निसामित्ता , हेऊकारणचोइओ ।
 तओ नमी रायरिसी , देविंदं इणमब्बवी ॥
- [२५८] असइं तु म नुस्सेहिं, मिच्छा दंडो प उंजई ।
 अकारिणोऽत्थ बज्झं ति, मुच्चई कारओ ज नो ॥
- [२५९] एयमद्वं निसामित्ता , हेऊकारणचोइओ ।
 तओ नमिं रायरिसिं , देविंदो इणमब्बवी ॥
- [२६०] जे केई पत्थिवा तुज्झं , नानमंति नराहिवा ! ।
 वसे ते ठावइत्ताणं , तओ गच्छसि खत्तिया ॥
- [२६१] एयमद्वं निसामित्ता , हेऊकारणचोइओ ।
 तओ नमी रायरिसी , देविंदं इणमब्बवी ॥
- [२६२] जो सहस्सं सहस्साणं , संगामे दुज्जए जिए ।
 एगं जिणेज्ज अप्पाणं , एस से परमो जओ ॥
- [२६३] अप्पणामेव जुज्झाहि , किं ते जुज्झेण बज्झओ ? ।
 अप्पणामेवमप्पाणं, जइत्ता सुहमेह ति ॥
- [२६४] पंचिंदियाणि कोहं , मानं मायं तहेव लोहं च ।
 दुज्जयं चेव अप्पाणं , सव्वं अप्पे जिए जियं ॥
- [२६५] एयमद्वं निसामित्ता , हेऊकारणचोइओ ।
 तओ नमिं रायरिसिं , देविंदो इणमब्बवी ॥
- [२६६] जइत्ता विउले जन्ने , भोइत्ता समणमाहणे ।
 दच्चा भोच्चा य ज च्चा य , तओ गच्छसि खत्तिया ॥
- [२६७] एयमद्वं निसामित्ता , हेऊकारणचोइओ ।
 तओ नमी रायरिसी , देविंदं इणमब्बवी ॥
- [२६८] जो सहस्सं सहस्साणं , मासे मासे गवं दए ।
 तस्स वि संजमो सेओ , अदिंतस्स वि किंचण ॥
- [२६९] एयमद्वं निसामित्ता , हेऊकारणचोइओ ।
 तओ नमिं रायरिसिं , देविंदो इणमब्बवी ॥

- [२७०] घोरासमं चइत्ताणं , अन्नं पत्थेसि आसमं ।
इहेव पोसहरओ , भवाहि मणुयाहिवा ॥
- [२७१] एयमद्वं निसामित्ता , हेऊकारणचोइओ ।
तओ नमी रायरिसी , देविदं इणमब्बवी ॥
- [२७२] मासे मासे तु जो बालो , कुसग्गेण तु भुंजए ।

- न सो सुयक्खायधम्मस्स , कालं अग्घइ सोलसिं ॥
- [२७३] एयमद्वं निसामित्ता हेऊकारणचोइओ ।
तओ नमिं रायरिसिं , देविदो इणमब्बवी ॥
- [२७४] हिरण्णं सुवण्णं मणिमुत्तं , कंसं दूसं च वाह नं ।
कोसं च वड्ढाइत्ताणं, तओ गच्छसि खत्तिया ॥
- [२७५] एयमद्वं निसामित्ता , हेऊकारणचोइओ ।
तओ नमी रायरिसी , देविदं इणमब्बवी ॥
- [२७६] सुवण्णरूपस्स उ पव्वया भवे ।
सिया हु केलासमा असंख्या ।
नरस्स लुद्धस्स न तेहिं किंचि ।
इच्छा हु आगाससमा अनंतया ॥
- [२७७] पुढवी साली जवा चेव , हिरण्णं पसुभिस्सह ।
पडिपुण्णं नालमेगस्स , इइ विज्जा तवं चरे ॥
- [२७८] एयमद्वं निसामित्ता , हेऊकारणचोइओ ।
तओ नमिं रायरिसिं , देविदो इणमब्बवी ॥
- [२७९] अच्छेरगमब्भुदए, भोए चयसि पत्थिवा ! ।
असंते कामे पत्थेसि , संकप्पेण विहं मसि ॥
- [२८०] एयमद्वं निसामित्ता , हेऊकारणचोइओ ।
तओ नमी रायरिसी , देविदं इणमब्बवी ॥
- [२८१] सल्लं कामा विसं कामा , कामा आसीविसोवमा ।
कामे भोए पत्थेमाणा , अकामा जं ति दोग्गई ॥
- [२८२] अहे वयं ति कोहेणं , माणेणं अहमा गई ।
माया गई पडिग्घाओ , लोभाओ दुहओ भयं ॥
- [२८३] अवउज्झिऊण माहणरूवं , विउव्विऊण इं दत्तं ।
वंदइ अभित्थुणं तो, इमाहिं महुराहिं वग्गूहिं ॥
- [२८४] अहो ते निज्जिओ कोहो , अहो मा नो पराजिओ ।
अहो निरक्किया माया , अहो लोभो वसीकओ ॥
- [२८५] अहो ते अज्जवं साहु , अहो ते साहु मद्वं ।
अहो ते उत्तमा खंती, अहो ते मुत्ति उत्तमा ॥

- [२८६] इहं सि उत्तमो भं ते! पच्छा होहिसि उत्तमो ।
 लोगुत्तमुत्तमं ठाणं , सिद्धिं गच्छसि नीरओ ॥
- [२८७] एवं अभित्थुणं तो, रायरिसिं उत्तमाए सद्धाए ।
 पयाहिणं क रँतो, पुणो पुणो वं दई सक्को ॥
- [२८८] तो वं दिऊण पाए , चक्कंकुसलक्खणे मु निवरस्स ।

अज्झयणं-९

- आगासेणुप्पइओ, ललियचवलकुंडलतिरीडी ॥
- [२८९] नमी नमेइ अप्पाणं , सक्खं सक्केण चोइओ ।
 चइऊणं गेहं च व इदेही, सामण्णे पज्जुवट्ठिओ ॥
- [२९०] एवं करे ति संबुद्धा , पंडिया पवियक्खणा ।
 विणियट्ठंति भोगेसु, जहा से नमी रायरिसी ॥ त्ति बेमि

• नवमं अज्झयणं सम्मत्तं •

• दसमं अज्झयणं - दुमपत्तयं •

- [२९१] दुमपत्तए पंडुयए जहा , निवडइ राइगणाण अ च्छए ।
 एवं मणुयाण जीवियं , समयं गोयम ! मा पमायए ॥
- [२९२] कुसग्गे जह ओसबिं दुए, थोवं चि इइ लं बमाणए ।
 एवं मणुयाणं जीवियं , समयं गोयम ! मा पमायए ॥
- [२९३] इइ इत्तरियं मि आउए , जीवियए बहुपच्चवायए ।
 विहुणाहि रयं पुरे कडं , समयं गोयम ! मा पमायए ॥
- [२९४] दुल्लहे खलु माणुसे भवे , चिरकालेण वि सव्वपाणिणं ।
 गाढा य विवाग कम्मणो , समयं गोयम ! मा पमायए ॥
- [२९५] पुढविकायमइगओ, उक्कोसं जीवो उ संवसे ।
 कालं संखाईयं , समयं गोयम ! मा पमायए ॥
- [२९६] आउकायमइगओ, उक्कोसं जीवो उ संवसे ।
 कालं संखाईयं , समयं गोयम ! मा पमायए ॥
- [२९७] तेउकायमइगओ, उक्कोसं जीवो उ संवसे ।
 कालं संखाईयं , समयं गोयम ! मा पमायए ॥
- [२९८] वाउकायमइगओ, उक्कोसं जीवो उ संवसे ।
 कालं संखाईयं , समयं गोयम ! मा पमायए ॥
- [२९९] वणस्सइकायमइगओ, उक्कोसं जीवो उ संवसे ।
 कालमनंतदुरंतयं, समयं गोयम ! मा पमायए ॥
- [३००] बेइंदियकायमइगओ, उक्कोसं जीवो उ संवसे ।
 कालं संखिज्जसं नियं, समयं गोयम ! मा पमायए ॥
- [३०१] तेइंदिकायमइगओ, उक्कोसं जीवो उ संवसे ।

- कालं संखिज्जसं नियं, समयं गोयम ! मा पमायए ॥
[३०२] चउरिंदियकायमइगओ, उक्कोसं जीवो उ संवसे ।
 कालं संखिज्जसं नियं, समयं गोयम ! मा पमायए ॥
[३०३] पंचिंदियकायमइगओ, उक्कोसं जीवो उ संवसे ।
 सत्तट्ठभवगहणे, समयं गोयम ! मा पमायए ॥

अज्झयणं-१०

- [३०४]** देवे नेरइए अइगओ , उक्कोसं जीवो उ संवसे ।
 इक्केक्कभवगहणे, समयं गोयम ! मा पमायए ॥
[३०५] एवं भवसंसारे , संसरइ सुहासुहेहिं कम्महिं ।
 जीवो पमायबहुलो , समयं गोयम ! मा पमायए ॥
[३०६] लद्धणऽवि मा नुसत्तणं, आरिअत्तं पु नरवि दुल्लहं ।
 बहवे दसुया मिलक्खुया , समयं गोयम ! मा पमायए ॥
[३०७] लद्धणऽवि आरियत्तणं , अहीणपंचेदियया हु दुल्लहा ।
 विगिलिंदियया हु दीसई , समयं गोयम ! मा पमायए ॥
[३०८] अहीणपंचेदियत्तं पि से लहे , उत्तमधम्मसुई हु दुल्लहा ।
 कुतित्थिनिसेवए ज ने, समयं गोयम ! मा पमायए ॥
[३०९] लद्धण वि उत्तमं सुइं , सदहणा पु नरवि दुल्लहा ।
 मिच्छित्तनिसेवए ज ने, समयं गोयम ! मा पमायए ॥
[३१०] धम्मं पि हु सदहं तथा, दुल्लहया कारण फासया ।
 इह कामगुणेहिं मुच्छिया , समयं गोयम ! मा पमायए ॥
[३११] परिजूरइ ते सरीरयं , केसा पं डुरया हवं ति ते ।
 से सोयबले य हायई , समयं गोयम ! मा पमायए ॥
[३१२] परिजूरइ ते सरीरयं , केसा पं डुरया हवं ति ते ।
 से चक्खुबले य हायई , समयं गोयम ! मा पमायए ॥
[३१३] परिजूरइ ते सरीरयं , केसा पं डुरया हवं ति ते ।
 से घाणबले य हायई , समयं गोयम ! मा पमायए ॥
[३१४] परिजूरइ ते सरीरयं , केसा पं डुरया हवं ति ते ।
 से जिब्भबले य हायई , समयं गोयम ! मा पमायए ॥
[३१५] परिजूरइ ते सरीरयं , केसा पं डुरया हवं ति ते ।
 से फासबले य हायई , समयं गोयम ! मा पमायए ॥
[३१६] परिजूरइ ते सरीरयं , केसा पं डुरया हवं ति ते ।
 से सव्वबले य हायई , समयं गोयम ! मा पमायए ॥
[३१७] अरई गं ड विसूइया , आयंका विविहा फुसं ति ते ।
 विहडइ विद्धंसइ ते सरीरयं , समयं गोयम ! मा पमायए ॥
[३१८] वोच्छिंद सिणेहमप्पणो , कुमुयं सारइयं व पाणियं ।

- से सव्वसिणेह वज्जिए, समयं गोयम ! मा पमायए ॥
 [३१९] चिच्चाण धनं च भारियं , पव्वइओ हि सि अ नगारियं ।
 मा वं तं पुणो वि आविए , समयं गोयम ! मा पमायए ॥
 [३२०] अवउज्झिय मित्तबं धवं, विउलं चैव धणोहसंचयं ।
 मा तं बिइयं गवेसए , समयं गोयम ! मा पमायए ॥

अज्झयणं-१०

- [३२१] न हु जिणे अज्ज दिस्सई , बहुमए दिस्सइ मग्गदेसिए ।
 संपइ नेयाउए पहे , समयं गोयम ! मा पमायए ॥
 [३२२] अवसोहिय कं टगापहं, ओइण्णोसि पहं महालयं ।
 गच्छसि मग्गं विसोहिया , समयं गोयम ! मा पमायए ॥
 [३२३] अबले जह भारवाहए , मा मग्गं विसमेऽवगाहिया ।
 पच्छा पच्छाणुतावए , समयं गोयम ! मा पमायए ॥
 [३२४] तिण्णो हु सि अण्णवं महं, किं पुण चिइसि तीरमागओ ? ।
 अभितुर पारं गमित्तए , समयं गोयम ! मा पमायए ॥
 [३२५] अकलेवरसेणिं उस्सिया , सिद्धिं गोयम ! लोयं गच्छसि ।
 खेमं च सिवं अ नुत्तरं, समयं गोयम ! मा पमायए ॥
 [३२६] बुद्धे परिनिव्वुडे चरे , गामगए नगरे स संजए ।
 संतीमग्गं च वूहए, समयं गोयम ! मा पमायए ॥
 [३२७] बुद्धस्स निसम्म भासियं , सुकहियमइपओवसोहियं ।
 रागं दोसं च छिं दिया, सिद्धिगइं गए गोयमे ॥ त्ति बेमि

• दसमं अज्झयणं सम्मत्तं •

• इक्कारसमं अज्झयणं - बहुस्सुयपुज्जं •

- [३२८] संजोगा विप्पमुक्कस्स , अनगारस्स भिक्खुणो ।
 आयारं पाउकरिस्सामि , आनुपुत्विं सुणेह मे ॥
 [३२९] जे यावि होइ निव्विज्जे , थद्धे लुद्धे अ निग्गहे ।
 अभिक्खणं उ ल्लवई, अविनीए अबहुस्सुए ॥
 [३३०] अह पंचहिं ठाणेहिं , जेहिं सिक्खा न लब्भई ।
 थंभा कोहा पमाएणं , रोगेणालस्सएण य ॥
 [३३१] अह अ इहिं ठाणेहिं , सिक्खासीलि त्ति वुच्चई ।
 अहस्सिरे सया दं ते, न य मम्ममुदाहरे ॥
 [३३२] नासीले न विसीले , न सिया अइलोलुए ।
 अकोहणे सच्चरए , सिक्खासीलि त्ति वुच्चई ॥
 [३३३] अह चोद्धसहिं ठाणेहिं , वट्टमाणे उ संजए ।
 अविनीए वुच्चई सो उ , निव्वाणं च न गच्छइ ॥

- [३३४] अभिक्खणं कोही हवइ , पबंधं च पकुव्वई ।
 मेल्लिज्जमाणो वमइ , सुयं लद्धण मज्जई ॥
- [३३५] अवि पावपरिक्खेवी, अवि मित्तेसु कुप्पई ।
 सुप्पियस्सावि मित्तस्स , रहे भासइ पावयं ॥
- [३३६] पइण्णवाइ दुहिले , थद्धे लुद्धे अ निग्गहे ।

अज्झयणं-११

- असंविभागी अवियत्ते , अविनीए त्ति वुच्चई ॥
- [३३७] अह पन्नरसहिं ठाणेहिं , सुविनीए त्ति वुच्चई ।
 नीयावित्ती अचवले , अमाई अकुऊहले ॥
- [३३८] अप्पं च अहिक्खिवई , पबंधं च न कुव्वई ।
 मेल्लिज्जमाणो भयई , सुयं लद्धं न मज्जई ॥
- [३३९] न य पावपरिक्खेवी , नय मित्तेसु कुप्पई ।
 अप्पियस्सावि मित्तस्स , रहे कल्लाण भासई ॥
- [३४०] कलहडमरवज्जए, बुद्धे अ अभिजाइए ।
 हिरिमं पडिसंली ने, सुविनीए त्ति वुच्चई ॥
- [३४१] वसे गुरकूले निच्चं , जोगवं उवहाणवं ।
 पियंकरे पियंवाइ , से सिक्खं लद्धमरिहई ॥
- [३४२] जहा संखं मि पयं निहियं दुहओ वि विरायइ ।
 एवं बहुस्सुए भिक्खू , धम्मो कित्ती तहा सुयं ॥
- [३४३] जहा से कं बोयाणं, आइण्णे कं थए सिया ।
 आसे जवेण पवरे , एव हवइ बहुस्सुए ॥
- [३४४] जहाऽऽइण्णसमारूढे, सूरे दढपरक्कमे ।
 उभओ नं दिघोसेणं, एवं हवइ बहुस्सुए ॥
- [३४५] जहा करेणुपरिक्किण्णे , कुंजरे सद्धिहायणे ।
 बलवंते अप्पडिहए , एवं हवइ बहुस्सुए ॥
- [३४६] जहा से तिक्खसिंगे , जायखंधे विरायई ।
 वसहे जुहाहिवई , एवं हवइ बहुस्सुए ॥
- [३४७] जहा से तिक्खदाढे , उदग्गे दुप्पहंसए ।
 सीहे मियाण पवरे , एवं हवइ बहुस्सुए ॥
- [३४८] जहा से वासुदेवे , संखचक्कगयाधरे ।
 अप्पडिहयबले जोहे , एवं हवइ बहुस्सुए ॥
- [३४९] जहा से चाउरं ते, चक्कवट्ठी महि इढिए ।
 चउद्धसरयणाहिवई, एवं हवइ बहुस्सुए ॥
- [३५०] जहा से सहस्सक्खे , वज्जपाणी पुरं दरे ।
 सक्के दिवाहिवई , एवं हवइ बहुस्सुए ॥

- [३५१] जहा से तिमिरविद्धंसे , उच्चिद्धंते दिवायरे ।
जलंते व तेएण , एवं हवइ बहुस्सुए ॥
- [३५२] जहा से उडुवई चं दे, नक्खत्तपरिवारिए ।
पडिपुण्णे पुण्णमासीए , एवं हवइ बहुस्सुए ॥
- [३५३] जहा से सामाइ यंगाणं, कोट्टागारे सुरक्खिए ।

अज्झयणं-११

- नानाधन्नपडिपुण्णे, एवं हवइ बहुस्सुए ॥
- [३५४] जहा सा दुमाण पवरा , जंबू नाम सुदंसणा ।
अनाढियस्स देवस्स , एवं हवइ बहुस्सुए ॥
- [३५५] जहा सा नईण पवरा , सलिला सागरंगमा ।
सीया नीलवं तपवहा, एवं हवइ बहुस्सुए ॥
- [३५६] जहा से नगाण पवरे , सुमहं मं दरे गिरी ।
नानोसहिपज्जलिए, एवं हवइ बहुस्सुए ॥
- [३५७] जहा से सयंभुरमणे , उदही अक्खओदए ।
नानारयणपडिपुण्णे, एवं हवइ बहुस्सुए ॥
- [३५८] समुद्धगंभीरसमा दुरासया ।
अचक्किया केणइ दुप्पहंसया ।
सुयस्स पुण्णा विउलस्स ताइणो
खवित्तु कम्मं गइमुत्तमं गया ॥
- [३५९] तम्हा सुयमहिद्धिज्जा , उत्तमद्दगवेसए ।
जेणप्पाणं परं चेव , सिद्धिं संपाउणेज्जासि ॥ त्ति बेमि
• इक्कारसमं अज्झयणं सम्मत्तं •

• बारसमं अज्झयणं - हरिएसिज्ज •

- [३६०] सोवागकुलसंभूओ, गुणुत्तरधरो मु नी ।
हरिएसबलो नाम , आसि भिक्खू जिइं दिओ ॥
- [३६१] इरिएसणभासाए, उच्चारसमिईसु य ।
जओ आयाणनिक्खेवे , संजओ सुसमाहिओ ॥
- [३६२] मनगुत्तो वयगुत्तो , कायगुत्तो जिइं दिओ ।
भिक्खट्ठा बं भइज्जंमि, जन्नवाडे उव ढ्दिओ ॥
- [३६३] तं पासिऊणं एज्जं तं, तवेण परिसोसियं ।
पंतोवहिउवगरणं, उवहसंति अ नारिया ॥
- [३६४] जाईमयपडिथद्धा, हिंसगा अजिइं दिया ।
अबंभचारिणो बाला , इमं वयणमब्बवी ॥
- [३६५] कयरे आगच्छइ दित्तरूवे ? काले विकराले फोक्कनासे ।

ओमचेलए पंसुपिसायभूए संकरदूसं परिहरिय कं ठे ॥

[३६६] कयरे तुमं इय अदसंणिज्जे ? काए व आसाए इहमागओ सि ? ।

ओमचेलया पंसुपिसायभूया, गच्छक्खलाहि किमिहं ठिओ सि ? ॥

[३६७] जक्खे तहिं तिंदुयरुक्खवासी, अनुकंपओ तस्स महामुनिस्स ।

पच्छायइत्ता नियगं सरीरं , इमाइं वयणाइं उ दाहरित्था ॥

अज्झयणं-१२

[३६८] समणो अहं संजओ बं भयारी, विरओ धणपयणपरिग्गहाओ ।
परप्पवित्तस्स उ भिक्खकाले , अन्नस्स अट्ठा इहमागओ मि ॥

[३६९] वियरिज्जइ खज्जइ भुज्जई य अन्नं पभूयं भवयाणमेयं ।
जाणाहि मे जायणजीविणु त्ति , सेसावसेसं लभऊ तवस्सी ॥

[३७०] उवक्खडं भोयण माहणाणं , अत्तिट्ठियं सिद्धमिहेगपक्खं ।
न ऊ वयं एरिसमन्नपाणं , दाहामु तुज्झं किमिहं ठिओऽसि ? ॥

[३७१] थलेसु बीयाइं व यंति कासगा , तहेव निन्नेसु य आससाए ।
एयाए सद्धाए दलाह मज्झं , आराहए पुण्णमिणं खु खित्तं ॥

[३७२] खेत्ताणि अम्हं विइयाणि लोए , जहिं पकिण्णा विरुहं ति पुण्णा ।
जे माहणा जाइविज्जोववेया , ताइं तु खेत्ताइं सुपेसलाइं ॥

[३७३] कोहो य माणो य वहो य जेसिं , मोसं अदत्तं च परिग्गहं च ।
ते माहणा जाइविज्जाविहूणा , ताइं तु खेत्ताइं सुपावयाइं ॥

[३७४] तुब्भेत्थ भो ! भारधरा गिराणं , अट्ठं न जाणेह अहिज्ज वेए ।
उच्चावयाइं मुणिणो चरं ति, ताइं तु खेत्ताइं सुपेसलाइं ॥

[३७५] अज्झावयाणं पडिकूलभासी , पभाससे किं नु सगासि अम्हं ।
अवि एयं वि नस्सउ अन्नपाणं , न य णं दाहामु तुमं नियं ठा ॥

[३७६] समिईहि मज्झं सुसमाहियस्स , गुत्तीहि गुत्तस्स जिइं दियस्स ।
जइ मे न दाहित्थ अहेसणिज्जं, किमज्ज जन्नाण लहित्थ लाहं ? ॥

[३७७] के इत्थ खत्ता उवजोइया वा , अज्झावया वा सह खं डिएहिं ? ।
एयं खु दं डेण फलएण हं ता, कंठमि घेत्तूण खलेज्ज जो णं ॥

[३७८] अज्झावयाणं वयणं सुणेत्ता , उद्धाइया तत्थ बहू कुमारा ।
दंडेहिं वित्तेहिं कसेहिं चेव , समागया तं इसि तालयं ति ॥

[३७९] रन्नो तहिं कोसलियस्स धूया , भद्ध त्ति नामेण अ निंदियंगी ।
तं पासिया संजय हम्ममाणं , कुद्धे कुमारे परिनिव्वेइ ॥

[३८०] देवाभिओगेण निओइएणं , दिन्ना मु रन्ना म नसा न झाया ।
नरिंददेविंदभिवंदिएणं, जेणाणि वंता इसिणा स एसो ॥

[३८१] एसो हु सो उग्गतवो महप्पा , जिइंदिओ संजओ बं भयारी ।
जो मे तया नेच्छइ दिज्जमाणिं , पिउणा सयं कोसलिएण रन्ना ॥

[३८२] महाजसो एस महा नुभागो, घोरव्वओ घोरपरक्कमो य ।

मा एयं हीलेह अहीलणिज्जं , मा सव्वे तेएण भे निद्वहेज्जा ॥
 [३८३] एयाइं तीसे वयणाइं सोच्चा , पत्तीइं भद्दाइं सुभासियाइं ।
 इसिस्स वेयावडियद्वयाए जक्खा कुमारे वि निवारयंति ॥
 [३८४] ते घोरूवा ठिय अं तलिक्खे, असुरा तहिं तं ज नं तालयं ति ।
 ते भिन्नदेहे रुहिरं वमं ते, पासित्तु भद्दा इणमाहु भुज्जो ॥

अज्झयणं-१२

[३८५] गिरिं नहेहिं खणह , अयं दं तेहिं खायह ।
 जायतेयं पाएहिं हणह , जे भिक्खु अवमन्नह ॥
 [३८६] आसीविसो उग्गतवो महेसी , घोरव्वओ घोरपरक्कमो य ।
 अग्निं व पक्खं द पयंगसेणा , जे भिक्खुयं भत्तकाले वहेह ॥
 [३८७] सीसेण एयं सरणं उवेह , समागया सव्वजणेण तुब्भे ।
 जइ इच्छह जीवियं वा ध नं वा, लोगंपि एसो कुविओ डहेज्जा ॥
 [३८८] अवहेडियपिड्डिसउत्तमंगे, पसारिया बाहु अकम्मचिद्वे ।
 निब्भेरियच्छे रुहिरं वमं ते, उड्ढंमुहे निग्गयजीहनेत्ते ॥
 [३८९] ते पासिया खं डिय कड्ढभूए, विमणो विसण्णो अह माहणो सो ।
 इसिं पसाएइ सभारियाओ , हीलं च निं द च खमाह भं ते! ॥
 [३९०] बालेहिं मूढेहिं अयाणएहिं , जं हीलिया तस्स खमाह भं ते! ।
 महप्पसाया इ सिणो हवं ति, न हु मु नी कोवपरा हवं ति ॥
 [३९१] पुव्विं च इण्हिं च अ नागयं च, मणप्पदोसो न मे अत्थि कोइ ।
 जक्खा हु वेयावडियं करे ति, तम्हा हु एए निहया कुमारा ॥
 [३९२] अत्थं च धम्मं च वियाणमाणा , तुब्भं न वि कुप्पह भूइपन्ना ।
 तुब्भं तु पाए सरणं उवेमो , समागया सव्वजणेण अम्हे ॥
 [३९३] अच्चेमु ते महाभाग ! न ते किंच न न अच्चिमो ।
 भुंजाहि सालिमं कूरं , नाणवंजण संजुयं ॥
 [३९४] इमं च मे अत्थि पभूयमन्नं , तं भुंजसू अम्ह अ नुग्गहट्ठा ।
 बाढं त्ति पडिच्छइ भत्तपा नं, मासस्स ऊ पारणए महप्पा ॥
 [३९५] तहियं गं धोदयपुप्फवासं, दिव्वा तहिं वसुहारा य वुट्ठा ।
 पहयाओ दुं दुहीओ सुरेहिं , आगासे अहो दा नं च घुट्ठं ॥
 [३९६] सक्खं खु दीसइ तवोविसेसो , न दीसई जाइविसेस कोई ।
 सोवागपुत्तं हरिएससाहुं , जस्सेरिसा इ इट्ठि महा नुभागा ॥
 [३९७] किं माहणा! जोई समारभंता, उदएण सोहिं बहिया विमग्गहा ? ।
 जं मग्गहा बाहिरियं विसोहिं , न तं सुइ ढुं कुसला वयं ति ॥
 [३९८] कुसं च जूवं तणकड्ढमग्गिं , सायं च पायं उदगं फुसं ता ।
 पाणाइं भूयाइं विहेडयं ता, भुज्जोऽवि मं दा पकरेह पावं ॥
 [३९९] कहां चरे भिक्खु ! वयं जयामो ? पावाइं कम्माइं पणुल्लयामो ।

- अक्खाहि णे संजय जक्खपूइया , कहं सुइइं कुसला वयं ति ॥
 [४००] छज्जीवकाए असमारभं ता, मोसं अदत्तं च असेवमाणा ।
 परिग्गहं इत्थिओ मा न मायं , एयं परिन्नाय चरं ति दं ता ॥
 [४०१] सुसंवुडा पंचहिं संवरेहिं , इह जीवियं अ नवकंखमाणा ।
 वोसइकाओ सुइचत्तदेहा , महाजयं जय ई जन्नसि इं ॥

अज्झयणं-१२

- [४०२] के ते जोई के व ते जोइठाणे ? का ते सुया किं व ते कारिसंगं ? ।
 एहा य ते कयरा सं ति भिक्खू! कयरेण होमेण हुणासि जोइं ? ॥
 [४०३] तवो जोई जीवा जोइठाणं , जोगा सुया सरीरं कारिसंगं ।
 कम्म ए हा संजमजोगसं ती, होमं हुणामि इसिणं पसत्थं ॥
 [४०४] के ते हरए के य ते सं तितित्थे ? कहिं सिणाओ व रयं जहासि ? ।
 आइक्ख णे संजय जक्खपूइया , इच्छामो नाउं भवओ सगासे ॥
 [४०५] धम्मे हरए बं भे सं तितित्थे, अनाविले अत्तपसन्नलेसे ।
 जहिं सिणाओ विमलो विसुद्धो , सुसीइभूओ पजहामि दोसं ॥
 [४०६] एयं सिणाणं कुसलेहि दिइं , महासिणाणं इसिणं पसत्थं ।
 जहिं सिणाया विमला विसुद्धा , महारिसी उत्तमं ठाणं पत्ते ॥ त्ति
 बेमि

• बारसमं अज्झयणं सम्मत्तं •

• तेरसमं अज्झयणं - चित्तसंभूइज्जं •

- [४०७] जाईपराजिओ खलु , कासि नियाणं तु हत्थिणपुरं मि ।
 चुलणीए बं भदत्तो, उववन्नो पउम गुम्माओ ॥
 [४०८] कंपिल्ले सं भूओ, चित्तो पुण जाओ पुरिमतालं मि ।
 सेट्टिकुलंमि विसाले , धम्मं सोऊण पव्वइओ ॥
 [४०९] कंपिल्लंमि य नयरे , समागया दो वि चित्तसं भूया ।
 सुहुदुक्खफलविवागं, कहेंति ते एककमेक्कस्स ॥
 [४१०] चक्कवट्ठी महि इढीओ, बंभदत्तो महायसो ।
 भायरं बहुमा नेनं, इमं वयणमब्बवी ॥
 [४११] आसीमो भायरा दोऽवि , अन्नमन्नवसानुगा ।
 अन्नमन्नमनुरत्ता, अन्नमन्नहिएसिणो ॥
 [४१२] दासा दसण्ण ये आसी, मिया कालिंजरे नगे ।
 हंसा मयंगतीराए , सोवागा कासिभूमिए ॥
 [४१३] देवा य देवलोगं मि, आसि अम्हे महि इढिया ।
 इमा णो छ द्विया जाई , अन्नमन्नेण जा वि ना ॥
 [४१४] कम्मा नियाणपगडा , तुमे राय! विचिं तिया ।

तेसिं फलविवागेण , विप्पओगमुवागया ॥

[४१५] सच्चसोयप्पगडा, कम्मा मए पुरा कडा ।

ते अज्ज परिभुंजामो , किं नु चित्तेवि से तथा ॥

[४१६] सत्त्वं सुचिष्णं सफलं नराणं , कडाण कम्माण न मोक्ख अत्थि ।

अत्थेहिं कामेहिं य उत्तमेहिं , आया ममं पुण्णफलोववेए ॥

[४१७] जाणासि संभूय ! महा नुभागं, महिड्ढियं पुण्णफलोववेयं ।

अज्झयणं-१३

चित्तं पि जाणाहि तहेव रायं ! इड्ढी जुई तस्सवि अप्पभूया ॥

[४१८] महत्थरूवा वयणप्पभूया , गाहाणुगीया नरसंघमज्झे ।

जं भिक्खुणो सीलगुणोववेया , इह जयं ते समणोऽ म्हि जाओ ॥

[४१९] उच्चोअए महु कक्के य बं भे, पवेइया आवसहा य रम्मा ।

इमं गिहं चित्तध नप्पभूयं, पसाहि पंचालगुणोववेयं ॥

[४२०] नट्टेहिं गीएहिं य वाइएहिं , नारीजणाहिं परिवारयं तो ।

भुंजाहि भोगाइ इमाइ भिक्खू , मम रोयई पव्वज्जा हु दुक्खं ॥

[४२१] तं पुव्वनेहेण कयाणुरागं , नराहिवं कामगुणेषु गिद्धं ।

धम्मस्सिओ तस्स हियाणुपेही , चित्तो इमं वयणमुदाहरित्था ॥

[४२२] सत्त्वं विलवियं गीयं , सत्त्वं नट्टं विडम्बियं ।

सव्वे आभरणा भारा , सव्वे कामा दुहावहा ॥

[४२३] बालाभिरामेषु दुहावहेसु , न तं सुहं कामगुणेषु रायं ।

विरत्तकामाण तवोधणाणं , जं भिक्खुणं सीलगुणे रयाणं ॥

[४२४] नरिंद जाई अहमा नराणं , सोवागजाई दुहओ गयाणं ।

जहिं वयं सव्वज नस्स वेस्सा , वसीअ सोवागनिवेस नेसु ॥

[४२५] तीसं य जाईइ उ पावियाए वुच्छा मु सोवागनिवेस नेसु ।

सव्वस्स लोगस्स दुगंछणिज्जा , इहं तु कम्माइं पुरे कडाइं ॥

[४२६] सो दाणिसिं राय महा नुभागो, महिड्ढिओ पुण्णफलोववेओ ।

चइत्तु भोगाइं असासयाइं , आदानहेउं, अभिनिक्खमाहि ॥

[४२७] इह जीवीए राय असासयं मि, धणियं तु पुण्णाइं अकुव्वमाणो ।

से सो यई मच्चुमुहोवणीए , धम्मं अकाऊण परंमि लोए ॥

[४२८] जहेह सीहो व मियं गहाय , मच्चू नरं नेइ हु अं तकाले ।

न तस्स माया व पिया व भाया , कालंमि तम्मंसहरा भवं ति ॥

[४२९] न तस्स दुक्खं विभयंति नाइओ, न मित्तवग्गा न सुया न बंधवा

।

एक्को सयं पच्चणुहोइ दुक्खं , कत्तारमेव अणुजाइ कम्मं ॥

[४३०] चिच्चा दुपयं च चउप्पयं च , खेत्तं गिहं धणधन्नं च सत्त्वं ।

सकम्मबीओ अवसो पया इ, परं भवं सुंदरं पावगं वा ॥

- [४३१] तं एककगं तुच्छसरीरगं से , चिईगयं दहियं उ पावगेणं ।
भज्जा य पुत्तोवि य नायओ वा , दायारमन्नं अणुसंकमं ति ॥
- [४३२] उवणिज्जई जीवियमप्पमायं , वण्णं जरा हरइ नरस्स रायं ! ।
पंचालराया! वयणं सुणाहि , मा कासि कम्माइं महालयाइं ॥
- [४३३] अहं पि जाणामि जहेह साहू ! जं मे तुमं साहसि वक्कमेयं ।
भोगा इमे संग करा हवंति , जे दुज्जया अज्जो ! अम्हारिसेहिं ॥
- [४३४] हत्थिणपुरंमि चित्ता , दहूणं नरवइं महि इठीयं ।

अज्झयणं-१३

- [४३५] कामभोगेसु गिद्धेणं , नियाणमसुहं कडं ॥
तस्स मे अपडिकं तस्स, इमं एयारिसं फलं ।
जाणमाणो वि जं धम्मं , कामभोगेसु मुच्छिओ ॥
- [४३६] नागो जहा पंकजलावसन्नो , दहूं थलं नाभिसमेइ तीरं ।
एवं वयं कामगुणेसु गिद्धा , न भिक्खुणो मग्गम नुव्वयामो ॥
- [४३७] अच्चेइ कालो तूरं ति राइ , न यावि भोगा पुरिसाण निच्चा ।
उविच्च भोगा पुरिसं चयं ति, दुमं जहा खीणफलं व पक्खी ॥
- [४३८] जइ तं सि भोगे चइउं असत्तो , अज्जाइं कम्माइं करेहि रायं ।
धम्मे ठिओ सव्वपयाणुकं पी, तो होहिसि देवो इओ विउव्वी ॥
- [४३९] न तुज्झ भोगे चइऊण बुद्धी , गिद्धोसि आरं भपरिग्गहेसु ।
मोहं कओ एत्तिउ विप्पलावो , गच्छामि रायं! आमं तिओ सि ॥
- [४४०] पंचालरायाऽवि य बं भदत्तो, साहुस्स तस्स वयणं अकाउं ।
अनुत्तरे भुंजिय कामभोगे , अणुत्तरे सो नरे पविट्ठो ॥
- [४४१] चित्तोऽवि कामेहि विरत्तकामो , उदग्गचारित्ततवो महेसी ।
अनुत्तरं संजमं पालइत्ता , अनुत्तरं सिद्धिगइं गओ ॥ त्ति
बेमि

• तेरसमं अज्झयणं सम्मत्तं •

• चउद्धसमं अज्झयणं-उसुयारिज्जं •

- [४४२] देवा भवित्ताण पुरे भवं मि केई चुया एगविमा नवासी ।
पुरे पुराणे उसुयारनामे , खाए समिद्धे सुरलोगरम्मे ॥
- [४४३] सकम्मसेसेण पुराकएणं , कुलेसुदग्गेषु य ते पसूया ।
निव्विण्णसंसारभया जहाय , जिणिंदमग्गं सरणं पवन्ना ॥
- [४४४] पुमत्तमागम्म कुमार दोऽवि , पुरोहिओ तस्स जसा य पत्ती ।
विसालकित्ती य तहोसुयारो , रायऽत्थ देवी कमलावई य ॥
- [४४५] जाईजरामच्चुभयाभिभूया, बहिविहाराभिनिविट्ठचित्ता ।
संसारचक्कस्स विमोक्खण द्वा, दहूण ते कामगुणे विरत्ता ॥

- [४४६] पियपुत्तगा दोन्नि वि माहणस्स , सकम्मसीलस्स पुरोहियस्स ।
सारित्तु पोराणिय तत्थ जाइं , तहा सुचिण्णं तवसंजमं च ॥
- [४४७] ते कामभोगेसु असज्जमाणा , माणुस्सएसुं जे यावि दिव्वा ।
मोक्खाभिकंखी अभिजायस इढा, तातं उवागम्म इमं उदाहु ॥
- [४४८] असासयं दद्दु इमं विहारं , बहुअंतरायं न य दीहमातं ।
तम्हा गिहंसि न रइं लभामो , आमंतयामो चरिस्सामु मो नं ॥
- [४४९] अह तायगो तत्थ मुणीण तेसिं , तवस्स वाघायकरं वयासी ।
इमं वयं वेयविओ वयं ति, जहा न होई असुयाण लोगो ॥

अज्झयणं-१४

- [४५०] अहिज्ज वेए परिविस्स विप्पे , पुत्ते परि ड्वप्प गिहंसि जाया ।
भोच्चाण भोए सह इत्थियाहिं , आरण्णगा होह मु नी पसत्था ॥
- [४५१] सोयग्गिणा आयगुणिं धणेणं, मोहानिला पज्जलणाहिणं ।
संतत्तभावं परितप्पमाणं, लालप्पमाणं बहुहा बहुं च ॥
- [४५२] पुरोहियं तं कमसोऽणु नंतं, नीमंतयंतं च सुए धणेणं ।
जहक्कमं कामगुणेहिं चेव , कुमारगा ते पसमिक्ख वक्कं ॥
- [४५३] वेया अहीया न भवं ति ताणं, भुत्ता दिया निं ति तमं तमेणं ।
जाया य पुत्ता न हवं ति ताणं, को नाम ते अणुमन्नेज्ज एयं ?
॥
- [४५४] खणमित्तसुक्खा बहुकालदुक्खा , पगामदुक्खा अ निगामसुक्खा ।
संसारमोक्खस्स विपक्खभूया, खाणी अनत्थाण उ कामभोगा ॥
- [४५५] परिव्वयंते अ नियत्तकामे, अहो य राओ परितप्पमाणे ।
अन्नप्पमत्ते धणमेसमाणे , पप्पोत्ति मच्चुं पुरिसे जरं च ॥
- [४५६] इमं च मे अत्थि इमं च नत्थि, इमं च मे किच्चमिमं अकिच्चं ।
तं एवमेवं लालप्पमाणं , हरा हरंति त्ति कहं पमाओ ? ॥
- [४५७] धनं पभूयं सह इत्थियाहिं , सयणा तहा कामगुणा पगामा ।
तवं कए तप्पइ जस्स लोगो , तं सव्व साहीणमिहेव तुब्भं ॥
- [४५८] धणेण किं धम्मधुराहिगारे , सयणेण वा कामगुणेहिं चेव ।
समणा भविस्सामु गुणोहधारी, बहिं विहारा अभिगम्म भिक्खं ॥
- [४५९] जहा य अग्गी अरणी असं तो, खीरे घयं तेल्लमहा ति लेसु ।
एमेव जाया सरीरंसि सत्ता , संमुच्छई नासइ नावचिद्धे ॥
- [४६०] नोइंदियग्गेज्झ अमुत्तभावा, अमुत्तभावा वि य होइ निच्चो ।
अज्झत्थहेउं निययस्स बं धो, संसारहेउं च वयं ति बं धं ॥
- [४६१] जहा वयं धम्मं अजाणमाणा , पावं पुरा कम्ममकासि मोहा ।
ओरुब्भमाणा परिरक्खियं ता, तं नेव भुज्जोऽवि समायरामो ॥
- [४६२] अब्भाहयंमि लोगं मि, सव्वओ परिवारिए ।

- अमोहाहिं पडं तीहिं, गिहंसि न रइं लभे ॥
- [४६३] केण अब्भाहओ लोगो , केण वा परिवारिओ ।
का वा अमोहा वुत्ता , जाया चिंतावरो हुमे ॥
- [४६४] मच्चुणाऽब्भाहओ लोगो , जराए परिवारिओ ।
अमोहा रयणी वुत्ता , एवं ताय विजाणह ॥
- [४६५] जा जा वच्चइ रयणी , न सा पडिनियत्तई ।
अहम्मं कुणमाणस्स , अफला जं ति राइओ ॥
- [४६६] जा जा वच्चइ रयणी , न सा पडिनियत्तई ।
धम्मं च कुणमाणस्स , सफला जं ति राइओ ॥

अज्झयणं-१४

- [४६७] एगओ संवसित्ताणं , दुहओ सम्मत्तसंजुया ।
पच्छा जाया गमिस्सामो, भिक्खमाणा कुले कुले ॥
- [४६८] जस्सऽत्थि मच्चुणा सक्खं, जस्स वऽत्थि पलायणं ।
जो जाणे न मरिस्सामि , सो हु कंखे सुए सिया ॥
- [४६९] अज्जेव धम्मं पडिवज्जयामो , जहिं पवन्ना न पुणब्भवामो ।
अनागयं नेव य अत्थि किंचि , सद्धा खमं नो विणइत्तु रागं ॥
- [४७०] पहीणपुत्तस्स हु नत्थि वासो , वासिद्धि! भिक्खायरियाइ कालो ।
साहाहिं रुक्खो लहई समाहिं , छिन्नाहि साहाहिं तमेव खाणुं ॥
- [४७१] पंखाविहूणो व्व जहेह पक्खी , भिच्चाविहूणो व्व रणे न रिंदो ।
विवन्नसारो वणिओ व्व पोए , पहीणपुत्तो मि तहा अहंपि ॥
- [४७२] सुसंभिया कामगुणा इमे ते , संपिंडिआ अग्गरसाप्पभूया ।
भुंजामु ता कामगुणे पगामं , पच्छा गमिस्सामु पहाणमग्गं ॥
- [४७३] भुत्ता रसा भोइ ! जहाइ णे वओ , न जीवियद्वा पजहामि भोए ।
लाभं अलाभं च सुहं च दुक्खं, संचिक्खमाणो चरिस्सामि मोनं ॥
- [४७४] मा हु तुमं सोयरियाण सं भरे, जुण्णो व हंसो पडिसोत्तगामी ।
भुंजाहि भोगाई मए समाणं , दुक्खं खु भिक्खायरिया विहारो ॥
- [४७५] जहा य भोई तणुयं भुयंगो , निम्मोयणिं हिच्च पलेइ मुत्तो ।
एमेए जाया पयहं ति भोए , तेऽहं कहं ना नुगमिस्समेक्को ? ॥
- [४७६] छिंदित्तु जालं अबलं व रोहिया , मच्छा जहा कामगुणे पहाय ।
धोरेयसीला तवसा उदारा , धीरा हु भिक्खायरियं चरं ति ॥
- [४७७] नहेव कुंचा समइक्कम्मंता , तयाणि जालाणि दलित्तु हंसा ।
पलेंति पुत्ता य पई य मज्झं , तेऽहं कहं ना नुगमिस्समेक्का ॥
- [४७८] पुरोहियं तं ससुयं सदारं , सोच्चाऽभिनिक्खम्म पहाय भोए ।
कुडुंबसारं विउलुत्तमं च , रायं अभिक्खं समुवाय देवी ॥
- [४७९] वंतासी पुरिसो रायं ! न सो होइ पसंसिओ ।

- माहणेण परिच्यत्तं , धनं आयाउमिच्छसि ॥
- [४८०] सव्वं जगं जइ तुहं , सव्वं वाऽवि ध नं भवे ।
सव्वं पि ते अपज्जत्तं , नेव ताणाय तं तव ॥
- [४८१] मरिहिसि रायं जया तया वा , मनोरमे कामगुणे पहाय ।
एक्को हु धम्ममे नरदेव ! ताणं, न विज्जई अन्नमिहेह किंचि ॥
- [४८२] नाहं रमे पक्खिणि पंजरे वा , संताणछिन्ना चरिस्सामि मो नं ।
अकिंचणा उज्जुकडा निरामिसा , परिग्गहारंभनियत्तदोसा ॥
- [४८३] दवग्गिणा जहा रण्णे , डज्जमाणेसु जं तुसु ।
अन्ने सत्ता पमोयं ति, रागदोसवसं गया ॥

अज्झयणं-१४

- [४८४] एवमेव वयं मूढा , कामभोगेसु मुच्छिया ।
डज्जमाणं न बुज्जामो , रागदोसग्गिणा जगं ॥
- [४८५] भोगे भोच्चा वमित्ता य , लहुभूयविहारिणो ।
आमोयमाणा गच्छं ति, दिया कामकमा इव ॥
- [४८६] इमे य बद्धा फं दंति, मम हत्थऽज्जमागया ।
वयं च सत्ता कामेसु , भविस्सामो जहा इमे ॥
- [४८७] सामिसं कुललं दिस्सा , बज्जमाणं निरामिसं ।
आमिसं सव्वमुज्जित्ता, विहरिस्सामो निरामिसा ॥
- [४८८] गिद्धोवमे उ नच्चाणं , कामे संसारव इढणे ।
उरगो सुवण्णपासे व्व , संकमाणो तणुं चरे ॥
- [४८९] नागो व्व बंधं नं छित्ता , अप्पणो वसहिं वए ।
एयं पत्थं महारायं ! उस्सुयारि त्ति मे सुयं ॥
- [४९०] चइत्ता विउलं रज्जं , कामभोगे य दुच्चए ।
निव्विसया निरामिसा , निन्नेहा निप्परिग्गहा ॥
- [४९१] सम्मं धम्मं वियाणित्ता , चिच्चा कामगुणे चरे ।
तवं पग्गिज्जाऽहक्खायं , घोरं घोरपरक्कमा ॥
- [४९२] एवं ते कमसो बुद्धा , सव्वे धम्मपरायणा ।
जम्ममच्चुभउव्विग्गा, दुक्खस्संतगवेसिणो ॥
- [४९३] सासणे विगयमोहाणं , पुव्विं भावणभाविया ।
अचिरेणेव कालेण , दुक्खस्संतमुवागया ॥
- [४९४] राया सह देवीए , माहणो य पुरोहिओ ।
माहणी दारगा चेव , सव्वे ते परिनिव्वुडे ॥ त्ति बेमि

• चउद्दसमं अज्झयणं सम्मत्तं •

• पन्नरसमं अज्झयणं - सभिकखुयं •

- [४९५] मोनं चरिस्सामि समिच्च धम्मं , सहिए उज्जुकडे नियाणछिन्ने ।
संथवं जहिज्ज अकामकामे , अन्नायएसी परिव्वए स भिक्खू ॥
- [४९६] राओवरयं चरेज्ज लाढे , विरए वेयवियास्सरक्खिए ।
पन्ने अभिभूय सव्वदंसी , जे कम्मिहवि न मुच्छिए स भिक्खू ॥
- [४९७] अक्कोसवहं विइत्तु धीरे , मुनी चरे लाढे निच्चमायगुत्ते ।
अव्वग्गमणे असंपहिट्ठे , जे कसिणं अहियासए स भिक्खू ॥
- [४९८] पंत सयणासणं भइत्ता , सीउण्हं विविहं च दंसमसगं ।
अव्वग्गमणे असंपहिट्ठे , जे कसिणं अहियासए स भिक्खू ॥
- [४९९] नो सक्कियमिच्छई न पूयं , नो वि य वं दणगं कुओ पसंसं ? ।

अज्झयणं-१५

- से संजए सुव्वए तवस्सी , सहिए आयगवेसए स भिक्खू ॥
- [५००] जेण पुणो जहाइ जीवियं , मोहं वा कसिणं नियच्छई ।
नरनारिं पजहे सया तवस्सी , न य कोऊहलं उवेइ स भिक्खू ॥
- [५०१] छिन्नं सरं भोमं अंत लिक्खं , सुमिणं लक्खणं दंडं वत्थुविज्जं ।
अंगवियारं सरस्स विजयं , जे विज्जाहिं न जीवइ स भिक्खू ॥
- [५०२] मंतं मूलं विविहं वेज्जचिं तं , वमनविरेयणधुमनेत्तसिणाणं ।
आउरे सरणं तिगिच्छियं च , तं परिन्नाय परिव्वए स भिक्खू ॥
- [५०३] खत्तियगण उग्गरायपुत्ता , माहणभोई य विविहा य सिप्पिणो ।
नो तेसिं वयइ सिलोगपूयं , तं परिन्नाय परिव्वए स भिक्खू ॥
- [५०४] गिहिणो जे पव्वइएण दि द्वा , अप्पवइएण व संथुया हविज्जा ।
तेसिं इहलोइयफल द्वा , जो संथवं न करेइ स भिक्खू ॥
- [५०५] सयणासणपानभोयणं , विविहं खाइमं साइमं परेसिं लद्धुं ।
अदए पडिसेहिए नियं ठे , जे तत्थ न पउस्सई स भिक्खू ॥
- [५०६] जं किंचि आहारपा नगं विविहं , खाइमसाइमं परेसिं लद्धुं ।
जो तं तिविहेण नाणुकं पे , मनवयकायसुसंवुडे स भिक्खू ॥
- [५०७] आयामगं चेव जवोदणं च , सीयं सोवीर जवोदगं च ।
नो हीलए पिं डं नीरसं तु , पंतकुलाई परिव्वए जे स भिक्खू ॥
- [५०८] सद्दा विविहा भवं ति लोए , दिव्वा माणुस्सगा तिरिच्छा ।
भीमा भयभेरवा उराला , जो सोच्चा न विहिज्जई स भिक्खू ॥
- [५०९] वादं विविहं समिच्च लोए , सहिए खेयाणुगए य कोवियप्पा ।
पन्ने अभिभूय सव्वदंसी , उवसंते अविहेडए स भिक्खू ॥
- [५१०] असिप्पजीवी अगिहे अमित्ते , जिइंदिए सव्वओ विप्पमुक्के ।
अणुक्कसाई लहुअप्पभक्खी चिच्चा गिहं एगचरे स भिक्खु ॥ त्ति बेमि

• सोलसमं अज्झयणं - बंभचेरसमाहिठाणं •

[५११] सुयं मे आउसं ! तेषं भगवया एवमक्खायं । इह खलु थेरेहिं भगवं तेहिं दस बंभचेरसमाहिठाणा पन्नत्ता, जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिंदिए गुत्तबंभयारी सया अप्पमत्ते विहरेज्जा ।

[५१२] कयरे खलु ते थेरेहिं भगवंतेहिं रदस बंभचेरसमाहिठाणा पन्नत्ता ?

जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिंदिए गुत्तबंभयारी सया अप्पमत्ते विहरेज्जा। इमे खलु ते थेरेहिं भगवं तेहिं दस बंभचेर समाहि ठाणा पन्नता , जे भिक्खू सोच्चा निसम्म संजमबहुले संवरबहुले समाहिबहुले गुत्ते गुत्तिंदिए गुत्तबंभयारी सया अप्पमत्ते विहरेज्जा ।

तं जहा विवित्ताइं सयणासणाइं सेवित्ता हवइ से निग्गं थे नो इत्थीपसुपं उग संसत्ताइं अज्झयणं-१६

सयणासणाइं सेवित्ता हवइ से निग्गं थे, तं कहमिति चे त् आयरियास्सह निग्गं थस्स खलु इत्थीपसुपं उगसंसत्ताइं सयणासणाइं सेवमाणस्स बं भयारिस्स बं भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा , उम्मायं वा पाउणिज्जा , दीहकालियं वा रोगायकं हवेज्जा , केवलिपन्नत्ताओ धम्माओ भंसेज्जा। तम्हा नो इत्थीपसुपंडगसंसत्ताइं सयणासणाइं सेवित्ता हवइ से निग्गंथे ।

[५१३] नो इत्थीणं कहं कहित्ता हवइ से निग्गं थे, तं कहमिति चे त् ? आयरियास्सह, निग्गंथस्स खलु इत्थीणं कहं कहेमाणस्स बंभयारिस्स बंभचेरे संका वा जाव धम्माओ भंसेज्जा। तम्हा नो इत्थीणं कहं कहेज्जा ।

[५१४] नो इत्थीणं सद्धिं सन्निसेज्जागए विहरित्ता हवइ से निग्गं थे। तं कहमिति चे त् ? आयरियास्सह, निग्गंथस्स खलु इत्थीहिं सद्धिं सं निसेज्जागयस्स बं भयारिस्स बं भचेरे संका वा जाव धम्माओ भंसेज्जा। तम्हा खलु नो निग्गंथे इत्थीहिं सद्धिं सन्निसेज्जागए विहरेज्जा ।

[५१५] नो इत्थीणं इंदियाइं मनोहराइं मनोरमाइं आलोइत्ता निज्झाइत्ता हवइ से निग्गंथे, तं कहमिति चे त् ? आयरियास्सह, निग्गंथस्स खलु इत्थीणं इंदियाइं मनोहराइं मनोरमाइं आलोमाणस्स निज्झायमाणस्स बंभयारिस्स बंभचेरे संका वा जाव धम्माओ भंसेज्जा। तम्हा खलु नो निग्गं थे इत्थीणं इंदियाइं मनोहराइं मनोरमाइं आलोएज्जा निज्झाएज्जा ॥

[५१६] नो निग्गंथे इत्थीणं कुड्डं तरंसि वा दूसं तरंसि वा भित्तं तरंसि वा कूइयसद्धं वा रुइयसद्धं वा गीयसद्धं वा हसियसद्धं वा थणियसद्धं वा कं दियसद्धं वा विलवियसद्धं वा सुणेत्ता हवइ से निग्गंथे, तं कहमिति चे त् ? आयरियास्सह निग्गं थस्स खलु इत्थीणं कुड्डं तरंसि वा दूसं तरंसि वा भित्तंतरंसि वा जाव विलवियसद्धं वा सुणेमाणस्स बं भयारिस्स बंभचेरे संका वा जाव धम्माओ भंसेज्जा। तम्हा खलु नो निग्गं थे इत्थीणं कुड्डंतरंसि वा जाव कंदियसद्धं वा विलवियसद्धं वा सुणेमाणे विहरेज्जा ।

[५१७] नो निग्गंथे पुव्वरयं पुव्वकीलियं अनुसरित्ता हवइ से निग्गं थे, तं कहमिति चे त् ? आयरियास्सह निग्गंथस्स खलु इत्थीणं पुव्वरयं पुव्वकीलियं अनुसरमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं

हवेज्जा, केवलिपन्नत्ताओ धम्माओ भंसेज्जा। तम्हा खलु नो निग्गं थे पुव्वरयं पुव्वकीलियं अनुसरेज्जा ।

[५१८] नो निग्गंथे पणीयं आहारं आहारित्ता हवइ से निग्गं थे, तं कहमिति चेत् ? आयरियास्सह । निग्गंथस्स खलु पणीयं आहारं आहारेमाणस्स बंभयारिस्स बंभचेरे संका वा जाव धम्माओ भंसेज्जा। तम्हा खलु नो निग्गंथे पणीयं आहारं आहारेज्जा ।

[५१९] नो अइमायाए पा नभोयणं आहारेत्ता हवइ से निग्गं थे, तं कहमिति चेत् ? आयरियास्सह। निग्गं थस्स खलु अइमायाए पा नभोयणं आहारेमाणस्स बं भयारिस्स बं भचेरे संका जाव धम्माओ भंसेज्जा। तम्हा खलु नो निग्गंथे अइमायाए पानभोयणं आहारेज्जा ।

[५२०] नो विभूसानुवादी हवइ से निग्गंथे, तं कहमिति चेत् ? आयरियास्सह, विभूसावत्तिए विभूसियसरीरे इत्थिज नस्स अभिलसणिज्जे हवइ , तओ णं तस्स इत्थिज नेणं अभिलसिज्जमाणस्स बंभयारिस्स बं भचेरे संका वा जाव भंसेज्जा। तम्हा खलु नो नीग्गं थे विभूसा नुवादी हविज्जा ।

[५२१] नो सदरूवरसगंधफासानुवादी हवइ से निग्गं थे, तं कहमिति चेत् ? आयरियास्सह, निग्गंथस्स खलु सदरूवरसगंधफासानुवादिस्स बं भयारिस्स बं भचेरे संका वा कंखा वा विइगिच्छा वा अज्झयणं-१६

समुपज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा केवलिपन्नत्ताओ धम्माओ भंसेज्जा। तम्हा खलु नो सदरूवरसगंधफासानुवादी भवेज्जा से निग्गं थे । दसमे बं भचेर-समाहिठाणे हवइ ।

[भवंति य इत्थ सिलोगा। तं जहा :-]

- [५२२] जं विवित्तमणाइण्णं , रहियं इत्थिजणेण य ।
बंभचेरस्स रक्खट्ठा , आलयं तु निसेवए ॥
- [५२३] मनपल्हायजननी, कामरागविवद्वणी ।
बंभचेरओ भिक्खू , थीकहं तु विवज्जए ॥
- [५२४] समं च संथवं थीहिं , संकहं च अभिक्खणं ।
बंभचेरओ भिक्खू , निच्चसो परिवज्जए ॥
- [५२५] अंगपच्चंगसंठाणं, चारुल्लवियपेहियं ।
बंभचेरओ थीणं , चक्खुगिज्झं विवज्जए ॥
- [५२६] कूइयं रुइयं गीयं , हसियं थणियं कंदियं ।
बंभचेरओ थीणं , सोयगिज्झं विवज्जए ॥
- [५२७] हासं कि इडं रइं दप्पं , सहसावित्तासियाणि य ।
बंभचेरओ थी णं, नानुचिंते कयाइ वि ॥
- [५२८] पणीयं भत्तपा नं तु , खिप्पं मयविवद्वणं ।
बंभचेरओ भिक्खू , निच्चसो परिवज्जए ॥
- [५२९] धम्मलद्धं मियं काले , जत्तत्थं पणिहाणवं ।
नाइमत्तं तु भुंजेज्जा , बंभचेरओ सया ॥
- [५३०] विभूसं परिवज्जेज्जा , सरीरपरिमंडनं ।
बंभचेरओ भिक्खू , सिगारत्थं न धारए ॥

- [५३१] सद्दे रुवे य गं धे य , रसे फासे तहेव य ।
पंचविहे कामगुणे , निच्चसो परिवज्जए ॥
- [५३२] आलोओ थीजणाइण्णो , थीकहा य म नोरमा ।
संथवो चेव नारीणं , तासिं इं दियदरिसणं ॥
- [५३३] कूइयं रुइयं गीयं , हासभुत्तासियाणि य ।
पणीयं भत्तपा नं च , अइमायं पा नभोयणं ॥
- [५३४] गत्तभूसणमिद्धं च , कामभोगा य दुज्जया ।
नरस्सत्तगवेसिस्स, विसं तालउडं जहा ॥
- [५३५] दुज्जए कामभोगे य , निच्चसो परिवज्जए ।
संकाठाणाणि सच्चाणि , वज्जेज्जा पणिहाणवं ॥
- [५३६] धम्मारामे चरे भिक्खू , धिइमं धम्मसारही ।
धम्मारामरते दं ते, बंभचेरसमाहिए ॥

अज्झयणं-१६

- [५३७] देवदानवगंधच्चा, जक्खरक्खसकिंनरा ।
बंभयारिं नमंसं ति, दुक्करं जे करं ति तं ॥
- [५३८] एस धम्मे धुवे निच्चे , सासए जि नदेसिए ।
सिद्धा सिज्जंति चाणेणं, सिज्झिस्संति तहावरे ॥ त्ति बेमि

• सोलसमं अज्झयणं सम्मत्तं •

• सत्तरसमं अज्झयणं - पावसमणिज्जं •

- [५३९] जे केइ उ पव्वइए नियं ठे, धम्मं सुणित्ता वि नओववन्ने ।
सुदुल्लहं लहिउं बोहिलामं , विहरेज्ज पच्छा य जहासुहं तु ॥
- [५४०] सेज्जा दढा पाउरणं मि अत्थि , उप्पज्जई भोत्तु तहेव पाउं ।
जाणामि जं वट्टइ आउसु त्ति! किं नाम काहामि सुएण ? भंते! ॥
- [५४१] जे केई उ पव्वइए, निद्धासीले पगामसो ।
भोच्चा पेच्चा सुहं सुवइ , पावसमणि त्ति वुच्चई ॥
- [५४२] आयरियउवज्झाएहिं, सुयं वि नयं च गाहिए ।
ते चेव खिंसई बाले , पावसमणि त्ति वुच्चई ॥
- [५४३] आयरियउवज्झायाणं, सम्मं नो पडितप्पइ ।
अप्पडिपूयए थद्धे , पावसमणि त्ति वुच्चई ॥
- [५४४] संमद्धमाणे पाणाणि , बीयाणि हरियाणि य ।
असंजए संजय मन्नमाणो, पावसमणि त्ति वुच्चई ॥
- [५४५] संथारं फलगं पीढं , निसेज्जं पायकं बलं ।
अप्पमज्जियमारुहइ, पावसमणि त्ति वुच्चई ॥
- [५४६] दवदवस्स चरई , पमत्ते य अभिक्खणं ।

- उल्लंघणे य चं डे य , पावसमणि त्ति वुच्चई ॥
 [५४७] पडिलेहेइ पमत्ते , अवउज्झइ पायकं बलं ।
 पडिलेहा अ नाउत्ते, पावसमणि त्ति वुच्चई ॥
 [५४८] पडिलेहेइ पमत्ते , से किंचि हु निसामिया ।
 गुरुं पारिभावए निच्चं , पावसमणि त्ति वुच्चई ॥
 [५४९] बहुमाई पमुहरे , थद्धे लुद्धे अ निग्गहे ।
 असंविभागी अ चियत्ते, पावसमणि त्ति वुच्चई ॥
 [५५०] विवादं च उदीरेइ , अहम्मं अत्तपन्नहा ।
 वुग्गहे कलहे रत्ते , पावसमणि त्ति वुच्चई ॥
 [५५१] अथिरासने कुक्कुइए , जत्थ तत्थ निसीयई ।
 आसणंमि अ नाउत्ते, पावसमणि त्ति वु च्चई ॥
 [५५२] ससरक्खपाए सुवई , सेज्जं न पडिलेहइ ।

अज्झयणं-१७

- संथारए अ नाउत्ते, पावसमणि त्ति वुच्चई ॥
 [५५३] दुद्ध-दही-विगईओ, आहारेई अभिक्खणं ।
 अरए य तवोकम्मं , पावसमणि त्ति वुच्चई ॥
 [५५४] अत्थंतंमि य सुरं मि, आहारेई अभिक्खणं ।
 चोइओ पडिचोएइ , पावसमणि त्ति वुच्चई ॥
 [५५५] आयरियपरिच्चाई, परपासंडसेवए ।
 गाणंगणिए दुब्भूए , पावसमणि त्ति वुच्चई ॥
 [५५६] सयं गेहं परिच्चज्ज , परगेहंसि वावरे ।
 निमित्तेण य ववहरइ , पावसमणि त्ति वुच्चई ॥
 [५५७] संनाइपिंड जेमेइ , नेच्छई सामुदा नियं ।
 गिहिनिसेज्जं च वाहेइ , पावसमणि त्ति वुच्चई ॥
 [५५८] एयारिसे पंचकुसीलसंवुडे , रूवंधरे मु निपवराण हे द्विमे ।
 अयंसि लोए विसमे व गरहिए , न से इहं नेव प रत्थ लोए ॥
 [५५९] जे वज्ज एए सया उ दोसे , से सुव्वए होइ मुणीण मज्झे ।
 अयंसि लोए अमयं व पूइए , आराहए दुहओ लोगमिणं ॥ त्ति बेमि

• सत्तरसमं अज्झयणं सम्मत्तं •

• अट्टारसमं अज्झयणं - 'संजइज्जं' •

- [५६०] कंपिल्ले नयरे राया , ऊदिण्णबलवाहणे ।
 नामेणं संज ओ नामं , मिगव्वं उव निग्गए ॥
 [५६१] हयाणीए गयाणीए , रहाणीए तहवे य ।
 पायत्ताणीए महया , सव्वओ परिवारिए ॥

- [५६२] मिए छुहित्ता हयगओ , कंपिल्लुज्जाण केसरे ।
भीए सं ते मिए तत्थ , वहेइ रसमुच्छिए ॥
- [५६३] अह केसरं मि उज्जाणे , अनगारे तवोध ने ।
सज्झायज्झाणसंजुत्ते, धम्मज्झाणं झियायइ ॥
- [५६४] अप्फोवमंडवंमि, झायई झावियासवे ।
तस्सागए मिगे पासं , वहेइ से नराहिवे ॥
- [५६५] अह आसगओ राया , खिप्पमागम्म सो तहिं ।
हए मिए उ पासित्ता , अनगारं तत्थ पासई ॥
- [५६६] अह राया तत्थ संभं तो, अनगारो म णाऽऽहओ ।
मए उ मं दपुण्णेणं, रसगिद्धेण घित्तुणा ॥
- [५६७] आसं विसज्जइत्ताणं , अनगारस्स सो निवो ।
विनएण वं दए पाए , भगवं! एत्थ मे खमे ॥

अज्झयणं-१८

- [५६८] अह मोणेण सो भगवं , अनगारो झाण मस्सिओ ।
रायाणं न पडिमं तेइ, तओ राया भयद्दुओ ॥
- [५६९] संजओ अहम स्सीति, भगवं वाहराहि मे ।
कुद्धे तेएण अ नगारे, डहेज्ज नरकोडिओ ॥
- [५७०] अभओ पत्थिवा ! तुब्भं , अभयदाया भवाहि य ।
अनिच्चे जीवलोगं मि, किं हिंसाए पसज्जसि ? ॥
- [५७१] जया सव्वं परिचज्ज , गंतव्वमवसस्स ते ।
अनिच्चे जीवलोगं मि, किं रज्जं मि पसज्जसि ॥
- [५७२] जीवियं चेव रूवं च , विज्जुसंपायचंचलं ।
जत्थ तं मुज्झसि रायं ! पेच्चत्थं नावबुज्झसे ॥
- [५७३] दाराणि य सुया चेव , मित्ता य तह बं धवा ।
जीवंतमनुजीवंति, मयं नाणुव्वयं ति य ॥
- [५७४] नीहरंति मयं पुत्ता , पितरं परमदुक्खिया ।
पितरो वि तहा पुत्ते , बंधू रायं तवं चरे ॥
- [५७५] तओ तेण ऽज्जिए दव्वे , दारे य परिरक्खिए ।
कीलंतऽन्ने नरा रायं , हट्टतुट्टमलंकिया ॥
- [५७६] तेणावि जं कयं कम्मं , सुहं वा जइ वा दुहं ।
कम्ममुणा तेण संजुत्तो , गच्छई उ परं भवं ॥
- [५७७] सोऊण तस्स सो धम्मं , अनगारस्स, अंतिए ।
महया संवेगनिव्वेदं , समावन्नो नराहिवो ॥
- [५७८] संजओ चइउं रज्जं , निक्खंतो जि नसासने ।
गद्धभालिस्स भगवओ , अनगारस्स अं तिए ॥

- [५७९] चिच्चा रढं पव्वइए , खत्तिओ परिभासइ ।
जहा ते दीसई रूवं , पसन्नं ते तहा मणो ॥
- [५८०] किं नामे किं गोत्ते , कस्सट्ठाए व माहणे ? ।
कहं पडियरसी बुद्धे ? कहं वि नीए त्ति वुच्चसि ? ॥
- [५८१] संजओ नाम नामेणं , तहा गोत्तेण गोयमो ।
गद्धभाली ममायरिया , विज्जाचरणपारगा ॥
- [५८२] किरियं अकिरियं वि नयं, अन्नाणं च महामु नी ।
एएहिं चउहिं ठाणेहिं , मेयन्ने किं पभासई ? ॥
- [५८३] इइ पाउकरे बुद्धे , नायए परि निव्वुए ।
विज्जाचरण संपन्ने , सच्चे सच्चपरक्कमे ॥
- [५८४] पडंति नरए घोरे , जे नरा पावकारिणो ।
दिव्वं च गइं गच्छं ति, चरित्ता धम्ममारियं ॥

अज्झयणं-१८

- [५८५] मायाबुइयमेयं तु , मुसा भासा निरत्थिया ।
संजममाणोऽवि अहं , वसामि इरियामि य ॥
- [५८६] सव्वेए विइया मज्झं , मिच्छादिट्ठी अ नारिया ।
विज्जमाणे परे लोए , सम्मं जाणामि अप्पयं ॥
- [५८७] अहमासि महापाणे , जुइमं वरिससओवमे ।
जा सा पालि महापाली, दिव्वा वरिससओवमा ॥
- [५८८] से चुए बं भलोगाओ, मानुस्सं भवमागए ।
अप्पणो य परेसिं च , आउं जाणे जहा तहा ॥
- [५८९] नाणा रुइं च छं दं च , परिवज्जेज्ज संज ओ ।
अणट्ठा जे य सव्वत्था , इइ विज्जाम नुसंचरे ॥
- [५९०] पडिक्कमामि पसिणाणं , परमंतेहि वा पुणो ।
अहो उ द्विए अहोरायं , इइ विज्जा तवं चरे ॥
- [५९१] जं च मे पुच्छसी काले , सम्मं सुद्धेण चेषसा ।
ताइं पाउकरे बुद्धे , तं नाणं जि नसासने ॥
- [५९२] किरियं च रोयई धीरे , किरियं परिवज्जए ।
दिट्ठीए दि ट्ठीसंपन्ने, धम्मं चर सुदुच्चरं ॥
- [५९३] एयं पुण्णपयं सोच्चा , अत्थधम्मोवसोहियं ।
भरहोऽवि भारहं वासं , चिच्चा कामाइ पव्वए ॥
- [५९४] सगरोऽवि सागरं तं, भरहवासं नराहिवो ।
इस्सरियं केवलं हिच्चा , दयाइ परिनिव्वुडे ॥
- [५९५] चइत्ता भारहं वासं , चक्कवट्ठी महि इट्ठिओ ।
पव्वज्जमब्भुवगओ, मघवं नाम महाजसो ॥

- [५९६] सणकुमारो मणुस्सिं दो, चक्कवट्टी महि इडिओ ।
पुत्तं रज्जे ठवेऊणं , सोऽवि राया तवं चरे ॥
- [५९७] चइत्ता भारहं वासं , चक्कवट्टी महि इडिओ ।
संती सं तिकरे लोए , पत्तो गइम नुत्तरं ॥
- [५९८] इक्खागरायवसभो, कुंथू नाम नरीसरो ।
विक्खायकित्ती भगवं , मुखं गओ अनु त्तरं ॥
- [५९९] सागरंत जहित्ताणं, भरहं नरवरीसरो ।
अहो य अरयं पत्तो , पत्तो गइम नुत्तरं ॥
- [६००] चइत्ता भारहं वासं , चक्कवट्टी महिइडिओ ।
चइत्ता उत्तमे भोए , महापउमे दमं चरे ॥
- [६०१] एगच्छत्तं पसाहित्ता , महिं मा ननिसूरणो ।
हरिसेनो म नुस्सिंदो, पत्तो गइम नुत्तरं ॥

अज्झयणं-१८

- [६०२] अन्निओ रायसहस्सेहिं , सुपरिच्चाई दमं चरे ।
जयनामो जि नक्खायं, पत्तो गइम नुत्तरं ॥
- [६०३] दसण्णरज्जं मुदियं , चइत्ताणं मु नी चरे ।
दसण्णभद्धो निक्खं तो, सक्खं सक्केण चोइओ ॥
- [६०४] नमी नमेइ अप्पाणं , सक्खं सक्केण चोइओ ।
चइऊण गेहं वइदेही , सामण्णे पज्जुव ड्ढिओ ॥
- [६०५] करकंडू कलिंगेसु , पंचालेसु य दुम्महो ।
नमी राया विदेहेसु , गंधारेसु य नग्गई ॥
- [६०६] एए न रिंदवसभा, निक्खंता जि नसासने ।
पुत्ते रज्जे ठवेऊणं , सामण्णे पज्जुव ड्ढिया ॥
- [६०७] सोवीररायवसभो, चइत्ताण मु नी चरे ।
उद्दायणो पव्वइओ , पत्तो गइम नुत्तरं ॥
- [६०८] तहेव कासीराया वि सेओ सच्चपरक्कमो ।
कामभोगे परिच्चज्ज , पहणे कम्ममहाव नं ॥
- [६०९] तहेव विजओ राया , अणद्धा कित्ति पव्वए ।
रज्जं तु गुणसमिद्धं , पयहित्तु महाजसो ॥
- [६१०] तहेवुग्गं तवं किच्चा , अक्खित्तेण चयसा ।
महब्बलो रायरिसी , आदाय सिरसा सिरिं ॥
- [६११] कहं धीरो अहेऊहिं , उम्मत्तो व महिं चरे ? ।
एए विसेसमादाय , सूरा दढपरक्कमा ॥
- [६१२] अच्चंतनियाणखमा, सच्चा मे भासिया वई ।
अतरिंसु तरं तेगे तरिस्सं ति अ नागया ॥

[६१३] कहं धीरे अहेऊहिं , अत्ताणं परियावसे ।
 सव्वसंगविनिम्मुक्के, सिद्धे भवइ नीरए ॥ त्ति बेमि
 • अट्टारसमं अज्झयणं सम्मत्तं •

• एगुणवीसइमं अज्झयणं - मियापुत्तिज्जं •

[६१४] सुग्गीवे नयरे रम्मे , काननुज्जाणसोहिए ।
 राया बलभद्धि त्ति , मिया तस्स ऽग्गमाहिंसी ॥
 [६१५] तेसिं पुत्ते बलसिरी , मियापुत्ते त्ति विस्सुए ।
 अम्मापिऊण दइए , जुवराया दमीसरे ॥
 [६१६] नंदने सो उ पासाए , कीलए सह इत्थिहिं ।
 देवे दोगुं दगे चेव , निच्चं मुइयमा नसो ॥
 [६१७] मणिरयणकोट्टिमतले, पासायालयणद्धिओ ।

अज्झयणं-१९

आलोएइ नगरस्स , चउक्कत्तियचच्चरे ॥
 [६१८] अह तत्थ अइच्छं तं, पासई समणसंजयं ।
 तवनियमसंजमधरं, सीलइडं गुणआगरं ॥
 [६१९] तं पेहई मियापुत्ते , दिट्ठीए, अनिमिसाए उ ।
 कहिं मन्नेरिसं रूवं , दिट्ठपुव्वं मए पुरा ॥
 [६२०] साहुस्स दरिसणे तस्स , अज्झवसाणंमि सोहणे ।
 मोहं गयस्स सं तस्स, जाईसरणं समुप्पन्नं ॥
 [६२१] देवलोग चुओ संतो मानुसं भवमागओ ।
 सण्णिनाणे समुप्पन्ने जाइं सरइपुराणयं ॥
 [६२२] जाईसरणे समुप्पन्ने , मियापुत्ते महि इट्ठिए ।
 सरई पौराणियं जाइं , सामण्णं च पुरा कयं ॥
 [६२३] विसएसु अरज्जं तो, रज्जंतो संजमं मि य ।
 अम्मापियरं उ वागम्म, इमं वयणमब्बवी ॥
 [६२४] सुयाणि मे पंच महव्वयाणि ।
 नरएसु दुक्खं च तिरिक्खजोणिसु ।
 निट्ठिण्णकामो मि महण्णवाओ ।
 अणुजाणह पव्वइस्सामि अम्मो ॥
 [६२५] अम्मताय! मए भोगा , भुत्ता विसफलोवमा ।
 पच्छा कडुयविवागा , अनुबंधदुहावहा ॥
 [६२६] इमं सरीरं अ निच्चं, असुइं असुइसंभवं ।
 असासयावासमिणं, दुक्खकेसाण भायणं ॥
 [६२७] असासए सरीरं मि, रइं नोवलभामहं ।

- पच्छा पुरा व चइयव्वे , फेणबुब्बुयसंनिभे ॥
[६२८] मानुस्सित्ते असारं मि, वाहीरोगाण आलए ।
 जरामरघत्थंमि, खणंपि न रमाम sहं ॥
[६२९] जम्म दुक्खं जरा दुक्खं , रोगाणि मरणाणि य ।
 अ हो दुक्खो हु संसारो , जत्थ कीसं ति जं तवो ॥
[६३०] खेत्तं वत्थुं हिरण्णं च , पुत्तदारं च बं धवा ।
 चइत्ताणं इमं देहं , गंतव्वमवसस्स मे ॥
[६३१] जहा किं पागफलाणं, परिणामो न सुं दरो ।
 एवं भुत्ताणं भोगाणं , परिणामो न सुं दरो ॥
[६३२] अद्दाणं जो महंतं तु , अप्पहेज्जो पवज्जई ।
 गच्छंतो सो दुही होइ , छुहातण्हाए पीडिओ ॥
[६३३] एवं धम्मं अकाऊणं , जो गच्छइ परं भवं ।

अज्झयणं-१९

- गच्छंतो सो दुही होइ , वाही रोगेहिं पीडिओ ॥
[६३४] अद्दाणं जो महंतं तु , सपाहेज्जो पवज्जई ।
 गच्छंतो सो सुही होइ , छुहातण्हाविवज्जिओ ॥
[६३५] एवं धम्मं पि काऊणं , जो गच्छइ परं भवं ।
 गच्छंतो सो सुही होइ , अप्पकम्ममे अवेयणे ॥
[६३६] जहा गेहे पलित्तं मि, तस्स गेहस्स जो पहू ।
 सारभंडाणि नीणेइ , असारं अवउज्झइ ॥
[६३७] एवं लोए पलित्तं मि, जराए मरणेण य ।
 अप्पाणं तारइस्सामि , तुब्भेहिं अणुमन्निओ ॥
[६३८] तं बिं तस्ममापियरो, सामण्णं पुत्त ! दुच्चरं ।
 गुणाणं तु सहस्साइं , धारेयव्वाइं भिक्खुणो ॥
[६३९] समया सव्वभूएसु , सत्तुमित्तेसु वा जगे ।
 पाणाइवायविरई, जावज्जीवाए दुक्करं ॥
[६४०] निच्चकालप्पमत्तेणं, मुसावायविवज्जणं ।
 भासियव्वं हियं सच्चं , निच्चाउत्तेण दुक्करं ॥
[६४१] दंतसोहणमाइस्स, अदत्तस्स, विवज्जणं ।
 अणवच्चेसणिज्जस्स, गिण्हाणा अवि दुक्करं ॥
[६४२] विरई अबं भचेरस्स, कामभोगरसन्नुणा ।
 उग्गं महव्वयं , बंभं, धारेयव्वं सुदुक्करं ॥
[६४३] धणधन्नपेसवग्गेसु, परिग्गहविवज्जणं ।
 सव्वारंभपरिच्चाओ, निम्ममत्तं सुदुक्करं ॥
[६४४] चउत्विहे वि आहारे , राईभोयणवज्जणा ।

- सन्निहीसंचओ चेव , वज्जेयव्वो सुदुक्करं ॥
 [६४५] छुहा तण्हा य सीउण्हं , दंसमसगा य वेयणा ।
 अक्कोसा दुक्खसेज्जा य , तण्हासा जल्लमेव य ॥
 [६४६] तालणा तज्जणा चेव , वहबंधपरीसहा ।
 दुक्खं भिक्खायरिया , जायणा य अलाभया ॥
 [६४७] कावोया जा इमा वित्ती , केसलोओ य दारुणो ।
 दुक्खं बंधव्वयं घोरं , धारेउं य महप्पणो ॥
 [६४८] सुहोइओ तुमं पुत्ता ! सुकुमालो सुमज्जिओ ।
 न हुसी पभू तुमं पुत्ता ! सामण्णमनुपालिया ॥
 [६४९] जावज्जीवमविस्सामो, गुणाणं तु महब्भरो ।
 गुरुओ लोहभारु व्व , जो पुत्ता होइ दुव्वहो ॥
 [६५०] आगासे गंगसोउ व्व , पडिसोउ व्व दुत्तरो ।

अज्झयणं-१९

- बाहाहिं सागरो चेव , तरियव्वो य गुणोदही ॥
 [६५१] वालुयाकवलो चेव , निरस्साए उ संजमे ।
 असिधारागमनं चेव , दुक्करं चरिउं तवो ॥
 [६५२] अहीं वेगं तदिट्ठीए, चरित्ते पुत्त ! दुक्करे ।
 जवा लोहमया चेव , चावेयव्वा सुदुक्करं ॥
 [६५३] जहा अग्गिसिहा दित्ता , पाउं होइ सुदुक्करा ।
 तहा दुक्करं करेउं जे , तारूण्णे समणत्तणं ॥
 [६५४] जहा दुक्खं भरेउं जे , होइ वायस्स कोत्थलो ।
 तहा दुक्खं करेउं जे , कीवेणं समणत्तणं ॥
 [६५५] जहा तुलाए तोलेउं , दुक्करो मं दरो गिरी ।
 तहा निहुयं नीसंकं , दुक्करं समणत्तणं ॥
 [६५६] जहा भुयाहिं तरिउं , दुक्करं रयणायरो ।
 तहा अ नुवसंतेणं, दुक्करं दमसागरो ॥
 [६५७] भुंज माणुस्सए भोगे , पंचलक्खणए तुमं ।
 भुत्तभोगी तओ जाया ! पच्छा धम्मं चरिस्ससि ॥
 [६५८] सो बिंतस्समापियरो , एवमेयं जहा फुडं ।
 इह लोए निप्पिवासस्स , नत्थि किंचि वि दुक्करं ॥
 [६५९] सारीरमानसा चेव , वेयणाओ अनं तओ ।
 मए सोढाओ भीमाओ , असइं दुक्खभयाणि य ॥
 [६६०] जरामरणकांतारे, चाउरंते भयागरे ।
 मए सोढाणि भीमाणि , जम्माणि मरणाणि य ॥
 [६६१] जहा इहं अग नी उण्हो , एत्तोऽनंतगुणो तहिं ।

	नरएसु वेयणा उण्हा ,	अस्साया वेइया मया ॥	
[६६२]	जहा इमं इहं सीयं ,	एत्तोऽनंतगुणो तहिं	
	नरएसु वेयणा सीया ,	अस्साया वेइया मए ॥	
[६६३]	कंदंतो कंदुकुं भीसु,	उद्धपाओ अहोसिरो	
	हुयासणे जलं तंमि,	पक्कपुव्वो अ नंतसो ॥	
[६६४]	महादवग्गिसंकासे,	मरुंमि वइरवालुए	
	कलंबवालुयाए य ,	दइढपुव्वो अ नंतसो ॥	
[६६५]	रसंतो कंदुकुं भीसु,	उड्ढं बद्धो अबं धवो	
	करवत्तकरकयाईहिं,	छिन्नपुव्वो अ नंतसो ॥	
[६६६]	अइतिकखकंटगाइण्णे,	तुंगे सिं बलिपायवे	
	खेवियं पास बद्धेणं,	कड्ढोकड्ढाहिं दुक्करं ॥	
[६६७]	महाजंतोसु उच्छू वा ,	आरसंतो सुभेरवं	

अज्झयणं-१९

	पीडिओ मि सकम्मैहिं ,	पावकम्मो अ नंतसो ॥	
[६६८]	कूवंतो कोलसुणएहिं ,	सामेहिं सबलेहि य	
	पा डिओ फालिओ छिन्नो ,	विप्फुरंतो अ नेगसो ॥	
[६६९]	असीहिं अयसिवण्णाहिं ,	भल्लेहिं पट्टिसेहि य	
	छिन्नो भिन्नो विभिन्नो य ,	ओइण्णो पावकम्मुणा ॥	
[६७०]	अवसो लोहरहे जुत्तो ,	जलंते समिलाजुए	
	चोइओ तोत्तजुत्तेहिं ,	रोज्झो वा जह पाडिओ ॥	
[६७१]	हुयासणे जलं तंमि,	चियासु महिसो विव	
	दइढो पक्को य अवसो ,	पावकम्मैहिं पाविओ ॥	
[६७२]	बला संडासतुं डेहिं,	लोहतुंडेहिं पक्खिहिं	
	विलुतो विलवं तोऽहं,	ढंकगिद्धेहिंऽनंतसो ॥	
[६७३]	तण्हाकिलंतो धावं तो,	पत्तो वेयरिणिं नदिं	
	जलं पाहिं ति चिं तंतो,	खुरधाराहिं विवाइओ ॥	
[६७४]	उण्हाभितत्तो संपत्तो ,	असिपत्तं महाव नं	
	असिपत्तेहिं पडं तेहिं,	छिन्नपुव्वो अ नेगसो ॥	
[६७५]	मुग्गरेहिं मुसंडीहिं ,	सूलेहिं मुसलेहिं य	
	गया संभग्गगत्तेहिं ,	पत्तं दुक्खं अनंतसो ॥	
[६७६]	खुरेहिं तिक्खधारेहिं ,	छुरियाहिं कप्पणीहि य	
	कप्पिओ फालिओ छिन्नो ,	उक्कित्तो य अ नेगसो ॥	
[६७७]	पासेहिं कूडजालेहिं ,	मिओ वा अवसो अहं	
	वाहिओ बद्धरुद्धो वा ,	बहू सो चेव विवाइओ ॥	
[६७८]	गलेहिं मगरजालेहिं ,	मच्छो वा अवसो अहं	

- उल्लिओ फालिओ गहिओ , मारिओ य अ नंतसो ॥
[६७९] वीदंसएहिं जालेहिं , लेप्पाहिं सउणो विव ।
 गहिओ लग्गो बद्धो य , मारिओ य अ नंतसो ॥
[६८०] कुहाडफरसुमाईहिं, वड्ढईहिं दुमो विव ।
 कुट्टिओ फालिओ छिन्नो , तच्छिओ य अ नंतसो ॥
[६८१] चवेडमुट्टिमाईहिं, कुमारेहिं अयं पिव ।
 ताडिओ कुट्टिओ भिन्नो , चुण्णिओ य अ नंतसो ॥
[६८२] तत्ताइं तं बलोहाइं, तउयाइं सीसयाणि य ।
 पाइओ कलकलं ताइं, आरसंतो सुभेरवं ॥
[६८३] तुहं पियाइं मंसाइं, खंडाइं सोल्लगाणि य ।
 खाइओ मि समंसाइं , अग्गिवण्णाइऽनेगसो ॥
[६८४] तुहं पिया सुरा सीहू , मेरओ य महूणि य ।

अज्झयणं-१९

- पाइओ मि जलं तीओ, वसाओ रुहिराणि य ॥
[६८५] निच्चं भीएण तत्थे ण, दुहिएण वहिएण य ।
 परमा दुहसंबद्धा , वेयणा वेइया मए ॥
[६८६] तिच्चं चंडप्पगाढाओ, घोराओ अइदुस्सहा ।
 महब्भयाओ भीमाओ , नरएसु वेइया मए ॥
[६८७] जारिसा मा नुसे लोए , ताया! दीसं ति वेयणा ।
 एत्तो अ नंतगुणिया, नरएसु दुक्खवेयणा ॥
[६८८] सव्वभवेसु अस्साया , वेयणा वेइया मए ।
 निमेसंतरमित्तंपि, जं साया नत्थि वेयणा ॥
[६८९] तं बिं तऽम्मापियरो, छंदेणं पुत्त ! पव्वया ।
 नवरं पुण सामण्णे , दुक्खं निप्पडिकम्मया ॥
[६९०] सो बेइ अम्मापियरो , एवमेयं जहा फुडं ।
 पडिकम्मं को कुणई , अरण्णे मियपक्खिणं ? ॥
[६९१] एगब्भूए अरण्णे वा , जहा उ चरई मिगे ।
 एवं धम्मं चरिस्सामि , संजमेण तवेण य ॥
[६९२] जहा मिगस्स आयंको , महारण्णंमि जायई ।
 अच्चंत रुक्खमूलं मि, को णं ताहे चिगिच्छई ॥
[६९३] को वा से ओसहं देइ , को वा से पुच्छई सुहं ।
 को से भत्तं च पा नं वा , आहरित्तु पणामए ? ॥
[६९४] जया य से सुही होइ , तया गच्छइ गोयरं ।
 भत्तपानस्स अ द्वाए, वल्लराणि सराणि य ॥
[६९५] खाइत्ता पाणियं पाउं , वल्लरेहिं सरेहिं य ।

- मिगचारियं चरित्ताणं , गच्छई मिगचारियं ॥
 [६९६] एवं समुद्धि ए भिक्खु , एवमेव अ नेगए ।
 मिगचारियं चरित्ताणं , उइढं पक्कमई दिसं ॥
 [६९७] जहा मिए एग अ नेगचारी अनेगवासे धुवगोयरे य ।
 एवं मुनी गोयरियं पविट्ठे ।
 नो हीलए नो वि य खिंसएज्जा ॥
 [६९८] मिगचारियं चरिस्सामि , एवं पुत्ता जहासुहं ।
 अम्मपिऊहिंसणुन्नाओ, जहाइ उवहिं तथा ॥
 [६९९] मिगचारियं चरिस्सामि , सव्वदुक्खविमोक्खणिं ।
 तुब्भेहिं अं ब! अ ऽणुन्नाओ, गच्छ पुत्त ! जहासुहं ॥
 [७००] एवं सो अम्मपियरो , अनुमाणित्ताण बहुविहं ।
 ममत्तं छिं दई ताहे , महानागो व्व कंचुयं ॥

अज्झयणं-१९

- [७०१] इड्ढी वित्तं च मित्ते य , पुत्तदारं च नायओ ।
 रेणुयं व पडे लग्गं , निद्धणित्ताण निग्गओ ॥
 [७०२] पंचमहव्वयजुत्तो, पंचसमिओ तिगुत्तिगुत्तो व ।
 सब्भिंतरबाहिरओ, तवोकम्मंसि उज्जुओ ॥
 [७०३] निम्ममो निरहंकारो , निस्संगो चत्तगारवो ।
 समो य सव्वभूएसु , तसेसु थावरेसु य ॥
 [७०४] लाभालाभे सुहे दुक्खे , जीविए मरणे तथा ।
 समो निं दापसंसासु, तथा मा नावमानओ ॥
 [७०५] गारवेसु कसाएसु , दंडसल्लभएसु य ।
 नियत्तो हाससोगाओ , अनियाणो अबं धणो ॥
 [७०६] अनिस्सिओ इहं लोए , परलोए अ निस्सिओ ।
 वासीचंदनकप्पो य , असने अ नसने तथा ॥
 [७०७] अप्पसत्थेहिं दारेहिं , सव्वओ पिहियासवे ।
 अज्झप्पज्झाणजोगेहिं, पसत्थदमसासने ॥
 [७०८] एवं नाणेण चरणेण , दंसणेण तवेण य ।
 भावनाहि य सुद्धाहिं , सम्मं भावेत्तु अप्पयं ॥
 [७०९] बहुयाणि उ वासाणि , सामण्णमनुपालिया ।
 मासिएण उ भत्तेण , सिद्धिं पत्तो अ नुत्तरं ॥
 [७१०] एवं करं ति संबुद्धा , पंडिया पवियक्खणा ।
 विणियट्ठंति भोगेसु , मियापुत्ते जहा रिसी ॥
 [७११] महापभावस्स महाजसस्स मियाइ पुत्तस्स निसम्म भासियं ।

।

- तवप्पहाणं चरियं च उत्तमं गइप्पहाणं च तिलोगविस्सुतं ॥
 [७१२] वियाणिया दुक्खविवद्धणं धणं ममत्तबधं च महाभयावहं ।
 सुहावहं धम्मधुरं अनुत्तरं धारेज्ज निव्वाणगुणावहं महं ॥ त्ति बेमि
 • एगूणवीसइमं अज्झयणं सम्मत्तं •

• विंसइमं अज्झयणं - महानियंठिज्जं •

- [७१३] सिद्धाणं नमो किच्चा , संजयाणं च भावओ ।
 अत्थधम्मगइं तच्चं , अनुसिट्ठिं सुणेह मे ॥
 [७१४] पभूयरयणो राया , सेणिओ मगहाहिवो ।
 विहारजत्तं निज्जाओ , मंडिकुच्छंसि चेइए ॥
 [७१५] नानादुमलयाइण्णं, नानापक्खिनिसेवियं ।
 नानाकुसुमसंछन्नं, उज्जाणं नं दनोवमं ॥
 [७१६] तत्थ सो पासई साहुं , संजयं सुसमाहियं ।

अज्झयणं-२०

- निसन्नं रुक्खमूलं मि, सुकुमालं सुहोइयं ॥
 [७१७] तस्स रूवं तु पासित्ता , राइणो तं मि संजए ।
 अच्चंतपरमो आसी , अउलो रूवविम्हओ ॥
 [७१८] अहो वण्णो अहो रूवं , अहो अज्जस्स सोमया ।
 अ हो खं ती अहो मुत्ती , अहो भोगे असंगया ॥
 [७१९] तस्स पाए उ वं दित्ता, काऊण य पयाहिणं ।
 नाइदूरमणासन्ने, पंजली पडिपुच्छई ॥
 [७२०] तरुणोऽसि अज्जो ! पव्वइओ , भोगकालंमि संजया ।
 उवट्ठिओऽसि सामण्णे , एयमट्ठं सुणेमि ता ॥
 [७२१] अनाहो मि महारायं ! नाहो मज्झ न विज्जई ।
 अनु कंपगं सुहिं वावि , कंचि नाभिसमेमहं ॥
 [७२२] तओ सो पहसिओ राया , सेणिओ मगहाहिवो ।
 एवं ते इ इट्ठिमंतस्स, कहं नाहो न विज्जई ? ॥
 [७२३] होमि नाहो भयंताणं , भोगे भुंजाहि संजया ! ।
 मित्तनाईपरिवुडो, मानुस्सं खु सुदुल्लहं ॥
 [७२४] अप्पणा वि अ नाहोऽसि, सेणिया! मगहाहिवा ।
 अप्पणा अ नाहो सं तो, कस्स नाहो भविस्ससि ? ॥
 [७२५] एवं वुत्तो नरिं दो सो , सुसंभंतो सुविम्हिओ ।
 वयणं अस्सुयपुव्वं , साहुणा विम्हयं नि ओ ॥
 [७२६] अस्सा हत्थी म नुस्सा मे , पुरं अं तेउरं च मे ।
 भुंजामि मा नुसे भोगे , आणा इस्सरियं च मे ॥

- [७२७] एरिसे सं पयग्गंमि, सव्वकामसमप्पिए ।
कहं अणाहो भवइ ? मा हु भं ते! मुसं वए ॥
- [७२८] न तुमं जाणे अ नाहस्स, अत्थं पोत्थं च पत्थिवा ।
जहा अ नाहो भवई , सनाहो वा नराहिव ! ॥
- [७२९] सुणेह मे महाराय ! अव्वक्खित्तेण चयसा ।
जहा अ नाहो भवई , जहा मेयं पवत्तियं ॥
- [७३०] कोसंबी नाम नयरी , पुराण पुरभेयणी ।
तत्थ आसी पिया मज्झं पभूयधनसंचओ ॥
- [७३१] पढमे वए महारायं ! अउला मे अच्छिवेयणा ।
अहोत्था विउलो दाहो , सव्वगत्तेसु पत्थिवा ॥
- [७३२] सत्थं जहा परमतिक्खं , सरीरविवरंतरे ।
आवीलिज्ज अरी कुद्धो , एवं मे अच्छिवेयणा ॥
- [७३३] तियं मे अं तरिच्छं च , उत्तमंगं च पीडई ।

अज्झयणं-२०

- इंदासणिसमा घोरा , वेयणा परमदारुणा ॥
- [७३४] उवट्टिया मे आयरिया , विज्जामंततिगिच्छगा ।
अबीया सत्थकुसला , मंतमूलविसारया ॥
- [७३५] ते मे तिगिच्छं कुव्वं ति, चाउप्पायं जहाहियं ।
न य दुक्खा विमोयं ति, एसा मज्झ अ नाहया ॥
- [७३६] पिया मे सव्वसारंपि , दिज्जाहि मम कारणा ।
य दुक्खा विमोएइ , एसा मज्झ अ नाहया ॥
- [७३७] माया वि मे महाराय ! पुत्तसोगदुहट्टिया ।
न य दुक्खा विमोएइ , एसा मज्झ अ नाहया ॥
- [७३८] भायरो मे महाराय ! सगा जेडुक निडुगा ।
न य दुक्खा विमोयं ति, एसा मज्झ अ नाहया ॥
- [७३९] भइणीओ मे महाराय ! सगा जेडुक निडुगा ।
न य दुक्खा विमोयं ति, एसा मज्झ अ नाहया ॥
- [७४०] भारिया मे महाराय ! अनुरत्ता अणुव्वया ।
अंसुपुण्णेहिं नय नेहिं, उरं में परिसिंचई ॥
- [७४१] अन्नं पा नं च ण्हाणं च , गंधमल्लविलेवणं ।
मए नायमनायं वा , सा बाला नोवभुंजई ॥
- [७४२] खणं पि मे महाराय ! पासाओ मे न फिट्टई ।
न य दुक्खा विमोएइ , एसा मज्झ अ नाहया ॥
- [७४३] तओऽहं एवमाहंसु , दुक्खमाहु पुणो पुणो ।
वेयणा अ नुभविउं जे , संसारंमि अ नंतए ॥

- [७४४] सयं च जइ मुंचेज्जा , वेयणा विउला इओ ।
खंतो दं तो निरारं भो, पव्वए अ नगारियं ॥
- [७४५] एवं च चिं तइत्ताणं, पासुत्तो मि नराहिवा ! ।
परीयट्ठीए राईए , वेयणा मे खयं गया ॥
- [७४६] तओ कल्ले पभायं मि, आपुच्छित्ताण बं धवे ।
खंतो दं तो निरारं भो, पव्वइओ अन गारियं ॥
- [७४७] ततोऽहं नाहो जाओ , अप्पणो य परस्स य ।
सव्वेसिं चव भूयाणं , तसाणं थावराण य ॥
- [७४८] अप्पा नई वेयरणी , अप्पा मे कूडसामली ।
अ प्पा कामदुहा धे नू, अप्पा मे नं दनं व नं ॥
- [७४९] अप्पा कत्ता विकत्ता य दुहाण य सुहाण य ।
अ प्पा मित्तममित्तं च , दुप्पट्ठिय सुपट्ठिओ ॥
- [७५०] इमा हु अन्ना वि अ नाहया निवा! तमेगचित्तो निहुओ सुणेहि ।

अज्झयणं-२०

- नि यंठधम्मं लहीयाण वी जहा , सीयंति एगे बहुकायरा नरा ॥
- [७५१] जो पव्वइत्ताण महव्वयाइं , सम्मं च नो फासयई पमाया ।
अनिग्गहप्पा य रसेसु गिद्धा , न मूलओ छिन्नइ बं धनं से ॥
- [७५२] आउत्तया जस्स न अत्थि काइ , इरियाए भासाए तहेसणाए ।
आयाणनिकखेवदुगुंछणाए, न वीरजायं अ नुजाइ मग्गं ॥
- [७५३] चिरं पि से मुं डरुई भवित्ता , अथिरव्वए तवनियमेहिं भट्ठे ।
चिरं पि अप्पाण किलेसइत्ता , न पारए होइ हु संपराए ॥
- [७५४] पोल्ले व मुट्ठी जह से असारे , अयंतिए कूडकहाव ने वा ।
राढामणी वेरुलियप्पगासे , अमहग्घए होइ हु जाणएसु ॥
- [७५५] कुसीललिंगं इह धारइत्ता , इसिज्झयं जीविय बूहइत्ता ।
असंजए संजय लप्पमाणे, विनिग्घायमागच्छइ से चिरंपि ॥
- [७५६] विसं तु पीयं जह कालकूडं , हणाइ सत्थं जह कुग्गहीयं ।
ए सो वि धम्मो विसओव वन्नो, हणाइ वेयाल इवाविवन्नो ॥
- [७५७] जे लक्खणं सुविण पउंजमाणे , निमित्तकोऊहलसंपगाढे ।
कुहेडविज्जासवरदारजीवी, न गच्छई सरणं तं मि काले ॥
- [७५८] तमंतमेणेव उ से असीले , सया दुही विप्परिया सुवेइ ।
संधावई नरगतिरिक्खजोणिं , मोनं विराहेत्तु असाहरुवे ॥
- [७५९] उट्ठेसियं कीयगडं नियागं , न मुंचई किंचि अ नेसणिज्जं ।
अ ग्गी विवा सव्वभक्खी भवित्ता , इत्तो चुए गच्छइ कट्टु पावं ॥
- [७६०] न तं अरी कंठ छेत्ता करे इ, जं से करे अप्पणिया दुरप्पा ।
से नाहि इं मच्चुमुहं तु पत्ते , पच्छानुतावेण दयाविहूणो ॥

- [७६१] निरत्थया नग्गरुई उ तस्स , जे उत्तमद्वे विवज्जा समेइ ।
इमे वि से नत्थि परं वि लोए, दुहओ वि से झिज्जइ तत्थ लोए ॥
- [७६२] एमेवऽहा छं दकुसीलरूवे, मग्गं विराहित्तु जिणुत्तमाणं ।
कुररी विवा भोगरसाणुगिद्धा , निरद्वसोया परियावमेइ ॥
- [७६३] सोच्चाण मेहावि सुभासियं इमं , अनुसासनं नाणगुणोववेयं ।
मग्गं कुसीलाण जहाय सव्वं , महानियंठाण वए पहेणं ॥
- [७६४] चरित्तमायारगुणन्निए तओ , अनुत्तरं संजम पालियाणं ।
निरासवे संखविया ण कम्मं , उवेइ ठामं विउलुत्तमं धुवं ॥
- [७६५] एवुग्गदंतेऽवि महातवोध ने, महामुनी महापइन्ने महायसे ।
महानियंठिज्जमिणं महासुयं , से काहए महया वित्थरेणं ॥
- [७६६] तुडो य सेणिओ राया , इणमुदाहु कयंजली ।
अना हत्तं जहाभूयं , सुडु मे उवदंसियं ॥
- [७६७] तुज्झं सुलद्धं खु म नुस्स जम्मं, लाभा सुलद्धा य तुमे महेसी ! ।

अज्झयणं-२०

- तुब्भे सनाहा य सबं धवा य, जं भे ठिया मग्गे जि नुत्तमाणं ॥
- [७६८] तं सि नाहो अ नाहाणं, सव्वभूयाण संजया ।
खामेमि ते महाभाग ! इच्छामि अ नुसासिउं ॥
- [७६९] पुच्छिऊण मए तुब्भं, ज्ञाणविग्घाओ य जो कओ ।
निमंतिया य भोगेहिं , तं सव्वं मरिसेहि मे ॥
- [७७०] एवं थुणित्ताण से रायसीहो , अनगारसीहं परमाइ भत्तीए ।
सओरोहो य सपरियणो सबंधवो, धम्मनुरत्तो विमलेण चयसा ॥
- [७७१] ऊससियरोमकूवो, काऊण य पयाहिणं ।
अभिवंदिऊण सिरसा , अइयाओ नराहिवो ॥
- [७७२] इयरो वि गुणसमिद्धो, तिगुत्तिगुत्तो तिदंडविरओ य ।
विहग इव विप्पमुक्को, विहरइ वसुहं विगयमोहो ॥ त्ति बेमि
• विसइमं अज्झयणं सम्मत्तं •

• एगविसइमं अज्झयणं - समुद्धपालीयं •

- [७७३] चंपाए पालिए नाम , सावए आसि वाणिए ।
महावीरस्स भगवओ , सीसे सो उ महप्पणो ॥
- [७७४] निग्गंथे पावयणे , सावए से वि कोविए ।
पोएण ववहरं ते, पिहुंडं नगरमागए ॥
- [७७५] पिहुंडे ववहरं तस्स, वाणिओ दे इ धूरं ।
तं ससत्तं पइगिज्झ , सदेसमह पत्थिओ ॥
- [७७६] अह पालियस्स घरणी , समुद्धंमि पसवई ।

- अह बालए तहिं जाए , समुद्धपालि त्ति नामए ॥
 [७७७] खेमेण आगए चं पं, सावए वाणिए घरं ।
 संवड्ढई धरे तस्स , दारए से सुहोइए ॥
 [७७८] बावत्तरी कलाओ य , सिक्खई नीइकोविए ।
 जोव्वणेण य संपन्ने , सुरुवे पियदंसणे ॥
 [७७९] तस्स रूववइं भज्जं , पिया आणेइ रूविणिं ।
 पासाए कीलए रम्मे , देवो दोगुं दओ जहा ॥
 [७८०] अह अन्नया कयाई , पासायालयणे ठि ओ ।
 वज्झं मं डणसोभागं, वज्झं पासइ वज्झं ॥
 [७८१] तं पासिऊण संविग्गो , समुद्धपालो इणमब्बवी ।
 अहोऽसुभाण कम्माणं , निज्जाणं पावगं इमं ॥
 [७८२] संबुद्धो सो तहिं भगवं , परमसंवेगमागओ ।
 आपुच्छऽम्मापियरो, पव्वए अ नगारियं ॥

अज्झयणं-२१

- [७८३] जहित्तु सग्गं थ महाकिलेसं, महंतमोहं कसिणं भया णगं ।
 परियायधम्मं चऽभिरोयएज्जा , वयाणि सीलाणि परीसहे य ॥
 [७८४] अहिंस सच्चं च अतेणगं च , तत्तो य बं भं अपरिग्गहं च ।
 पडिवज्जिया पंच महव्वयाणि , चरिज्ज धम्मं जि नदेसियं विदू ॥
 [७८५] सव्वेहिं भूएहिं दया नुकंपी, खंतिक्खमे संजयबं भयारी ।
 सावज्जजोगं परिवज्जयं तो, चरिज्ज भिक्खू सुसमाहिइंदिए ॥
 [७८६] कालेण कालं विहरेज्ज रट्टे , बलाबलं जाणिय अप्पणो य ।
 सीहो व सद्देण न सं तसेज्जा वयजोग सुच्चा न असं भमाहु ॥
 [७८७] उवेहमाणो उ परिव्वएज्जा , पियमप्पियं सव्व तित्तिक्खएज्जा ।
 न सव्व सव्वत्थऽभिरोयएज्जा , न यावि पूयं गरहं च संजए ॥
 [७८८] अनेगच्छं दामिह मा नवेहिं, जे भावओ से पगरेइ भिक्खू ।
 भयभेरवा तत्थ उइं ति भीमा, दिव्वा मणुस्सा अदुवा तिरिच्छा ॥
 [७८९] परीसहा दुव्विसहा अ नेगे, सीयंति जत्था बहुकायरा नरा ।
 से तत्थ पत्ते न वहिज्ज भिक्खु , संगामसीसे इव नागराया ॥
 [७९०] सीओसिणा दंसमसा य फासा , आयंका विविहा फुसं ति देहं ।
 अकुक्कुओ तत्थऽहियासएज्जा , रयाइ खेवेज्ज पुराक डाइं ॥
 [७९१] पहाय रागं च तहेव दोसं , मोहं च भिक्ख सययं वियक्खणो ।
 मेरु व्व वाएण व अकं पमाणो, परीसहे आयगुत्ते सहेज्जा ॥
 [७९२] अणुन्नए नावणए महेसी , न यावि पूयं गरहं च संजए ।
 से उज्जुभावं पडिवज्ज संजए , निव्वाणमग्गं विरए उवेइ ॥
 [७९३] अरइरइसहे पहीणसंथवे , विरए आयहिए पहाणवे ।

- परमद्वपएहिं चिद्वई , छिन्नसोए अममे अकिंचणे ॥
- [७९४] विवित्तलयणाइ भएज्ज ताई , निरोवलेवाइं असंथडाइं ।
इसीहिं चिण्णाइं महायसेहिं , काएण फासेज्ज परीसहाइं ॥
- [७९५] सन्नाणनाणोवगए महेसी , अनुत्तरं चरिउं धम्मसंचयं ।
अनुत्तरे नाणधरे जसंसी , ओभासई सुरिए वंस तलिकखे ॥
- [७९६] दुविहं खवेऊण य पुण्णपावं , निरंगणे सव्वओ विप्पमुक्के ।
तरित्ता समुद्धं व महाभवोघं, समुद्धपाले अपुणागमं गए ॥ त्तिबेमि

• एगविसइमं अज्झयणं सम्मत्तं •

• बाइसइमं अज्झयणं - रहनेमिज्जं •

- [७९७] सोरियपुरंमि नयरे , आसि राया महि इट्टिए ।
वसुदेव त्ति नामेणं , रायलक्खणसंजुए ॥
- [७९८] तस्स भज्जा दुवे आसी , रोहिणी देवई तहा ।

अज्झयणं-२२

- तासिं दोण्हं दुवे पुत्ता , इट्ठा रामकेसवा ॥
- [७९९] सोरियपुरंमि नयरे , आसि राया महि इट्टिए ।
समुद्धविजए नामं , रायलक्खणसंजुए ॥
- [८००] तस्स भज्जा सिवा नाम , तीसे पुत्तो महायसो ।
भगवं अरि इनेमि त्ति , लोगनाहे दमीसरे ॥
- [८०१] सोऽरिद्वनेमिनामो उ , लक्खणस्सरसंजुओ ।
अट्टसहस्सलक्खणधरो, गोयमो कालगच्छवी ॥
- [८०२] वज्जरिसहसंघयणो, समचउरंसो झसोयरो ।
तस्स रायमईकन्नं , भज्जं जायइ केसवो ॥
- [८०३] अह सा रायवरकन्ना , सुसीला चारुपेहणी ।
सव्वलक्खणसंपन्ना, विज्जुसोयामणिप्पभा ॥
- [८०४] अहाह जणओ तीसे , वासुदेवं महि इट्टियं ।
इहागच्छउ कुमारो, जो से कन्नं द दामिसंहं ॥
- [८०५] सव्वोसहीहिं प्हविओ , कयकोउयमंगलो ।
दिव्वजुयलपरिहिओ, आभरणेहिं विभूसिओ ॥
- [८०६] मत्तं च गं धहत्थिं च , वासुदेवस्स जे इगं ।
आरूढो सोहए अहियं , सिरे चूडामणी जहा ॥
- [८०७] अह ऊसिएण छत्तेण , चामराहि य सोहिए ।
दसारचक्केण तओ, सव्वओ परिवारिओ ॥
- [८०८] चउरंगिणीए से नाए, रइयाए जहक्कमं ।
तुरियाण सन्निनाएणं , दिव्वेणं गग नं फुसे ॥

- [८०९] एयारिसाए इ इठीए, जुत्तीए उततमाइ य ।
नियगाओ भव नाओ, निज्जाओ वण्हपुंगवो ॥
- [८१०] अह सो तत्थ निज्जं तो, दिस्स पा ने भयद्दुए ।
वाडेहिं पंजरेहिं च , सन्निरुद्धे सुदुक्खिए ॥
- [८११] जीवियंतं तु सं पत्ते, मंसद्धा भक्खियव्वए ।
पासित्ता से महापन्ने , सारहिं इणमब्बवी ॥
- [८१२] कस्स अद्धा इमे पाणा , एए सव्वे सुहेसिणो ।
वाडेहिं पंजरेहिं च , सन्निरुद्धा य अच्छहिं ? ॥
- [८१३] अह सारही तओ भणई , एए भद्दा उ पाणिणो ।
तुज्झं विवाहकज्जं मि, भोयावेउं बहं ज नं ॥
- [८१४] सोऊण तस्स वयणं , बहुपाणिविनासणं ।
चित्तेइ से महापन्नो , सानुक्कोसे जिएहिं ऊ ॥
- [८१५] जइ मज्झा कारणा एए , हम्मंति सुबहू जिया ।

अज्झयणं-२२

- न मे एयं तु निस्सेसं , परलोगे भविस्सई ॥
- [८१६] सो कुं डलाण जुयलं , सुत्तगं च महायसो ।
आभरणाणि य सव्वाणि , सारहिस्स पणामए ॥
- [८१७] मनपरिणामो य कओ , देवा य जहोइयं समोइण्णा ।
सव्वइठीइ सपरिसा , निक्खमणं तस्स काउं जे ॥
- [८१८] देवमनुस्सपरिवुडो, सिबियारयणं तओ समारुद्धो ।
निक्खमिय बारगाओ , रेवययंमि द्विओ भगवं ॥
- [८१९] उज्जाणं संपत्तो , ओइण्णो उततमाउ सीयाओ ।
साहस्सीइ परिवुडो , अह निक्खमई उ चित्ताहिं ॥
- [८२०] अह से सुगं धगंधीए, तुरियं मउकुंचिए ।
सयमेव लुंचई केसे , पंचमुट्ठीहिं समाहिओ ॥
- [८२१] वासुदेवो य णं भण ई, लुत्तकेसं जिइं दियं ।
इच्छियमनोरहं तुरियं , पावसु तं दमीसरा ॥
- [८२२] नाणेणं दंसणेणं च , चरित्तेणं तहेव य ।
खंतीए मुत्तीए , वड्ढमाणो भवाहि य ॥
- [८२३] एवं ते रामकेसवा , दसारा य बहू ज ना ।
अरिद्धनेमिं वं दित्ता, अभिगया बारगापुरिं ॥
- [८२४] सोऊण रायकन्ना , पव्वज्जं सा जि नस्स उ ।
नीहासा य निरा नंदा, सोगेण उ समु च्छिया ॥
- [८२५] राईमई विचिं तेइ, धिरत्थु मम जीवियं ।
जा हं तेण परिच्चत्ता , सेयं पव्वइउं मम ॥

- [८२६] अह सा भमरसं निभे, कुच्यफणगपसाहिए ।
सयमेव लुंचई केसे , धिइमंता ववस्सिया ॥
- [८२७] वासुदेवो य णं भणइ , लुत्तकेसं जिइं दियं ।
संसारसागरं घोरं , तर कन्ने ! लहुं लहुं ॥
- [८२८] सा पव्वइया सं ती, पव्वावेसी तहिं बहुं ।
सयणं परियणं चेव , सीलवंता बहुस्सुया ॥
- [८२९] गिरिं रेवतयं जं ती, वासेणुल्ला उ अं तरा ।
वासंते अं धयारंमि, अंतो लयणस्स साठिया ॥
- [८३०] चीवराइं विसारं ती, जहा जाय त्ति पासिया ।
रहनेमी भग्गचित्तो , पच्छा दिट्ठो य तीइ वि ॥
- [८३१] भीया य सा तहिं द ङुं, एगंते संजयं तयं ।
बाहाहिं काउ संगोप्फं , वेवमाणी निसीयई ॥
- [८३२] अह सोऽवि रायपुत्तो , समुद्धविजयंगओ ।

अज्झयणं-२२

- भीयं पवेवियं द ङुं, इमं वक्कं उदाहरे ॥
- [८३३] रहनेमी अहं भद्रे ! सुरुवे चारुभासिणी ! ।
ममं भयाहि सुत नु, न ते पीला भविस्सई ॥
- [८३४] एहि ता भुंजिमो भोए , माणुस्सं खु सुदुल्लहं ।
भुत्तभोगी तओ पच्छा , जिनमग्गं चरिस्सिमो ॥
- [८३५] दट्ठुण रहनेमिं तं , भग्गुज्जोयपराजियं ।
राइमई असं भंता, अप्पाणं संवरे तहिं ॥
- [८३६] अह सा रायवरकन्ना , सुट्ठिया नियमव्वए ।
जाई कुलं च सीलं च , रक्खमाणी तयं वए ॥
- [८३७] जइ सि रुवेण वेसमणो , ललिएण नलकुब्बरो ।
तहा वि ते न इच्छामि , जइऽसि सक्खं पुरंदरो ॥
- [८३८] धिरत्थु तेऽजसोकामी , जो तं जीवियकारणा ।
वंतं इच्छसि आवेउं , सेयं ते मरणं भवे ॥
- [८३९] अहं च भोगरायस्स , तं च सि अं धगवण्हिणो ।
मा कुले गं धणा होमो , संजमं निहुओ चर ॥
- [८४०] जइ तं काहिसि भावं , जा जा दिच्छसि नारिओ ।
वायाविद्धो व्व हडो , अट्ठिअप्पा भविस्ससि ॥
- [८४१] गोवालो भं डवालो वा , जहा तद्धव्व नि स्सरो ।
एवं अ निस्सरो तं पि , सामण्णस्स भविस्ससि ॥
- [८४२] कोहं मा नं निगिण्हित्ता , मायं लोभं च सव्वसो ।
इंदियाइं वसे काउं , अप्पाणं उवसंहरे ॥

- [८४३] तीसे सो वयणं सोच्चा , संजयाए सुभासियं ।
अंकुसेण जहा नागो , धम्मं संपडिवाइओ ॥
- [८४४] मनगुत्तो वयगुत्तो , कायगुत्तो जिइं दिओ ।
सामण्णं निच्चलं फासे , जावज्जीवं दढव्वओ ॥
- [८४५] उग्गं तवं चरित्ताणं , जाया दो न्नि वि केवली ।
सव्वं कम्मं खवित्ताणं , सिद्धिं पत्ता अ नुत्तरं ॥
- [८४६] एवं करे ति संबुद्धा , पंडिया पवियक्खणा ।
विणियट्ठंति भोगेसु , जहा सो पुरिसोत्तमो ॥ त्ति बेमि
• बाइसइमं अज्झयणं सम्मत्तं •

• तेविंसइमं अज्झयणं-केसिगोयमिज्जं •

- [८४७] जिणे पासि त्ति नामेण , अरहा लोगपूइओ ।
संबुद्धप्पा य सव्वन्नू , धम्मतित्थयरे जि ने ॥

अज्झयणं-२३

- [८४८] तस्स लोगपईवस्स , आसि सीसे महायसे ।
केसी कुमारसमणे , विज्जाचरणपारगे ॥
- [८४९] ओहिनाणसुए बुद्धे , सीससंघसमाउले ।
गामाणुगामं रीयं ते, सावत्थिं पुरमागए ॥
- [८५०] तिंदुयं नाम उज्जाणं , तंमि नगरमं डले ।
फासुए सिज्जसंधारे , तत्थ वासमुवागए ॥
- [८५१] अह तेणेव कालेणं , धम्मतित्थयरे जि ने ।
भगवं वद्धमाणु त्ति , सव्वलोगंमि विस्सुए ॥
- [८५२] तस्स लोगपईवस्स , आसि सीसे महायसे ।
भगवं गोयमे नामं , विज्जाचरणपारए ॥
- [८५३] बारसंगविऊ बुद्धे , सीससंघसमाउले ।
गामानुगामं रीयं ते, सेऽवि सावत्थिमागए ॥
- [८५४] कोट्टुगं नाम उज्जाणं , तंमी नगरमं डले ।
फासुए सिज्जसंधारे , तत्थ वासमुवागए ॥
- [८५५] केसी कुमारसमणे , गोयमे य महायसे ।
उभओऽवि तत्थ विहरिंसु , अल्लीणा सुसमाहिया ॥
- [८५६] उभओ सीससंधाणं , संजयाणं तवस्सिणं ।
तत्थ चिं ता समुप्पन्ना , गुणवंताण ताइणं ॥
- [८५७] केरिसो वा इमो धम्मो , इमो धम्मो व केरिसो ? ।
आयारधम्मपणिही, इमा वा सा व केरिसी ? ॥
- [८५८] चाउज्जामो य जो धम्मो , जो इमो पंचसिक्खिओ ।

- देसिओ वद्धमाणेण पासेण य महामु नी ॥
- [८५९] अचेलओ य जो धम्मो , जो इमो सं तरुत्तरो ।
एगकज्जपवन्नाणं, विसेसे किं नु कारणं ? ॥
- [८६०] अह ते तत्थ सीसाणं , विन्नाय पवितक्कियं ।
समागमे कयमई , उभओ केसिगोयमा ॥
- [८६१] गोयमे पडिरुव न्नु, सीससंघसमाउले ।
जेट्ठं कुलमवेक्खं तो, तिंदुयं व नमागओ ॥
- [८६२] केसी कुमारसमणे , गोयमं दिस्समागयं ।
पडिरुवं पडिवत्तिं , सम्मं संपडिवज्जई ॥
- [८६३] पलालं फासुयं तत्थ , पंचमं कुसतणाणि य ।
गोयमस्स निसेज्जाए , खिप्पं संपणामए ॥
- [८६४] केसी कुमारसमणे , गोयमे य महायसे ।
उभओ निसण्णा सोहंति, चंदसूरसमप्पभा ॥

अज्झयणं-२३

- [८६५] समागया बहू तत्थ , पासंडा कोउगा मिया ।
गिहत्थाणं अ नेगाओ, साहस्सीओ समागया ॥
- [८६६] देवदानवगंधच्वा, जक्खरक्खसकिंनरा ।
अदिस्साणं च भूयाणं , आसी तत्थ समागमो ॥
- [८६७] पुच्छामि ते महाभाग ! केसी गोयममब्बवी ।
तओ केसिं बुवं तं तु , गोयमो इणमब्बवी ॥
- [८६८] पुच्छ भं ते! जहिच्छं ते , केसिं गोयममब्बवी ।
तओ केसी अणुन्नाए , गोयमं इणमब्बवी ॥
- [८६९] चाउज्जामो य जो धम्मो , जो इमो पंचसिं किखओ ।
देसिओ वद्धमाणेणं , पासेण य महामु नी ॥
- [८७०] एगकज्जपवन्नाणं, विसेसे किं नु कारणं ? ।
धम्मो दुविहे मेहावी , कहां विप्पच्चओ न ते ? ॥
- [८७१] तओ केसिं बुवं तं तु , गोयमो इणमब्बवी ।
पन्ना समिक्खए धम्मं , तत्तं तत्तवि निच्छियं ॥
- [८७२] पुरिमा उज्जुजडा उ , वंकजडा य पच्छिमा ।
मज्झिमा उज्जुपन्ना उ , तेण धम्मो दुहा कए ॥
- [८७३] पुरिमाणं दुव्विसोज्झो उ , चरिमाणं दुर नुपालओ ।
कप्पो मज्झिमगाणं तु , सुविसोज्झो सुपालओ ॥
- [८७४] साहु गोयम! पन्ना ते , छिन्नो मे संसओ इमो ।
अन्नो वि संसओ मज्झं , तं मे कहसु गोयमा ! ॥
- [८७५] अचेलगो य जो धम्मो , जो इमो सं तरुत्तरो ।

- देसिओ वद्धमाणेण , पासेण य महाजसा ॥
- [८७६] एगकज्जपवन्नाणं, विसेसे किं नु कारणं ? ।
लिंगे दुविहे मेहावी , कहां विप्पच्चओ न ते ? ॥
- [८७७] तओ केसिं बुवाणं तु , गोयमो इणमब्बवी ।
विन्नाणेण समागम्म , धम्मसाहणमिच्छियं ॥
- [८७८] पच्चयत्थं च लोगस्स , नानाविहविगप्पणं ।
जत्तत्थं गहणत्थं च , लोगे लिंगपओयणं ॥
- [८७९] अह भवे पइन्ना उ , मोक्खसब्भूयसाहणा ।
नाणं च दंसणं चेव , चरित्तं चेव निच्छए ॥
- [८८०] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [८८१] अनेगाणं सहस्साणं , मज्झे चिद्धसि गोयमा ! ।
ते य ते अहिगच्छं ति, कहां ते निज्जिया तुमे ? ॥

अज्झयणं-२३

- [८८२] एगे जिए जिया पंच , पंच जिए जिया दस ।
दसहा उ जिणित्ताणं , सव्वसत्तू जिणामऽहं ॥
- [८८३] सत्तू य इइ के वुत्ते ? केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [८८४] एगऽप्पे अजिए सत्तू , कसाया इं दियाणि य ।
ते जिणित्तु जहानायं , विहरामि अहं मु नी ॥
- [८८५] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [८८६] दीसंति बहवे लोए , पासबद्धा सरीरिणो ।
मुक्कपासो लहुब्भूओ , कहां तं विहरसी मु नी! ॥
- [८८७] ते पासे सव्वसो छित्ता , निहंतूण उवायओ ।
मुक्कपासो लहुब्भूओ , विहरामि अहं मु नी! ॥
- [८८८] पासा य इइ के वुत्ता ? केसी गोयममब्बवी ।
तओ केसिं बुवंतं तु , गोयमो इणम ब्बवी ॥
- [८८९] रागद्वोसादओ तिच्चा , नेहपासा भयंकरा ।
ते छिं दित्ता जहानायं , विहरामि जहक्कमं ॥
- [८९०] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [८९१] अंतो हिअयसंभूया, लया चिद्धइ गोयमा ! ।
फलेइ विसभक्खी णं, सा उ उद्धरिया कहां ? ॥
- [८९२] तं लयं सव्वसो छित्ता , उद्धरित्ता समूलियं ।

- विहरामि जहानायं , मुक्को मि विसभक्खणं ॥
- [८९३] लया य इइ का वुत्ता ? केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [८९४] भवतण्हा लया वुत्ता , भीमा भीमफलोदया ।
तमुच्छित्तु जहानायं , विहरामि महामु नी! ॥
- [८९५] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसुं गोयमा ! ॥
- [८९६] संपज्जलिया घोरा , अग्गी चि इइ गोयमा ! ।
जे इहं ति सरीरत्थे , कहं विज्झाविया तुमे ? ॥
- [८९७] महामेहप्पसूयाओ, गिज्झ वारि जलुत्तमं ।
सिंचामि सययं देहं , सित्ता नो इहं ति मे ॥
- [८९८] अग्गी य इइ के वुत्ता , केसी गोयममब्बवी ।
तओ केसिं बुवंतं तु , गोयमो इणमब्बवी ॥

अज्झयणं-२३

- [८९९] कसाया अग्गिणो वुत्ता , सुयसीलतवो जलं ।
सुयधाराभिहया सं ता, भिन्ना हु न इहं ति मे ॥
- [९००] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [९०१] अयं साह स्सिओ भीमो , दुइस्सो परिधावई ।
जंसि गोयम ! आरुढो , कहं तेण न हीरसि ? ॥
- [९०२] पधावंतं निगिण्हामि , सुयरस्सीससमाहियं ।
न मे गच्छइ उम्मग्गं , मग्गं च पडिवज्जई ॥
- [९०३] आसे य इइ के वुत्ते ? केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [९०४] मनो साह स्सिओ भीमो , दुइस्सो परिधावई ।
तं सम्मं तु निगिण्हामि , धम्मसिक्खाइ कं थगं ॥
- [९०५] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [९०६] कुप्पहा बहवे लोए , जेहिं नासं ति जं तुणो ।
अद्धाणे कहं वट्टं तो, तं न नाससि गोयमा ! ? ॥
- [९०७] जे य मग्गेण गच्छंति , जे य उम्मग्गपट्टिया ।
ते सव्वे वेइया मज्झं , ते न नस्सामहं मु नी! ॥
- [९०८] मग्गे य इइ के वुत्ते , केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [९०९] कुप्पवयणपासंडी, सव्वे उम्मग्गपट्टिया ।

- सम्मग्गं तु जि नक्खायं, एस मग्गे हि उत्तमे ॥
- [९१०] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [९११] महाउदगवेगेण, वुज्झमाणाण पाणिणं ।
सरणं ग इं पइद्वा य , दीवं कं मन्नसी ? मुनी! ॥
- [९१२] अत्थि एगो महादीवो , वारिमज्झे महालओ ।
महाउदगवेगस्स, गई तत्थ न विज्जई ॥
- [९१३] दीवे य इइ के वुत्ते ? केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [९१४] जरामरणवेगेणं, वुज्झमाणाण पाणिणं ।
धम्मो दीवो पइद्वा य , गई सरणमुत्तमं ॥
- [९१५] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥

अज्झयणं-२३

- [९१६] अन्नवंसि महोहंसि , नावा विपरिधावई ।
जंसि गोयममारूढो कहं पारं गमिस्ससि ? ॥
- [९१७] जा उ अस्साविणी नावा , न सा पारस्स गामिणी ।
जा निरस्साविणी नावा , सा उ पारस्स गामिणी ॥
- [९१८] नावा य इइ का वुत्ता ? केसी गोयममब्बवी ।
तओ केसिं बुवंतं तु , गोयमो इणमब्बवी ॥
- [९१९] सरीरमाहु नाव त्ति , जीवो वुचचइ नाविओ ।
संसारो अण्णवो वुत्तो , जं तरंति महेसिणो ॥
- [९२०] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [९२१] अंधयारे तमे घोरे , चिद्धंति पाणिणो बहू ।
को करिस्सइ उज्जोयं ? सव्वलोयंमि पाणिणं ॥
- [९२२] उग्गओ विमलो भा नू, सव्वलोयपभंकरो ।
सो करिस्सइ उज्जोयं , सव्वलोयंमि पाणिणं ॥
- [९२३] भानु य इइ के वुत्ते ? केसी गोयममब्बवी ।
केसिमेवं बुवंतं तु गोयमो इणमब्बवी ॥
- [९२४] उग्गओ खीणसंसारो , सव्वन्नू जि नभक्खरो ।
सो करिस्सइ उज्जोयं , सव्वलोयंमि पाणिणं ॥
- [९२५] साहु गोयम ! पन्ना ते , छिन्नो मे संसओ इमो ।
अन्नोऽवि संसओ मज्झं , तं मे कहसु गोयमा ! ॥
- [९२६] सारीरमानसे दुक्खे , बज्झमाणाण पाणिणं ।

- खेमं सिवम नाबाहं, ठाणं किं मन्नसी ? मुनी! ॥
- [९२७] अत्थि एगं धुवं ठाणं लोगगं मि दुरारुहं ।
जत्थ नत्थि जरामच्चू , वाहिणो वेयणा तहा ॥
- [९२८] ठाणे य इइ के वुत्ते ? केसी गोयममब्बवी ।
केसिमेवं बुवंतं तु , गोयमो इणमब्बवी ॥
- [९२९] निव्वाणं ति अबाहं ति , सिद्धी लोगगमेव य ।
खेमं सिवं अ नाबाहं, जं तरंति महेसिणो ॥
- [९३०] तं ठाणं सासयं वासं , लोगगंमि दुरारुहं ।
जं संपत्ता न सोयं ति, भवोहंतकरा मु नी ॥
- [९३१] साहु गोयम ! पन्ना ते , छिन्नो मे संसओ इमो ।
नमो ते संसायातीत ! सव्वसुत्तमहोयही ॥
- [९३२] एवं तु संसए छिन्ने , केसी घोरपरक्कमे ।
अभिवंदित्ता सिरसा , गोयमं तु महायसं ॥

अज्झयणं-२३

- [९३३] पंचमहव्वयं धम्मं, पडिवज्जइ भावओ ।
पुरिमस्स पच्छिमं मि, मग्गे तत्थ सुहावहे ॥
- [९३४] केसीगोयमओ निच्चं , तंमि आसि समागमे ।
सुयसीलसमुक्कसो, महत्थत्थविनिच्छओ ॥
- [९३५] तोसिया परिसा सव्वा , सम्मग्गं समुवट्ठिया ।
संथुया ते पसीयं तु, भयवं केसिगोयमे ॥ त्ति बेमि
• तेविंसइमं अज्झयणं सम्मत्तं •

• चउविंसइमं अज्झयणं - पवयणमाया •

- [९३६] अट्ठ पवयणमायाओ , समिई गुत्ती तहेव य ।
पंचेव य समिईओ , तओ गुत्तीउ आहिआ ॥
- [९३७] इरियाभासेसणास्सदाने, उच्चारे समि ई इय ।
मनगुत्ती वयगुत्ती , कायगुत्ती य अट्ठमा ॥
- [९३८] एयाओ अट्ठ समिईओ , समासेण वियाहिया ।
दुवालसंगं जिणक्खायं , मायं जत्थ उ पवयणं ॥
- [९३९] आलंबणेण कालेणं , मग्गेण जयणाइ य ।
चउकारणपरिसुद्धं, संजए इरियं रिए ॥
- [९४०] तत्थ आलं बणं नाणं , दंसणं चरणं तहा ।
काले य दिवसे वुत्ते , मग्गे उप्पहवज्जिए ॥
- [९४१] दव्वओ खेत्तओ चेव , कालओ भावओ तहा ।
जयणा चउव्विहा वुत्ता , तं मे कित्तयओ सुण ॥

- [९४२] दव्वओ चक्खुसा पेहे , जुगमित्तं च खेत्तओ ।
कालओ जाव री एज्जा, उवउत्ते य भावओ ॥
- [९४३] इंदियत्थे विवज्जित्ता , सज्झायं चेष पं चहा ।
तम्मुत्ती तप्पुरक्कारे , उवउत्ते रियं रिए ॥
- [९४४] कोहे मा ने य मायाए , लोभे य उवउत्तया ।
हासे भये मोहरिए , विकहासु तहेव य ॥
- [९४५] एयाइं अट्ठ ठाणाइं , परिवज्जित्तु संजए ।
असावज्जं मियं काले , भासं भासिज्ज पन्नवं ॥
- [९४६] गवेसणाए गहणे य परिभोगेसणा य जा ।
आहारोवहिसेज्जाए, एए तिन्नि विसोहए ॥
- [९४७] उग्गमुप्पायणं पढमे , बीए सोहेज्ज एसणं ।
परिभोयंमि चउक्कं , विसोहेज्ज जयं जई ॥
- [९४८] अहोवहोवग्गहियं, भंडगं दुविहं मु नी ।

अज्झयणं-२४

- गिण्हंतो निक्खिवं तो वा , पउंजेज्ज इमं विहिं ॥
- [९४९] चक्खुसा पडिलेहित्ता , पमज्जेज्ज जयं जई ।
आइए निक्खिवेज्जा वा , दुहओऽवि समिए सया ॥
- [९५०] उच्चारं पासवणं , खेलं सिंघाण जल्लियं ।
आहारं उवहिं देहं , अन्नं वावि तहाविहं ॥
- [९५१] अनावायमसंलोए, अनावाए चेष होइ संलोए ।
आवायमसंलोए, आवाए चेष संलोए ॥
- [९५२] अनावायमसंलोए, परस्सऽनुवघाइए ।
समे अज्झुसिरे वाऽवि, अचिरकालकयंमि य ॥
- [९५३] विच्छिन्ने दुरमोगढे , नासन्ने बिलवज्जिए ।
तसपाणबीयरहिए, उच्चाराईणि वोसिरे ॥
- [९५४] एयाओ पं च समिईओ , समासेण वियाहिया ।
एत्तो य तओ गुत्तीओ , वोच्छामि अ नुपुव्वसो ॥
- [९५५] सच्चा तहेव मोसा य , सच्चमोसा तहेव य ।
चउत्थी असच्चमोसा य , मनगुत्ति चउव्विहा ॥
- [९५६] संरंभसमारंभे, आरंभे य तहेव य ।
मनं पवत्तमाणं तु , नियत्तेज्ज जयं जई ॥
- [९५७] सच्चा तहेव मोसा य , सच्चमोसा तहेव य ।
चउत्थी असच्चमोसा य , वइगुत्ती चउव्विहा ॥
- [९५८] संरंभसमारंभे, आरंभे य तहेव य ।
वयं पवत्तमाणं तु नियत्तेज्ज जयं जई ॥

- [९५९] ठाणे निसीयणे चेव , तहेव य तुयट्टणे ।
उल्लंघणे पल्लंघणे, इंदियाण य जुंजणे ॥
- [९६०] संरंभसमारंभे आरं भंमि तहेव य ।
कायं पवत्तमाणं तु , नियत्तेज्ज जयं जई ॥
- [९६१] एयाओ पंच समिईओ , चरणस्स य पवत्तणे ।
गुत्ती नियत्तणेऽवुत्ता , असुभत्थेसु सव्वसो ॥
- [९६२] एआओ पवयणमाया , जे सम्मं आयरे मु नी ।
सो खिप्पं सव्वसंसारा , विप्पसुच्चई पं डिए ॥ त्ति बेमि
• चउविसइमं अज्झयणं सम्मत्तं •

• पंचविसइमं अज्झयणं - जण्णइज्जं •

- [९६३] माहणकुलसंभूओ, आसि विप्पो महायसो ।
जायाई जमज न्मि, जयघोसे त्ति नामओ ॥

अज्झयणं-२५

- [९६४] इंदियग्गामनिग्गाही, मग्गगामी महामु नी ।
गामाणुग्गामं रीयंते , पत्तो वाणारसिं पुरिं ॥
- [९६५] वाणारसीए बहिया , उज्जाणंमि म नोरमे ।
फासुए सेज्जसंथारे , तत्थ वासमुवागए ॥
- [९६६] अह तेणेव कालेणं , पुरीए तत्थ माहणे ।
विजयघोसे त्ति नामेण , जण्णं जयइ वेयवी ॥
- [९६७] अह से तत्थ अ नगारे, मासक्खमणपारणे ।
विजयघोसस्स ज ण्णंमि, भिक्खमट्ठा उव ट्टिए ॥
- [९६८] समुवट्ठियं तहिं सं तं, जायगो पडिसेहए ।
न हु दाहामि ते भिक्खं , भिक्खू! जायाहि अन्नओ ॥
- [९६९] जे य वेयविऊ विप्पा , जन्नमट्ठा य जे दिया ।
जोइसंगविऊ जे य , जे य धम्माण पारगा ॥
- [९७०] जे समत्था समुद्धत्तुं , परं अ प्पाणमेव य ।
तेसिं अन्नमिणं देयं , भो भिक्खू ! सव्वकामियं ॥
- [९७१] सो तत्थ एवं पडिसिद्धो , जायगेण महामु नी ।
न वि रु ङ्गो न वि तु ङ्गो, उत्तमट्ठगवेसओ ॥
- [९७२] नऽन्नट्ठं पाणहेउं वा , नवि निव्वाहणाय वा ।
तेसिं विमोक्खण ट्ठाए, इमं वयणमब्बवी ॥
- [९७३] नवि जाणासि वेयमुहं , नवि जन्नाण जं मुहं ।
नक्खत्ताण मुहं जं च , जं च धम्माण वा मुहं ॥
- [९७४] जे समत्था समुद्धत्तुं , परं अ प्पाणमेव य ।

- न ते तुमं वियाणासि , अह जाणासि तो भण ॥
 [९७५] तस्सऽक्खेवपमोक्खं तु , अचयंतो तहिं दिओ ।
 सपरिसो पंजली होउं , पुच्छई तं महामु नी ॥
 [९७६] वेयाणं च मुहं बूहि , बूहि जन्नाणं जं मुहं ।
 नक्खत्ताण मुहं बूहि , बूहि धम्माण वा मुहं ॥
 [९७७] जे समत्था समुद्धत्तुं , परं अ प्पाणमेव य ।
 एयं मे संसयं सव्वं , साहू! कहसु पुच्छिओ ॥
 [९७८] अग्गिहुत्तमुहा वेया , जन्नद्वी वेयसा मुहं ।
 नक्खत्ताणं मुहं चं दो, धम्माण कासवो मुहं ॥
 [९७९] जहा चं दं गहाईया , चिद्वंती पंजलीउडा ।
 वंदमाणा नमंसं ता, उत्तमं म नहारिणो ॥
 [९८०] अजाणगा जन्नवाई , विज्जामाहणसंपया ।
 मूढा सज्झायतवसा , भासच्छन्ना इवऽग्गिणो ॥

अज्झयणं-२५

- [९८१] जो लोए बं भणो वुत्तो अग्गी व महिओ जहा ।
 सया कुसलसंदिदं , तं वयं बूम माहणं ॥
 [९८२] जो न सज्जइ आगं तुं, पव्वयंतो न सोय ई ।
 रमइ अज्जवयणं मि, तं वयं बूम माहणं ॥
 [९८३] जायरूवं जहामद्वं , निद्वंतमलपावगं ।
 रागदोसभयार्इयं, तं वयं बूम माहणं ॥
 [९८४] तवस्सियं किसं दं तं अवचियमंससोणियं ।
 सुव्वयं पत्तनिव्वाणं , तं वयं बूम माहणं ॥
 [९८५] तसे पाणे वियाणेत्ता , संगहेण य थावरे ।
 जो न हिंसइ तिविहेणं , तं वयं बूम माहणं ॥
 [९८६] कोहा वा जइ वा हासा , लोहा वा जइ वा भया ।
 मुसं न वयई जो उ , तं वयं बूम माहणं ॥
 [९८७] चित्तमंतमचित्तं वा , अप्पं वा जइ वा बहुं ।
 न गिणहाइ अदत्तं जे , तं वयं बूम माहणं ॥
 [९८८] दिव्वमानुसतेरिच्छं, जो न सेवइ मेहुणं ।
 मनसा कायवक्केणं , तं वयं बूम माहणं ॥
 [९८९] जहा पोमं जले जायं , नोवलिप्पइ वारिणा ।
 एवं अलित्तं कामेहिं , तं वयं बूम माहणं ॥
 [९९०] अलोलुयं मुहाजीविं , अनगारं अकिंचणं ।
 असंसत्तं गिहत्थेसु , तं वयं बूम माहणं ॥
 [प्र०] [जहित्ता पुव्वसंजोगं , नाइसंगे य बं धवे ।

- जो न सज्जइ भोगेसु , तं वयं बूम माहणं]]
- [९९१] पसुबंधा सव्ववेया ज ङं च पावकम्मुणा ।
न तं तायं ति दुस्सीलं , कम्माणि बलवं ति हि ॥
- [९९२] नवि मुं डिण्ण समणो , न उंकारेण बं भणो ।
न मु नी रण्णवासेणं , कुसचीरेण न तावसो ॥
- [९९३] समयाए समणो होइ , बंभचेरेण बं भणो ।
नाणेण य मु नी होइ , तवेण होइ तावसो ॥
- [९९४] कम्मुणा बं भणो हि , कम्मुणा होइ खत्तिओ ।
वईसो कम्मुणा होइ , सुद्धो हवइ कम्मुणा ॥
- [९९५] एए पाउकरे बुद्धे , जेहिं होइ सिणायओ ।
सव्वकम्मविनिम्मक्कं, तं वयं बूम माहणं ॥
- [९९६] एवं गुणसमाउत्ता , जे भवं ति दिउत्तमा ।
ते समत्था समुद्धत्तुं , परं अ प्पाणमेव य ॥

अज्झयणं-२५

- [९९७] एवं तु संसए छिन्ने , विजयघोसे य माहणे ।
समुदाया तयं तं तु , जयघोसं महामु निं ॥
- [९९८] तुट्ठे य विजयघोसे , इणमुदाहु कयंजली ।
माहणत्तं जहाभूयं , सुद्धु मे उवदंसियं ॥
- [९९९] तुब्भे जइया जन्नाणं , तुब्भे वेयविऊ विऊ ।
जोइसंगविऊ तुब्भे , तुब्भे धम्माण पारगा ॥
- [१०००] तुब्भे समत्था समुद्धत्तुं , परं अ प्पाणमेव य ।
तयनुग्गहं करेहऽम्हं , भिक्खेणं भिक्खु उत्तमा ॥
- [१००१] न कज्जं मज्झ भिक्खेणं , खिप्पं निक्खमसू दिया ! ।
मा भमिहिसि भयाव त्ते, घोरे संसारसागरे ॥
- [१००२] उवलेवो होइ भोगेसु , अभोगी नोवलिप्प इ ।
भोगी भमई संसारे , अभोगी विप्पमुच्चई ॥
- [१००३] उल्लो सु क्को य दो छूढा , गोलया मट्टियामया ।
दोऽवि आवडिया कु इडे, जो उल्लो सोऽत्थ लग्गई ॥
- [१००४] एवं लग्गं ति दुम्मेहा , जे नरा कामलालसा ।
विरत्ता उ न लग्गं ति, जहा से सुक्के गोलए ॥
- [१००५] एवं से विजयघोसे , जयघोसस्स अं तिए ।
अनगारस्स निक्खं तो, धम्मं सोच्चा अ नुत्तरं ॥
- [१००६] खवित्ता पुव्वकम्माइं , संजमेण तवेण य ।
जयघोसविजयघोसा, सिद्धिं पत्ता अ नुत्तरं ॥ त्ति बेमि

• पंचविंसइमं अज्झयणं सम्मत्तं •

• छवीसइमं अज्झयणं - सामायारी •

- [१००७] सामायारिं पवक्खामि , सव्वदुक्खविमोक्खणिं ।
जं चरित्ताण निग्गं था, तिण्णा संसारसागरं ॥
- [१००८] पढमा आवस्सिया नाम , बिइया य निसीहिया ।
आपुच्छणा य तइया , चउत्थी पडिपुच्छणा ॥
- [१००९] पंचमी छं दणा नाम , इच्छाकारो य छ द्दओ ।
सत्तमो मिच्छाकारो उ , तहक्कारो य अ द्दमो ॥
- [१०१०] अब्भुद्वाणं च नवमं , दसमी उवसंपया ।
सा दसंगा साहूणं , सामायारी पवेइया ॥
- [१०११] गमने आवस्सियं कुज्जा , ठाणे कुज्जा निसीहियं ।
आपुच्छणं सयंकरणे , परकरणे पडिपुच्छाणं ॥
- [१०१२] छंदणा दव्वजाएणं , इच्छाकारो य सारणे ।

अज्झयणं-२६

- [१०१३] मिच्छाकारो य निं दाए, तहक्कारो पडिस्सुए ॥
अब्भुद्वाणं गुरुपूया , अच्छणे उवसंपया ।
एवं दुपंचसंजुत्ता , सामायारी पवेइया ॥
- [१०१४] पुव्विल्लंमि चउब्भाए , आइच्चंमि समुद्धिइए ।
भंडयं पडिलेहित्ता , वंदित्ता य तओ गुरुं ॥
- [१०१५] पुच्छिज्जा पंजलिउडो , किं कायव्वं मए इहं ? ।
इच्छं निओइउं भं ते!, वेयावच्चे व सज्जाए ॥
- [१०१६] वेयावच्चे निउत्तेण , कायव्वं अगिलायओ ।
सज्जाए वा निउत्तेण , सव्वदुक्खविमोक्खणे ॥
- [१०१७] दिवसस्स चउरो भागे , भिक्खु कुज्जा वियक्खणो ।
तओ उत्तरगुणे कुज्जा , दिनभागेसु चउसु वि ॥
- [१०१८] पढमं पोरिसि सज्जायं , बीयं ज्ञाणं ज्ञियायई ।
तइयाए भिक्खायरियं , पुणो चउत्थीइ सज्जायं ॥
- [१०१९] आसाढे मासे दुपया , पोसे मासे चउप्पया ।
चित्तासोएसु मासेसु , तिप्पया हवइ पोरिसी ॥
- [१०२०] अंगुलं सत्तरत्तेणं , पक्खेणं च दुरंगुलं ।
वड्ढए हायए वाऽवि , मासेणं चउरंगुलं ॥
- [१०२१] आसाढबहुले पक्खे , भद्दवए कत्तिए य पोसे य ।
फग्गुणवइसाहेसु य , बोद्धव्वा ओमरत्ताओ ॥
- [१०२२] जेठामुले आसाढसावणे , छहिं अंगुलेहिं पडिलेहा ।

- अद्वहि बी इयतयंमि, तइए दस अ द्वहिं चउत्थे ॥
 [१०२३] रतिं पि चउरो भागे , भिक्खू कुज्जा वियक्खणो ।
 तओ उत्तरगुणे कुज्जा , राइभाएसु चउसु वि ॥
 [१०२४] पढमं पोरिसि सज्झायं , बीयं झाणं झियायई ।
 तइयाए निद्धमोक्खं तु , चउत्थी भुज्जो वि सज्झायं ॥
 [१०२५] जं नेइ जया रत्तिं , नक्खत्तं तं मि नहचउब्भाए ।
 संपत्ते विरमेज्जा , सज्झायं पओसकालं मि ॥
 [१०२६] तम्ममेव य नक्खत्ते , गयणं चउब्भाग सावसेसंमि ।
 वेरत्तियंमि कालं , पडिलेहित्ता मु नी कुज्जा ॥
 [१०२७] पुच्चिल्लंमि चउब्भाए , पडिलेहित्ताण भं डयं ।
 गुरुं वं दित्तु सज्झायं , कुज्जा दुक्खविमोक्खणं ॥
 [१०२८] पोरिसीए चउब्भाए , वंदित्ताणं तओ गुरुं ।
 अपडिक्कमित्ता कालस्स , भायणं पडिलेहए ॥
 [१०२९] मुहपोत्तिं पडिलेहित्ता , पडिलेहिज्ज गोच्छगं ।

अज्झयणं-२६

- गोच्छगलइयंगुलिओ, वत्थाइं पडिलेहए ॥
 [१०३०] उड्ढं थिरं अत्तरियं , पुच्चं ता वत्थमेव पडिलेहे ।
 तो बिइयं पप्फोडे , तइयं च पुणो पमज्जिज्जा ॥
 [१०३१] अनच्चावियं अवलियं , अनानुबंधिं अ मोसलिं चेव ।
 छप्पुरिमा नव खोडा , पाणीपाणिविसोहणं ॥
 [१०३२] आरभडा सं मद्दा, वज्जेयव्वा य मोसली तइया ।
 पप्फोडणा चउत्थी , विक्खित्ता वेइया छ ड्ढी ॥
 [१०३३] पसिढिलपलंबलोला, एगामोसा अ नेगरूवधुणा ।
 कुणइ पमाणि पमायं , संकिय गणणोवगं कुज्जा ॥
 [१०३४] अनूनाइरित्तपडिलेहा, अविचच्चासा तहेव य ।
 पढमं पयं पसत्थं , सेसाणि उ अप्पसत्थाइं ॥
 [१०३५] पडिलेहणं कुणं तो, मिहो कहं कुणइ ज नवयकहं वा ।
 देइ व पच्चक्खाणं , वाएइ सयं पडिच्छइ वा ॥
 [१०३६] पुढवी-आउक्काए, तेऊ-वाऊ-वणस्सइ-तसाणं ।
 पडिलेहणा अपम त्तो, छण्हं पि विराहओ होइ ॥
 [१०३७] तइयाए पोरिसीए , भत्तं पा नं गवेसए ।
 छण्हं अन्नतरा गंमि, कारणंमि समु द्विए ॥
 [१०३८] वेयण वेयावच्चे , इरियद्वाए य संजम द्वाए ।
 तह पाणवत्तियाए , छट्ठं पुण धम्मचिं ताए ॥
 [१०३९] निग्गंथो धिइमं तो, निग्गंथी वि न करेज्ज छहिं चेव ।

- ठाणेहिं उ इमेहिं , अणइक्कमणा य से होइ ॥
- [१०४०] आयंके उवसग्गे , तित्तिक्खया बं भचेरगुत्तीसु ।
पाणिदया तवहेउं , सरीवोच्छेयणद्वाए ॥
- [१०४१] अवसेसं भं डगं गिज्झा , चक्खुसा पडिलेहए ।
परमद्धजोयणाओ, विहारं विहरे मु नी ॥
- [१०४२] चउत्थीए पोरिसीए , निक्खिवित्ताण भायणं ।
सज्झायं च तओ कुज्जा , सव्वभावविभावणं ॥
- [१०४३] पोरिसीए चउब्भाए , वंदित्ताण तओ गुरुं ।
पडिक्कमित्ता कालस्स , सेज्जं तु पडिलेहए ॥
- [१०४४] पासवणुच्चारभूमिं च , पडिलेहिज्जा जयं जई ।
काउस्सग्गं तओ कुज्जा , सव्वदुक्खविमोक्खणं ॥
- [१०४५] देवसियं च अईयारं , चिंतिज्जा अ नुपुव्वसो ।
नाणे य दंसणे चेव , चरित्तंमि तहेव य ॥
- [१०४६] पारिय काउस्सग्गो, वंदित्ताण तओ गुरुं ।

अज्झयणं-२६

- देवसियं तु अईयारं , आलोएज्ज जहक्कम्मं ॥
- [१०४७] पडिक्कमित्ताण निस्सल्लो , वंदित्ताण तओ गुरुं ।
काउस्सग्गं तओ कुज्जा , सव्वदुक्खविमोक्खणं ॥
- [१०४८] सिद्धाणं संथवं किच्चा वंदित्ताण तओ गुरुं ।
थुइमंगलं च काऊणं , कालं संपडिलेहए ॥
- [१०४९] पढमं पोरिसि सज्झायं , बिइयं झाणं झियायई ।
तइयाए निद्धमोक्खं तु , सज्झायं तु चउत्थिए ॥
- [१०५०] पोरिसीए चउत्थीए , कालं तु पडिलेहि ए ।
सज्झायं तु तओ कुज्जा , अबोहंतो असंजए ॥
- [१०५१] पोरिसीए चउब्भा ए, वंदित्ताण तओ गुरुं ।
पडिक्कमित्तु कालस्स कालं तु पडिलेहए ॥
- [१०५२] आगए कायवोस्सग्गे , सव्वदुक्खविमोक्खणे ।
काउस्सग्गं तओ कुज्जा , सव्वदुक्खविमोक्खणं ॥
- [१०५३] राइयं च अईयारं , चिंतिज्ज अ नुपुव्वसो ।
नाणंमि दंसणंमि य , चरित्तंमि तवंमि य ॥
- [१०५४] पारियकाउस्सग्गो, वंदित्ताण तओ गुरुं ।
राइयं तु अईयारं , आलोएज्ज जहक्कम्मं ॥
- [१०५५] पडिक्कमित्तु निस्सल्लो , वंदित्ताण तओ गुरुं ।
काउस्सग्गं तओ कुज्जा , सव्वदुक्खविमोक्खणं ॥
- [१०५६] किं तवं पडिवज्जामि ?, एवं तत्थ विचिं तए ।

- काउस्सग्गं तु पारित्ता , करिज्जा जि नसंथवं ॥
 [१०५७] पारियकाउस्सग्गो, वंदित्ताण तओ गुरुं ।
 तवं संपडिवज्जेत्ता , कुज्जा सिद्धाण संथवं ॥
 [१०५८] एसा सामायारी , समासेण वियाहिया ।
 जं चरित्ता बहू जीवा , तिण्णा संसारसागरं ॥ त्ति बेमि
 • छर्वीसइमं अज्झयणं सम्मत्तं •

• सत्तावीसइमं अज्झयणं - खलुंकिज्जं •

- [१०५९] थेरे गणहरे गग्गे , मुनी आसि विसारए ।
 आइण्णे गणिभावं मि, समाहिं पडिसंधए ॥
 [१०६०] वहणे वहमाणस्स , कंतारं अइवत्तई ।
 जोगे वहमाणस्स , संसारो अइवत्तई ॥
 [१०६१] खलुंके जो उ जोएइ , विहम्ममाणो किलिस्सई ।
 असमाहिं च वेएइ , तोत्तओ य से भज्जई ॥

अज्झयणं-२७

- [१०६२] एगं डसइ पुच्छं मि, एगं विं धइऽभिक्खणं ।
 एगो भंजइ समिलं , एगो उप्पहप द्विओ ॥
 [१०६३] एगो पडइ पासेणं , निवेसइ निविज्जई ।
 उक्कुद्धइ उप्फिडइ , सढे बालगवी वए ॥
 [१०६४] माई मुद्धेण पडइ , कुद्धे गच्छइ पडिप्पहं ।
 मयलक्खेण चिद्धई , वेगेण य पहावई ॥
 [१०६५] छिन्नाले छिं दई सेल्लिं , दुद्धंतो भंजए जुगं ।
 सेऽवि य सुस्सुयाइत्ता , उज्जाहित्ता पलायए ॥
 [१०६६] खलुंका जारिसा जोज्जा , दुस्सीसा वि हु तारिसा ।
 जोइया धम्मजाणं मि, भज्जंती धिइदुब्बला ॥
 [१०६७] इद्धीगारविए एगे , एगेऽत्थ रसगारवे ।
 सायागारविए एगे , एगे सुचिरकोहणे ॥
 [१०६८] भिक्खाऽऽलसिए एगे , एगे ओमाणभीरुए थद्धे ।
 एगे च अनुसासंमि, हेऊहिं कारणेहि य ॥
 [१०६९] सो वि अं तरभासिल्लो, दोसमेव पकुव्वई ।
 आयरियाणं तु वयणं , पडिकूलेइ अ भिक्खणं ॥
 [१०७०] न सा ममं वियाणाइ , न वि सा मज्झ दाहिई ।
 निग्गया होहिई मन्ने , साहू अन्नोऽत्थ वज्जउ ॥
 [१०७१] पेसिया पलिउंचं ति, ते परियं ति समं तओ ।
 रायवेट्ठिं च मन्नं ता, करंति भिउडिं मुहे ॥

- [१०७२] वाइया संगहिया चेव , भत्तपाणेहिं पोसिया ।
जायपक्खा जहा हंसा , पक्कमंति दिसो दिसिं ॥
- [१०७३] अह सारही विचिं तेइ, खलुंकेहिं समागओ ।
किं मज्झं दु इसीसेहिं?, अप्पा मे अवसीयई ॥
- [१०७४] जारिसा मम सीसा उ , तारिसा गलिगद्धहा ।
गलिगद्धहे जहित्ताणं , दढं पगिण्हई तवं ॥
- [१०७५] मिउमद्धवसंपन्नो, गंभीरो सुसमाहिओ ।
विहरइ महिं महप्पा , सीलभूएण अप्पणा ॥ त्ति बेमि
• सत्तावीसइमं अज्झयणं सम्मत्तं •

• अट्ठावीसइमं अज्झयणं - मोकखमग्गइ •

- [१०७६] मोकखमग्गइ तच्चं , सुणेह जि नभासियं ।
चउकारणसंजुत्तं, नाणदंसणलक्खणं ॥
- [१०७७] नाणं च दंसणं चेव , चरित्तं च तवो तहा ।

अज्झयणं-२८

- [१०७८] एस मग्गु त्ति पन्नत्तो , जिणेहिं वरदंसिहिं ॥
नाणं च दंसणं चेव , चरित्तं च तवो तहा ।
एयं मग्गम नुप्पत्ता, जीवा गच्छं ति सुग्गई ॥
- [१०७९] तत्थ पंचविहं नाणं , सुयं आभिनिबोहियं ।
ओहिनाणं तु तइयं , मणनाणं च केवलं ॥
- [१०८०] एयं पंचविहं ना णं, दव्वाण य गुणाण य ।
पज्जवाणं च सव्वेसिं , नाणं नाणीहिं देसियं ॥
- [१०८१] गुणाणं आ सओ दव्वं , एगदव्वस्सिया गुणा ।
लक्खणं पज्जवाणं तु , उभओ अस्सिया भवे ॥
- [१०८२] धम्मो अहम्मो आगासं , कालो पुग्गल-जं तवो ।
एस लोगो त्ति पन्नत्तो , जिणेहिं वरदंसिहिं ॥
- [१०८३] धम्मो अहम्मो आगासं , दव्वं इक्किक्कमाहियं ।
अनंताणि य दव्वाणि , कालो पुग्गलजं तवो ॥
- [१०८४] गइलक्खणो उ धम्मो , अहम्मो ठाणलक्खणो ।
भायणं सव्वदव्वाणं , नहं ओगाहलक्खणं ॥
- [१०८५] वत्तणालक्खणो कालो , जीवो उवओगलक्खणो ।
नाणेणं दंसणेणं च , सुहेण य दुहेण य ॥
- [१०८६] नाणं च दंसणं चेव , चरित्तं च तवो तहा ।
वीरियं उवओगो य , एयं जीवस्स लक्खणं ॥
- [१०८७] सद्धयार-उज्जोओ, पभा छायास्सतवो इ वा ।

- वण्णरसगंधफासा, पुग्गलाणं तु लक्खणं ॥
- [१०८८] एगत्तं च पुहत्तं च , संखा संठाणमेव य ।
संजोगा य विभागा य , पज्जवाणं तु लक्खणं ॥
- [१०८९] जीवाऽजीवा य बं धो य , पुण्णं पावाऽऽसवो तथा ।
संवरो निज्जरा मोक्खो , संतेण तहिया नव ॥
- [१०९०] तहियाणं तु भावाणं , सब्भावे उवएसणं ।
भावेणं सद्दहं तस्स, सम्मत्तं, तं वियाहियं ॥
- [१०९१] निसग्गुवएसरुई, आणारुई सुत्त-बीयरुइमेव ।
अभिगम-वित्थाररुई, किरिया-संखेव धम्मरुई ॥
- [१०९२] भूयत्थेणाहिगया, जीवाऽजीवा य पुण्ण पावं च ।
सह सं मुइयासव संवरो, रोएइ उ निस्सग्गो ॥
- [१०९३] जो जि नदिट्ठे भावे , चउत्विहे सद्दहाइ सयमेव ।
एमेव नन्नह त्ति य , स निसग्गरुई त्ति नायव्वो ॥
- [१०९४] एए चेव उ भावे , उवइट्ठे जो परेण सद्दहई ।

अज्झयणं-२८

- छउमत्थेण जिणेण व , उवएसरुइ त्ति नायव्वो ॥
- [१०९५] रागो दोसो मोहो , अन्नाणं जस्स अवगयं होइ ।
आणाए रोयंतो , सो खलु आणारुई नामं ॥
- [१०९६] जो सुत्तमहिज्जं तो, सुएण ओगाहई उ सम्मत्तं ।
अंगेण बहिरेण व , सो सुत्तरुई त्ति नायव्वो ॥
- [१०९७] एगेण अ नेगाइं, पयाइं जो पसरई उ सम्मत्तं ।
उदए व्व तेल्लबिं दू, सो बीयरुई त्ति नायव्वो ॥
- [१०९८] सो होइ अभिगमरुई , सुयनाणं ज स्स अत्थओ दिट्ठं ।
एक्कारस अंगाइं , पइण्णगं दि ट्ठिवाओ य ॥
- [१०९९] दव्वाण सव्वभावा , सव्वपमाणेहिं जस्स उवलद्धा ।
सव्वाहिं नयविहीहिं , वित्थाररुइ त्ति नायव्वो ॥
- [११००] दंसणनाणचरित्ते, तवविनए सच्चसमिइगुत्तीसु ।
जो किरियाभावरुई , सो खलु किरियारुई नाम ॥
- [११०१] अनभिग्गहियकुदिट्ठी, संखेवरुइ त्ति होइ नायव्वो ।
अविसारओ पवयणे , अणभिग्गहिओ य सेसेसु ॥
- [११०२] जो अत्थिकायधम्मं , सुयधम्मं खलु चरित्तधम्मं च ।
सद्दहइ जिणाभिहियं , सो धम्मरुइ त्ति नायव्वो ॥
- [११०३] परमत्थसंथवो वा , सुदिट्ठपरमत्थसेवणं वा वि ।
वावन्नकुदंसणवज्जणा, य सम्मत्तसद्दहणा ॥
- [११०४] नत्थि चरित्तं सम्मत्तविहूणं , दंसणे उ भइयव्वं ।

- सम्मत्तचरित्ताइं, जुगवं पुव्वं व सम्मत्तं ॥
- [११०५] नादंसणिस्स नाणं , नाणेण विणा न हुं ति चरणगुणा ।
अगुणिस्स नत्थि मोकखो , नत्थि अमोकखस्स निव्वाणं ॥
- [११०६] निस्संकिंय-निक्कंखिय-निव्वितिगिच्छा अमूढदि ढी य ।
उववूह थिरीकरणे, वच्छल्ल पभावणे अ ढ ॥
- [११०७] सामाइयस्स पढमं , छेदोवद्वावणं भवे बीयं ।
परिहारविसुद्धीयं, सुहुमं तह संपरायं च ॥
- [११०८] अकसायं अ हक्खायं, छउमत्थस्स जि नस्स वा ।
एयं चयरित्तकरं , चारित्तं होइ आहियं ॥
- [११०९] तवो य दुविहो वुत्तो , बाहिरंस्संभंतरो तहा ।
बाहिरो छव्विहो वुत्तो , एवमब्भित्तरो तवो ॥
- [१११०] नाणेण जाणई भावे , दंसणेण य सद्धे ।
चरित्तेण निगिण्हाइ , तवेण परिसुज्झई ॥
- [११११] खवेत्ता पुव्वकम्मइं , संजमेण तवेण य ।

अज्झयणं-२८

सव्वदुक्खपहीणद्वा, पक्कमंति महेसिणो ॥ त्तिबेमि

• अद्वावीसइमं अज्झयणं सम्मत्तं •

• एगूणतीसइमं अज्झयणं - सम्मत्तपरक्कमे •

[१११२] सुयं मे आउसं ! तेण भगवया एवमक्खायं । इह खलु सम्मत्तपरक्कमे नाम अज्झयणे समणेणं भगवया महावीरेणं कासवेणं पवेइए , जं सम्मं सद्धे इत्ता पत्ति याइत्ता रोयइत्ता फासित्ता पालइत्ता तीरिता कित्तइत्ता सोहइत्ता आराहित्ता आणाए अ नुपालइत्ता बहवे जीवा सिज्झंति बुज्झंति मुच्चंति परिनिव्वायंति सव्वदुक्खाणमंतं करंति ।

[१११३] तस्स णं अयमद्दे एवम्माहिज्जइ , तं जहाः- संवेगे, निव्वेए , धम्मसद्धा , गुरुसाहम्मियसुस्सूणया, आलोयणया , निं दणया, गरिहणया , सामाइए , चउव्वीसत्थ ए, वं दणए, पडिक्कमणे, काउस्सग्गे , पच्चक्खाणे , थयथुईमंगले , कालपडिलेहणया , पायच्छित्तकरणे , खमावयणया , सज्झाए, वायणया , पडिपुच्छणया , परियट्टणया , अणुप्पेहा , धम्मकहा , सुयस्स आराहणया , एगग्गमनसंनिवेसणया, संजमे , तवे , वोदाणे , सुहसाए , अप्पडिबद्धया , विवित्तसयणासणसेवणया , विणियट्टणया, संभोगपच्चक्खाणे, उवहिपच्चक्खाणे, आहारपच्चक्खाणे,....

कसायपच्चक्खाणे, जोगपच्चक्खाणे, सरीरपच्चक्खाणे, सहायपच्चक्खाणे, भत्तपच्चक्खाणे, सव्वभावपच्चक्खाणे, पडिरूवणया, वेयावच्चे, सव्वगुणसंपन्नया, वीयरागया, खंती, मुत्ती, मद्धवे, अज्जवे, भावसच्चे, करणसच्चे , जोगसच्चे , म नगुत्तया, वयगुत्तया , कायगुत्तया , म नसमाधारणया, वयसमाधारणया, कायसमाधारणया , नाणसंपन्नया , दंसणसंपन्नया , चरित्तसंपन्नया , सोइं दियनिग्गहे, चक्खिंदियनिग्गहे, घाणिं दियनिग्गहे, जि ब्भिंदियनिग्गहे, फासिं दियनिग्गहे, कोहविजए , मा नविजए, मायाविजए, लोहविजए, पेज्जदोसमिच्छादंसणविजए, सेलेसी, अकम्मया ।

[१११४] संवेगेणं भं ते! जीवे किं जणयइ ? । संवेगेणं अ नुत्तरं धम्मसद्धं जणयइ । अनुत्तराए धम्मसद्धाए संवेगं हव्वमागच्छइ । अ नंतानुबंधिकोहमानमायालोभे खवेइ । नवं च कम्मं न बंधइ । तप्पच्चइयं च णं मिच्छत्तविसोहिं काऊण दंसणाराहए भवइ । दंसणविसोहीए य णं विसुद्धाए अत्थेगइए तेणेव णं भवग्गहणेणं सिज्झंति बुज्झंति विमुच्चंति परिनिव्वायंति सव्वदुक्खाणमंतं करंति । विसोहीए य णं विसुद्धाए तच्चं पुणो भवग्गहणं नाइक्कमइ ।

[१११५] निव्वेएणं भंते जीवे किं जणयइ ? । निव्वेएणं दिव्वमाणुस तेरिच्छिएसु कामभोगेसु निव्वेयं हव्वमागच्छइ । सव्वविसएसु विरज्जइ । सव्वविसएसु विरज्जमाणे आरं भपरिच्चायं करेइ । आरंभपरिच्चाय करेमाणे संसारमग्गं वोच्छिंदइ, सिद्धिमग्गं पडिवन्ने य हवइ ।

[१११६] धम्मसद्धाए णं भं ते! जीवे किं जणयइ ? धम्मसद्धाए णं सायासोक्खेसु रज्जमाणे विरज्जइ । आगारधम्मं च णं चयइ अ नगारिए णं जीवे सारीरमानसाणं दुक्खाणं छेयणभेयण संजोगाईणं वोच्छेयं करेइ अच्चाबाहं च सुहं निव्वत्तेइ ।

[१११७] गुरुसाहम्मियसुस्सूसाणाए णं भं ते! जीवे किं जणयइ ? । गुरुसाहम्मियसुस्सूसाणाए णं वि नयपडिवत्तिं जणयइ । वि नयपडिवन्ने य णं जीवे अ नच्चासायणसीले नेरइयतिरिक्खजोणिय मणुस्सदेव-दुग्गईओ निरुंभई । वण्णसंजलणभत्तिबहुमानयाए माणुस्सदेवगईओ निबंधई, सिद्धिं सोग्गइं च अज्झयणं-२९

विसोहेइ । पसत्थाइं च णं वि नयमूलाइं सव्वकज्जाइं साहेइ । अन्ने य बहवे जीवे विणिइत्ता भवइ ।

[१११८] आलोयणाए णं भंते! जीवे किं जणयइ? । आलोयणाए णं मायानियाण-मिच्छादंसण-सल्लाणं मोक्खमग्गविग्घाणं अ नंतसंसारबंधणाणं उद्धरणं करेइ । उज्जुभावं च जणयइ । उज्जुभाव पडिवन्ने य णं जीवे अमाई इत्थीवेयं नपुंसगवेयं च न बंधइ । पुव्वबद्धं च णं निज्जरेइ ।

[१११९] निंदणयाए णं भंते! जीवे किं जणयइ ? । निंदणयाए णं पच्छाणुतावं जणयइ । पच्छाणुतावेणं विरज्जमाणे करणगुणसेढिं पडिवज्जइ । करणगुणसेढीपडिवन्ने य णं अ नगारे मोहणिज्जं कम्मं उग्घाएइ ।

[११२०] गरहणयाए णं भं ते! जीवे किं जणयइ ? गरहणयाएणं अपुरक्कारं जणयइ । अपुरक्काराए णं जीवे अप्पसत्थेहिंतो जोगेहिंतो नियत्तेइ, पसत्थे य पडिवज्जइ । पसत्थजोगं पडिवन्ने य णं अनगारे अनंतघाइपज्जवे खवेइ ।

[११२१] सामाइएणं भं ते! जीवे किं जणयइ ? सामाइएणं सावज्जजोगविरइं जणयइ ।

[११२२] चउव्वीसत्थएणं भंते! जीवे किं जणयइ ? चउवीसत्थएणं दंसणविसोहिं जणयइ ।

[११२३] वंदनएणं भंते! जीवे किं जणयइ ? वंदनएणं नीयागोयं कम्मं खवेइ । उच्चागोयं कम्मं निबंधइ । सोहग्गं च णं अपडिहयं आणाफलं निव्वत्तेइ । दाहिणभावं च णं जणयइ ।

[११२४] पडिक्कमणेणं भं ते! जीवे किं जणयइ ? पडिक्कमणेणं वयच्छिद्वाणि पिहेइ । पिहियवयच्छिद्दे पुण जीवे निरुद्धासवे असबलचरित्ते अडुसु पवयणमायासु उवउत्ते अपुहत्ते सुप्पणिहिए विहरइ ।

[११२५] काउसग्गेणं भंते! जीवे किं जणयइ ? काउ० तीयपडुप्पन्नं पायच्छित्तं विसोहेइ । विसुद्धपायच्छित्ते य जीवे निव्वुयहियए ओहरियभरुव्वं भारवहे पसत्थज्झाणोवगाए सुहं सुहेणं विहरइ ।

[११२६] पच्चक्खाणेणं भंते! जीवे किं जणयइ ? । पच्चक्खाणेणं आसवदाराइं निरुं भइ ।

पच्यक्खाणेणं इच्छानिरोहं जणयइ इच्छानिरोहं गए य णं जीवे सव्वदव्वेसु वि नीयतण्हे सीइभूए विहरई ।
[११२७] थयथुइमंगलेणं भं ते! जीवे किं जणयइ ? । थ यथुइमंगलेणं
नाणदंसणचरित्तबोहिलाभं जणयइ । नाणदंसणचरित्तबोहिलाभसंपन्ने य णं जीवे अं तकिरियं
कप्पविमाणोववत्तिगं आराहणं आराहेइ ।

[११२८] कालपडिलेहणयाए णं भंते! जीवे किं जणयइ ? । कालपडिलेहणयाए नाणावरणिज्जं
कम्मं खवेइ ।

[११२९] पायच्छित्तकरणेणं भं ते! जीवे किं जणयइ ? । पा यच्छित्त करणेणं
पावकम्मविसोहिं जणयइ । निरइयारे आवि भवइ । सम्मं च णं पायच्छित्तं पडिच्छित्तं पडिवज्जमाणे
मग्गं च मग्गफलं च विसोहेइ, आयारं च आयारफलं च आराहेइ ।

[११३०] खमावणयाए णं भंते! जीवे किं जणयइ? । खमावणयाए णं पल्हायणभावं जणयइ ।
पल्हायणभावमुवगए य सव्वपाणभूयजीवसत्तेसु मित्तीभावं उ प्पाएइ मित्तीभावमुवगए यावि जीवे
भावविसोहिं काऊण निब्भए भवइ ।

[११३१] सज्झाएणं भंते! जीवे किं जणयइ ? । सज्झाएणं नाणावरणिज्जं कम्मं खवेइ ।

[११३२] वायणाए णं भं ते जीवे किं जणयइ ? । वायणाए निज्जरं जणयइ । सुयस्स य
अनुसज्जणाए अनासायणे, वट्टए । सुयस्स अनुसज्जणाए अनासायणाए वट्टमाणे तित्थधम्मं अवलंबइ ।
अज्झयणं-२९

तित्थ धम्मं अवलंबमाणे महानिज्जरे महापज्जवसाणे भवइ ।

[११३३] पडिपुच्छणयाए णं भंते! जीवे किं जणयइ ? । पडिपुच्छणाए णं सुत्तत्थ तदुभयाइं
विसोहेइ । कंखामोहणिज्जं कम्मं वोच्छिंदइ ।

[११३४] परियट्टणाए णं भं ते! जीवे किं जणयइ ? । परियट्टणाए णं वंजणाइं जणयइ ,
वंजणलद्धिं च उप्पाइए ।

[११३५] अणुप्पेहाए णं भंते! जीवे किं जणयइ ? । अणुप्पेहाए आउयवज्जाओ सत्तकम्मप्प-
गडीओ घणियबंधणबद्धाओ सिट्ठिलबंधणबद्धाओ पकरेइ । दीहकाल द्विइयाओ हस्सकाल द्विइयाओ पकरेइ ।
तिव्वाणुभावाओ मंदाणुभावाओ पकरेइ । बहुपएसग्गाओ अप्पएसग्गाओ पकरेइ, आउयं च णं कम्मं सिया
बंधइ, सिय नो बंधइ । असायावेयणिज्जं च णं कम्मं नो भुज्जो भुज्जो उवचिणाइ । अ नाइयं च णं
अनवदग्गं दीहमद्धं चाउरंत संसारकंतारं खिप्पामेव वीइवयइ ।

[११३६] धम्मकहाए णं भंते! जीवे किं जणयइ ? । धम्मकहाए णं कम्म-निज्जरं जणयइ ।
धम्मकहाए णं पवयणं पभावेइ । पवयण पभावेणं जीवे आगमेसस्स भदत्ताए कम्मं निबं धइ ।

[११३७] सुयस्स आराहणयाए णं भंते! जीवे किं जणयइ ? । सुयस्स आराहणाए णं अन्नाणं
खवेइ न य संकिलिस्सइ ।

[११३८] एगग्गमनसंनिवेसणयाए णं भंते! जीवे किं जणयइ ? । एगग्गमन-संनिवेसणयाए णं
चित्तनिरोहं करेइ ।

[११३९] संजमेणं भंते! जीवे किं जणयइ? । संजमेणं अणण्हयत्तं जणयइ ।

[११४०] तवेणं भंते! जीवे किं जणयइ? । तवेणं वोदाणं जणयइ ।

[११४१] वोदाणेणं भं ते! जीवे किं जणयइ ? । वोदाणेणं अकिरियं जणयइ । अकिरियाए

भवित्ता तओ पच्छा सिज्झइ, बुज्झइ, मुच्चइ परिनिव्वायइ सव्वदुक्खाणमंतं करेइ ।

[११४२] सुहसाएणं भंते ! जीवे किं जणयइ ? । सु हसाएणं अणुस्सुयत्तं जणयइ । अणुस्सुयाए णं जीवे अनुकंपाए अणुब्भडे विगयसोगे चरित्तमोहणिज्जं कम्मं खवेइ ।

[११४३] अप्पडिबद्धयाए णं भंते जीवे किं जणयइ ? अप्पडिबद्धयाए निस्संग्गतं जणयइ । निस्संग्गत्तेणं जीवे एगे एगग्गचित्ते दिया य राओ य असज्जमाणे अप्पडिबद्धे यावि विहरइ ।

[११४४] विवित्तसयणासणयाए णं भंते ! जीवे किं जणयइ ? । वि वित्तसयणासणयाए णं चरित्तगुत्तिं जणयइ । चरित्तगुत्ते य णं जीवे विवित्ताहारे दढचरित्ते एगं तरए मोक्खभावपडिवन्ने अट्ठविहं कम्मगंढिं निज्जरेइ ।

[११४५] विनियट्ठणयाए णं भंते ! जीवे किं जणयइ ? । वि नियट्ठणयाएणं पावकम्माणं अकरणयाए अब्भुट्ठेइ । पुव्वबद्धाण य निज्जरणयाए पावं नियत्तेइ । तओ पच्छा चाउरं त संसारकं तारं वीईवयइ ।

[११४६] संभोगपच्चक्खाणेणं भंते! जीवे किं जणयइ ? । संभोग पच्चक्खाणे णं आलंबणाइं खवेइ । निरालं बणस्स य आय यट्ठिया योगा भवं ति । सएणं लाभेणं संतूस्सइ , परलाभं नो आसादेइ , नो तक्केइ, नो पीहेइ, नो पत्थेइ, नो अभिलसइ । परलाभं अणास्सायमाणे अतक्केमाणे अपीहेमाणे अपत्थेमाणे अनभिलसमाणे दुच्चं सुहसेज्जं उवसंपज्जित्ता णं विहरइ ।

अज्झयणं-२९

[११४७] उवहिपच्चक्खाणेणं भंते ! जीवे किं जणयइ ? । उ वहिपच्चक्खाणेणं अपलिमं थं जणयइ । निरुवहिए णं जीवे निक्कंखे उवहिमंतरेण य न संकिलिस्सई ।

[११४८] आहारपच्चक्खाणेणं भंते ! जीवे किं जणयइ ? । आ हार पच्चक्खाणेणं जीविया-संसप्पओगं वोच्छिंदइ । जीवियासंसप्पओगं वोच्छिंदित्ता जीवे आहारमंतरेणं न संकिलिस्सइ ।

[११४९] कसायपच्चक्खाणेणं भंते! जीवे किं जणयइ ? । कसाय पच्चक्खाणेणं वीयरगभावं जणयइ । वीयरगभावं पडिवन्नेऽवि य णं जीवे समसुहदुक्खे भवइ ।

[११५०] जोगपच्चक्खाणेणं भंते ! जीवे किं जणयइ ? । जो गपच्चक्खाणेणं अजोगत्तं जणयइ । अजोगी णं जीवे नवं कम्मं न बंधइ, पुव्वबद्धं च निज्जरेइ ।

[११५१] सरीरपच्चक्खाणेणं भंते ! जीवे किं जणयइ ? सरीर पच्चक्खाणेणं सिद्धाइ सयगुणकित्तणं निव्वत्तेइ । सिद्धाइ सयसगुणसंपन्ने य णं जीवे लोगग्गमुवगए परमसुही भवइ ।

[११५२] सहायपच्चक्खाणेणं भंते ! जीवे किं जणयइ ? सहायपच्चक्खाणे णं एगीभावं जणयइ । एगीभावभूए य जीवे एगत्तं भावेमाणे अप्पसद्धे अप्पझंझे अप्पकलहे अप्पकसाए अप्पतुमंतुमे संजमबहुले संवरबहुले समाहिए यावि भवइ ।

[११५३] भत्तपच्चक्खाणेणं भंते! जीवे किं जणयइ ? भत्तपच्चक्खाणेणं अनेगाइं भवसयाइं निरुंभइ ।

[११५४] सब्भावपच्चक्खाणेणं भंते! जीवे किं जणयइ ? । सब्भाव पच्चक्खाणे णं अनियट्ठिं जणयइ । अनियट्ठिं पडिवन्ने य अनगारे चत्तारि केवलिकम्मंसे खवेइ , तं जहा- वेयणिज्जं आउयं नामं गोयं, तओ पच्छा सिज्झइ बुज्झइ मुच्चइ सव्वदुक्खाणमंतं करेइ ।

[११५५] पडिरूवयाए णं भंते ! जीवे किं जणयइ ? । पडिरूवयाए णं लाघवियं जणयइ ।

लघुभूए णं जीवे अप्पमत्ते पागडलिंगे पसत्थलिंगे विसुद्धसम्मत्ते सत्तसमिइसमत्ते
सव्वपाणभूयजीवसत्तेसु वीससणिज्जरूवे अप्पडिलेहे जिइंदिए विउलतवसमिइसमन्नागए यावि भवइ ।

[११५६] वेयावच्चेणं भंते! जीवे किं जणयइ ? । वेयावच्चेणं तित्थयरनामकम्मं निबं धइ ।

[११५७] सव्वगुणसंपन्नयाए णं भंते! जीवे किं जणयइ ? । सव्वगुणसंपन्नयाए अपुनरावत्तिं
जणयइ । अपुनरावत्तिं पत्तए य णं जीवे सारीरमानसाणं दुक्खाणं नो भागी भवइ ।

[११५८] वीयरामयाए णं भंते जीवे किं जणयइ ?० नेहाणुबंधणाणि तण्हाणुबंधणाणि य
वोच्छिंदइ, मणुन्नामणुन्नेसु सद्धफरिसरूरसगंधेसु सच्चित्ताचित्तमीसएसु चेव विरज्जइ ।

[११५९] खंतीए णं भंते ! जीवे किं जणयइ ? । खं तीए णं परीसहे जिणइ ।

[११६०] मुत्तीए णं भंते! जीवे किं जणयइ ? मुत्तीए णं अकिंचणं जणयइ । अकिंचणे य
जीवे अत्थलोलाणं पुरिसाणं अपत्थणिज्जो भवइ ।

[११६१] अज्जवयाए णं भंते! जीवे किं जणयइ ? । अज्जवयाए णं काउज्जुययं भावुज्जुययं
भासुज्जुययं अविसंवायणं जणयइ । अविसंवायणसंपन्नयाए णं जीवे धम्मस्स आराहए भवइ ।

[११६२] मद्दवयाए णं भंते ! जीवे किं जणयइ ? । मद्दवयाए णं अनुस्सियत्तं जणयइ ।
अनुस्सियत्तेण जीवे मिउमद्दवसंपन्ने अद्द मयद्दाणाइं निद्दावेइ ।

[११६३] भावसच्चेणं भंते! जीवे किं जणयइ ? । भावसच्चेणं भावविसोहिं जणयइ ।

अज्झयणं-२९

भावविसोहिए वट्टमाणे जीवे अरहं तपन्नत्तस्स धम्मस्स आराहणयाए अब्भुट्टेइ । अरहं त
पन्नत्तस्स धम्मस्स आराहणयाए अब्भुट्टित्ता परलोगधम्मस्स आराहए भवइ ।

[११६४] करणसच्चेणं भंते! जीवे किं जणयइ ? । करणसच्चेणं करणसत्तिं जणयइ ।
करणसच्चे वट्टमाणे जीवे जहावाई तहाकारी यावि भवइ ।

[११६५] जोग सच्चेणं भंते ! जीवे किं जणयइ ? । जो गसच्चेणं जोगं विसोहेइ ।

[११६६] मनगुत्तयाए णं भंते! जीवे किं जणयइ ? । मणगुत्तयाए जीवे एगग्गं जणयइ ।
एगग्गचित्ते णं जीवे मणगुत्ते संजमाराहए भवइ ।

[११६७] वयगुत्तयाए णं भंते ! जीवे किं जणयइ ? । वयगुत्तयाए निव्वियारं जणयइ ।
निव्वियारे णं जीवे वइगुत्ते अज्झप्पजोगसाहणजुत्ते यावि विहरइ ।

[११६८] कायगुत्तयाए णं भंते! जीवे किं जणयइ ? । कायगुत्तयाए संवरं जणयइ । संवरेणं
कायगुत्ते पुणो पावासवनिरोहं करेइ ।

[११६९] मनसमाहारणयाए णं भंते! जीवे किं जणयइ ? मनसमाहारणयाए एगग्गं जणयइ ।
एगग्गं जणइत्ता नाणपज्जवे जणयइ । नाणपज्जवे जणइत्ता सम्मत्तं विसोहेइ, मिच्छत्तं च निज्जरेइ ।

[११७०] वइसमाहारणयाए णं भंते! जीवे किं जणयइ ? वइसमाहारणं णं वइसमाहारणं दंसण-
पज्जवे विसोहेइ । वइसमादंसणपज्जवे विसोहित्ता सुलहबोहियत्तं निव्वत्तेइ, दुल्लहबोहियत्तं निज्जरेइ ।

[११७१] कायसमाहारणयाए णं भंते जीवे किं जणयइ ? । कायसमाहारणयाए णं
चरित्तपज्जवे विसोहेइ । चरित्तपज्जवे विसोहिता अहक्खायचरित्तं विसोहेइ । अहक्खायचरित्तं विसोहेता
चत्तारि केवलिकम्मंसे खवेइ । तओ पच्छा सिज्झइ बुज्झइ मुच्चइ परिनिव्वायइ सव्वदुक्खाणमंतं करेइ ।

[११७२] नाणसंपन्नयाए णं भंते! जीवे किं जणयइ ? । नाणसंपन्नयाए णं जीवे सव्वभा -

वाहिंगमं जणयइ । नाणसंपन्ने णं जीवे चाउरं ते संसारकंतारे न विणस्सइ । नाणवि नय- तवचरित्तजोगे संपाउणइ, ससमयपरसमयविसारए य असंधायणिज्जे भवइ ।

[११७३] जहा सूइ ससुत्ता पडिया वि न विनस्सइ ।

तहा जीवे ससुत्ते संसारे न विनस्सइ ॥

[११७४] दंसणसंपन्नयाए णं भंते! जीवे किं जणयइ ? दंसण संपन्नयाए णं भवमिच्छत्त छेयणं करेइ, परं न विज्जायइ । परं अविज्जाएमाणे अ नुत्तरेणं नाणदंसणेणं अप्पाणं संजोएमाणे सम्मं भावेमाणे विहरइ ।

[११७५] चरित्तसंपन्नयाए णं भंते! जीवे किं जणयइ ? चरित्त संपन्नयाए णं सेलेसीभावं जणयइ । सेलेसिं पडिवन्ने य अ नगारे चत्तारि केवलिकम्मंसे खवेइ । तओ पच्छा सिज्झइ बुज्झइ मुच्चइ परिनिव्वायइ सव्वदुक्खाणमंत करेइ ।

[११७६] सोइंदियनिग्गहेणं भंते! जीवे किं जणयइ ? सोइंदिय निग्गहेणं मणुन्नामणुन्नेसु सद्धेसु रागदोसनिग्गहं जणयइ । तप्पच्चइयं कम्मं न बंधइ, पुव्वबद्धं च निज्जरेइ ।

[११७७] चक्खिंदियनिग्गहेणं भंते ! जीवे किं जणयइ ? चक्खिंदियनिग्गहेणं मणुन्ना - मणुन्नेसु रूवेसु रागदोसनिग्गहं जणयइ । तप्पच्चइयं कम्मं न बंधइ, पुव्वबद्धं च निज्जरेइ ।

[११७८] घाणिंदिय निग्गहेणं भंते ! जीवे किं जणयइ ? घाणिंदियनिग्गहेणं मणुन्ना - अज्झयणं-२९

मणुन्नेसु गं धेसु रागदोसनिग्गहं जणयइ , तप्पच्चइयं कम्मं न बंधइ , पुव्वबद्धं च निज्जरेइ ।

[११७९] जिब्भिंदियनिग्गहेणं भंते ! जीवे किं जणयइ ? जिब्भिंदियनिग्गहेणं मणुन्ना मणुन्नेसु रसेसु रागदोसनिग्गहं जणयइ , तप्पच्चइयं कम्मं न बंधइ , पुव्वबद्धं च निज्जरेइ ।

[११८०] फासिंदियनिग्गहेणं भंते ! जीवे किं जणयइ ? । फा सिंदियनिग्गहेणं मणुन्नामणुन्नेसु फासेसु रागदोसनिग्गहं जणयइ , तप्पच्चइयं कम्मं न बंधइ , पुव्वबद्धं च निज्जरेइ ।

[११८१] कोहविजएणं भंते! जीवे किं जणयइ ? । कोहविजएणं खंतिं जणयइ, कोहवेयणिज्जं कम्मं न बंधइ, पुव्वबद्धं च निज्जरेइ ।

[११८२] मानविजएणं भंते! जीवे किं जणयइ ? मानविजएणं मद्धवं जणयइ , मानवेयणिज्जं कम्मं न बंधइ, पुव्वबद्धं च निज्जरेइ ।

[११८३] मायाविजएणं भंते ! जीवे किं जणयइ ? मायाविजएणं अज्जवं जणयइ । मायावेयणिज्जं कम्मं न बंधइ, पुव्वबद्धं च निज्जरेइ ।

[११८४] लोभविजएणं भंते! जीवे किं जणयइ ? लोभविजएणं संतोसं जणयइ, लोभवेयणिज्जं कम्मं न बंधइ, पुव्वबद्धं च निज्जरेइ ।

[११८५] पिज्जदोसमिच्छादंसणविजएणं भंते ! जीवे किं जणयइ ? । पिज्जदोसमिच्छा- दंसणविजएणं नाणदंसणचरित्ताराहणयाए अब्भुद्धेइ । अट्ठविहस्स कम्मस्स कम्मगिंठिविमोयणयाए तप्पढ- मयाए जहाणुपुव्वीए अ ट्ठावीसइविहं मोहणिज्जं कम्मं उग्घाएइ , पंचविहं नाणावरणिज्जं, नवविहं दंसणा- वरणिज्जं, पंचविहं अंतराइयं, एए तिन्नि वि कम्मंसे जुगवं खवेइ । तओ पच्छा अनुत्तरं कसिणं पडिपुण्णं निरावरणं वितिमिरं विसुद्धं लोगालोगप्पभा सगं केवलवरनाणदंसणं समुप्पा डेइ जाव सजोगी भवइ , ताव ईरियावहियं कम्मं निबंधइ सुहफरिसं दुसमयठि ईयं । तं पढमसमए बद्धं , बिइयसमए वेइयं, तइयसमए

निज्जिण्णं, तं बद्धं पुट्टं उदीरियं वेइयं निज्जिण्णं, सेयाले य अकम्मं चावि भवइ ।

[११८६] अह आउयं पालइत्ता अं तोमुहुत्तद्धावसेसाए जोगनिरोहं करेमाणं सुहुमकिरियं अप्पडिवाइं सुक्कज्झाणं ज्ञायमाणे तप्पढमयाए मणजोगं निरुं भइ, वइजोगं निरुं भइ, कायजोगं निरुं भइ, आनपान निरोहं करेइ , ईसिपंचरहस्सक्खरुच्चारणद्वाए य णं अ नगारे समुच्छइन्नकिरियं अनियट्ठि - सुक्कज्झाणं ज्ञियायमाणे वेयणिज्जं आउयं नामं गोत्तं च एए चत्तारि वि कम्मंसे जुगवं खवेइ ।

[११८७] तओ ओरालियं कम्माइं सव्वाहिं विप्पजहणाहिं विप्पजहित्ता उज्जुसेट्ठिपत्ते अफुसमाणगई उड्ढं एगसमएणं अविग्गहेणं तत्थ गं ता सागरोवउत्ते सिज्झइ बुज्झइ जाव अं तं करेइ ।

[११८८] एस खलु सम्मत्तपरक्कमस्स अज्झयणस्स अट्ठे समणेणं भगवया महावीरेणं आघविए पन्नविए परूविए दंसिए उवदंसिए । त्ति बेमि

• एगूणतीसइमं अज्झयणं सम्मत्तं •

• तीसइमं अज्झयणं - तवमग्गगई •

- [११८९] जहा उ पावगं कम्मं , रागदोससमज्जियं ।
खवेइ तवसा भिक्खू , तमेग्गमणो सुणे ॥
- [११९०] पाणिवहमुसावाया, अदत्तमेहुणपरिग्गहा विरओ ।

अज्झयणं-३०

- राईभोयणविरओ, जीवो भवइ अ नासवो ॥
- [११९१] पंचसमिओ तिगुत्तो , अकसाओ जिइं दिओ ।
अगारवो य निस्सल्लो , जीवो होइ अ नासवो ॥
- [११९२] एएसिं तु विव ज्जासे, रागदोससमज्जियं ।
खवेइ उ जहा भिक्खू , तमेग्गमणो सुणे ॥
- [११९३] जहा महातलायस्स , सन्निरुद्धे जलागमे ।
उस्सिंचणाए तवणाए , कमेणं सोसणा भवे ॥
- [११९४] एवं तुं संजयस्सावि , पावकम्मनिरासवे ।
भवकोडीसंचियं कम्मं , तवसा निज्जरिज्जइ ॥
- [११९५] सो तवो दुविहो वुत्तो , बाहिरऽब्भंतरो तहा ।
बाहिरो छव्विहो वुत्तो , एवमब्भिंतरो तवो ॥
- [११९६] अनसनमूणोयरिया, भिक्खायरिया य रसपरिच्चाओ ।
कायकिलेसो संलीणया य बज्झो तवो होइ । ।
- [११९७] इत्तरिय मरणकाला य , अनसना दुविहा भवे ।
इत्तरिय सावकंखा , निरवकंखा उ बिइज्जिया । ।
- [११९८] जो सो इत्तरियतवो , सो समासेण छव्विहो ।
सेट्ठितवो पयरतवो , घनो य तह होइ वग्गो य । ।
- [११९९] तत्तो य वग्गवग्गो , पंचमो छ इओ पइण्णतवो ।
मनइच्छियचित्तत्थो, नायव्वो होइ इत्तरिओ । ।

- [१२००] जा सा अ नसना मरणे , दुविहा सा वियाहिया ।
सवियारमवियारा, कायचिद्वं पई भवे । ।
- [१२०१] अहवा सपरिकम्मा , अपरिकम्मा य आहिया ।
नीहारिमनीहारी, आहारच्छेअओ दोसु वि । ।
- [१२०२] ओमोयरणं पंचहा , समासेण वियाहियं ।
दव्वओ खेत्तकालेणं , भावेणं पज्जवेहि य । ।
- [१२०३] जो जस्स उ आहारो , तत्तो ओमं तु जो करे ।
जहन्नेणेगसिथाई, एवं दव्वेण ऊ भवे । ।
- [१२०४] गामे नगरे तह रायहाणि निगमे य आगरे पल्ली ।
खेडे कब्बड दोणमुह पट्टण मडंब संबाहे । ।
- [१२०५] आसमपए विहारे , संनिवेसे समायघोसे य ।
थलिसेनाखंधारे, सत्थे संवट्टकोट्टे य । ।
- [१२०६] वाडेसु व रत्थासु य, घरेसु वा एवमित्तिं खेत्तं ।
कप्पइ उ एवमाई , एवं खेत्तेण उ भवे । ।
- [१२०७] पेडा य अद्धपेडा , गोमुत्ति पयंगविहिया चेव ।

अज्झयणं-३०

- [१२०८] संबुक्कावट्टाय य गंतुं पच्चागया छट्ठा । ।
दिवसस्स पोरुसीणं, चउण्हंपि उ जत्तिओ भवे कालो ।
एवं चरमाणो खलु , कालोमाणं मुणेयव्वं । ।
- [१२०९] अहवा तइयाए पोरिसीए , ऊणाइ घासमेसं तो ।
चऊभागूणाए वा , एवं कालेण ऊ भवे । ।
- [१२१०] इत्थी वा पुरिसो वा , अलंकिओ वा नालंकिओ वावि ।
अन्नयरवयत्थो वा , अन्नयरेणं व वत्थेणं । ।
- [१२११] अन्नेण विसेसेणं , वण्णेणं भावम नुमुयंते उ ।
एवं चरमाणा खलु , भावोमाणं मुणेयव्वं । ।
- [१२१२] दव्वे खेत्ते काले भावंमि य आहिया उ जे भावा ।
एएहि ओमचरओ , पज्जवचरओ भवे भिक्खू । ।
- [१२१३] अट्टविहगोयरग्गं तु , तहा सत्तेव एसणा ।
अभिग्गहा य जे अन्ने , भिक्खायरियमाहिया । ।
- [१२१४] खीरदहिसप्पिमाई, पणीयं पा नभोयणं ।
परिवज्जणं रसाणं तु , भणियं रसविवज्जणं । ।
- [१२१५] ठाणा वीरासणाईया , जीवस्स उ सुहावहा ।
उग्गा जहा धरिज्जं ति, कायकिलेसं तमाहियं । ।
- [१२१६] एगंतं अना वाए, इत्थीपसु विवज्जिए ।
सयनासन सेवणया, विवित्त सयनासनं । ।

- [१२१७] एसो बाहिरगं तवो, समासेण वियाहिओ ।
अब्भितरं तवं एत्तो , वुच्छामि अ नुपुव्वसो । ।
- [१२१८] पायच्छित्तं वि नओ, वेयावच्चं तहेव सज्झाओ ।
झाणं च विउस्सग्गो , एसो अ ब्भितरो तवो । ।
- [१२१९] आलोयणारिहाईयं, पायच्छित्तं तु दसविहं ।
जं भिक्खू वहई सम्मं , पायच्छित्तं तमाहियं । ।
- [१२२०] अब्भुट्ठाणं अंजलिकरणं , तहेवासनदायणं ।
गुरुभत्तिभावसुस्सूसा, विनओ एस वियाहिओ । ।
- [१२२१] आयरियमाईयंमि वेयावच्चो य दसविहे ।
आसेवणं जहाथामं , वेयावच्चं तमाहियं । ।
- [१२२२] वायणा पुच्छणा चेव , तहेव परियट्टणा ।
अणुप्पेहा धम्मकहा , सज्झाओ पं चहा भवे । ।
- [१२२३] अट्टरुट्ठाणि वज्जित्ता , झाएज्जा सुसमाहिए ।
धम्मसुक्काइं झाणाइं , झाणं तं तु बुहा वए । ।
- [१२२४] सयनासन ठाणे वा , जे उ भिक्खू न वावरे ।

अज्झयणं-३०

- कायस्स विउस्सग्गो , छट्ठो सो परिकित्तिओ । ।
- [१२२५] एवं तवं तु दुविहं , जे सम्मं आयरे मु नी ।
सो खिप्पं सव्वसंसारा , विप्पमुच्चइ पंडिओ ॥ त्ति बेमि
• तीसइमं अज्झयणं सम्मत्तं •

• एगतीसइमं अज्झयणं - चरणविही •

- [१२२६] चरणविहिं पवक्खामि , जीवस्स उ सुहावहं ।
जं चरित्ता बहू जीवा , तिण्णा संसारसागरं । ।
- [१२२७] एगओ विरइं कुज्जा , एगओ य पवत्तणं ।
असंजमे नियतिं च , संजमे य पवत्तणं । ।
- [१२२८] रागदोसे य दो पावे , पावकम्मपवत्तणे ।
जे भिक्खू रुंभई निच्चं , से न अच्छइ मं डले । ।
- [१२२९] दंडाणं गारवाणं च , सल्लाणं च तियं तियं ।
जे भिक्खू चयई निच्चं , से न अच्छइ मं डले । ।
- [१२३०] दिव्वे य जे उवसग्गे , तहा तेरिच्छमा नुसे ।
जे भिक्खू सहइ निच्चं , से न अच्छइ मं डले । ।
- [१२३१] विगहाकसायसन्नाणं, झाणाणं च दुयं तहा ।
जे भिक्खू वज्जई निच्चं , से न अच्छइ मं डले । ।
- [१२३२] वएसु इं दियत्थेसु, समिईसु किरियासु य ।

- जे भिक्खू जयई निच्चं , से न अच्छइ मंडले । ।
- [१२३३] लेसासु छसु काएसु , छक्के आहारकारणे ।
जे भिक्खू जयई निच्चं , से न अच्छइ मंडले । ।
- [१२३४] पिंडोग्गहपडिमासु, भयट्ठाणेसु सत्तसु ।
जे भिक्खू जयई निच्चं , से न अच्छइ मंडले । ।
- [१२३५] मदेसु बं भगुत्तीसु, भिक्खुधम्मंमि दसविहे ।
जे भिक्खू जयई निच्चं , से न अच्छइ मंडले । ।
- [१२३६] उवासगाणं पडिमासु , भिक्खूणं पडिमासु य ।
जे भिक्खू जयई निच्चं , से न अच्छइ मंडले । ।
- [१२३७] किरियासु भुयगामेसु , परमाहम्मिएसु य ।
जे भिक्खू जयई निच्चं , से न अच्छइ मंडले । ।
- [१२३८] गाहासोलसएहिं तहा असंजमं मि य ।
जे भिक्खू जयई निच्चं , से न अच्छइ मंडले । ।
- [१२३९] बंभंमि नायज्झयणेसु , ठाणेसु य समाहिए ।
जे भिक्खू जयई निच्चं , से न अच्छइ मंडले । ।

अज्झयणं-३१

- [१२४०] एगवीसाए सबले , बावीसाए परीसहे ।
जे भिक्खू जयई निच्चं , से न अच्छइ मंडले । ।
- [१२४१] तेवीसाए सूयगडे , रूवाहिएसु सुरेसु अ ।
जे भिक्खु जयई निच्चं , से न अच्छइ मंडले ॥
- [१२४२] पणवीसभावणासु, उद्देसेसु दसाइणं ।
जे भिक्खू जयई निच्चं , से न अच्छइ मंडले ॥
- [१२४३] अनगारगुणेहिं च , पगप्पंमि तहेव य ।
जे भिक्खू जयई निच्चं , से न अच्छइ मंडले ॥
- [१२४४] पावसुयपसंगेसु, मोहठाणेसु चेव य ।
जे भिक्खू जयई निच्चं , से न अच्छइ मंडले ॥
- [१२४५] सिद्धाइगुणजोगेसु, तेत्तीसासायणासु य ।
जे भिक्खू जयई निच्चं , से न अच्छइ मंडले ॥
- [१२४६] इइ एएसु ठाणेसु , जे भिक्खू जयई सया ।
खिप्पं सो सव्वसंसारो, विप्पमुच्चइ पंडिओ ॥ त्ति बेमि
• एगतीसइमं अज्झयणं सम्मत्तं •

• **बत्तीसइमं अज्झयणं पमायट्ठाणं** •

- [१२४७] अच्छंतकालस्स समूलगस्स, सव्वस्स दुक्खस्स उ जो पमोक्खो ।
तं भासओ मे पडिपुण्णचित्ता , सुणेह एगं तहियं हियत्थं ॥

- [१२४८] नाणस्स सव्वस्स पगासणा ए, अन्नाणमोहस्स विवज्जणाए ।
रागस्स दोसस्स य संखएणा ए, एगंतसोक्खं समुवेइ मोक्खं ॥
- [१२४९] तस्सेस मग्गो गुरुविद्धसेवा , विवज्जणा बालज नस्स दूरा ।
सज्झायएगंतनिसेवणा य , सुत्तत्थसंचितणया धिई य ॥
- [१२५०] आहारमिच्छे मियमेसणिज्जं , सहायमिच्छे निउणत्थबुद्धिं ।
निकेयमिच्छेज्ज विवेगजोग्गं , समाहिकामे समणे तवस्सी ॥
- [१२५१] न वा लभेज्जा निउणं सहायं , गुणाहियं वा गुणओ समं वा ।
एगो वि पावाइं विवज्जयं तो, विहरेज्ज कामेसु असज्जमाणो ॥
- [१२५२] जहा य अं डप्पभवा बलागा , अंडं बलागप्पभवं जहा य ।
एमेव मोहययणं खु तण्हा , मोहं च तण्हाययणं वयं ति ॥
- [१२५३] रागो य दोसो वि य कम्मबीयं , कम्मं च मोहप्पभवं वयं ति ।
कम्मं च जाइमरणस्स मूलं , दुक्खं च जाइमरणं वयं ति ॥
- [१२५४] दुक्खं हयं जस्स न होइ मोहो , मोहो हओ जस्स न होइ तण्हा ।
तण्हा हया जस्स न होइ लोहो , लोहो हओ जस्स न किंचणाइं ॥
- [१२५५] रागं च दोसं च तहेव मोहं , उद्धत्तुकामेण समूलजालं ।

अज्झयणं-३२

- जे जे उवाया पडिवज्जियव्वा , ते कित्तइस्सामि अहा नुपुत्विं ॥
- [१२५६] रसा पगामं न निसेवियव्वा , पायं रसा दित्तिकरा नराणं ।
दित्तं च कामा समभिद्धवं ति, दुमं जहा साउफलं व पक्खी ॥
- [१२५७] जहा दवग्गी पउरिं धणे वणे , समारुओ नोवसमं उवेइ ।
एविंदियग्गी वि पगामभोइणो , न बंभयारिस्स हियाय कस्सई ॥
- [१२५८] विवत्तसेज्जासणजंतियाणं, ओमासणाणं दमिइं दियाणं ।
न रागसत्तू धरिसेइ चित्तं , पराइयो वाहिरिवोसहेहिं ॥
- [१२५९] जहा बिरालावसहस्स मूले , न मूसगाणं वसही पसत्था ।
एमेव इत्थीनिलयस्स मज्झे , न बंभयारिस्स खमो निवासो ॥
- [१२६०] न रूवलावण्णविलासहासं , न जंपियं इंगियपेहियं वा ।
इत्थीण चित्तंसि निवेसइत्ता , दडुं ववस्से समणे तवस्सी ॥
- [१२६१] अदंसणं चेव अपत्थणं च , अचिंतणं चेव अकित्तणं च ।
इत्थीजनस्सारियझाणजुग्गं, हियं सया बं भवए रयाणं ॥
- [१२६२] कामं तु देवीहिं विभूसियाहिं , न चाइया खोभइउं तिगुत्ता ।
तहा वि एगं तहियं ति नच्चा , विवित्तवासो मुणिणं पसत्थो ।
- [१२६३] मोक्खाभिकंखिस्स वि मा नवस्स, संसारभीरुस्स ठियस्स धम्मो ।
नेयारिसं दुत्तरमत्थि लोए , जहित्थिओ बालम नोहराओ ॥
- [१२६४] एए य संगे समइक्कमित्ता , सुदुत्तरा चेव भवं ति सेसा ।
जहा महासागरमुत्तरित्ता , नई भवे अवि गं गासमाना ॥

- [१२६५] कामाणुगिद्धिप्पभवं खु दुक्खं , सव्वस्स लोगस्स सदेवगस्स ।
जे काइयं मा नसियं च किंचि , तस्संतगं गच्छइ वीयरगो ॥
- [१२६६] जहा य किं पागफला म नोरमा, रसेण वण्णेण य भुज्जमाणा ।
ते खुइडए जीविय पच्चमाणा , एओवमा कामगुणा विवागे ॥
- [१२६७] जे इं दियाणं विसया मणुन्ना , न तेसु भावं निसिरे कया ई ।
न या मणुन्नेसु मणं पि कुज्जा , समाहिकामे समणे तवस्सी ॥
- [१२६८] चक्खुस्स रूवं गहणं वयं ति, तं रागहेउं तु मणुन्नमाहुं ।
तं दोसहेउं अमणुन्नमाहुं , समो य जो तेसु य वीयरगो ॥
- [१२६९] रूवस्स चक्खुं गहणं वयं ति, चक्सुस्स रूवं गहणं वयंति ।
रागस्स हेउं समणुन्नमाहुं , दोसस्स हेउं अमणुन्नमाहुं ॥
- [१२७०] रूवेसु जो गिद्धइमुवेइ तिव्वं , अकालियं पावइ से वि नासं ।
रागाउरे से जह वा पयंगे , आलयलोले समुवेइ मच्चुं ॥
- [१२७१] जे यावि दोसं समुवेइ तिव्वं , तंसि क्खणे से उ उवेइ दुक्खं ।
दुद्धंतदोसेण सएण जं तू, न किं चि रूवं अवरज्झई से ॥
- [१२७२] एगंतरत्ते रुइरंसि रुवे , अतालिसे से कुणई पओसं ।

अज्झयणं-३२

- दुक्खस्स सं पीलमुवेइ बाले , न लिप्पई ते न मु नी विरागो ॥
- [१२७३] रुवानुगासानुगए य जीवे , चराचरे हिंसइ नेगरूवे ।
चित्तेहि ते परितावेइ बाले , पीलेइ अत्तइगुरु किलिडे ॥
- [१२७४] रुवानुवाएण परिग्गहेण , उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिताभे ॥
- [१२७५] रुवे अतित्ते य परिग्गहं मि, सत्तोवसत्तो न उवेइ तुद्धिं ।
अ तुद्धिदोसेण दुही परस्स , लोभाविले आययई अदत्तं ॥
- [१२७६] तण्हाभिभूयस्स अदत्तहारिणो , रुवे अतित्तस्स परिग्गहे य ।
मा यामुसं व इडइ लोभदोसा , तत्थावि दुक्खा न विमुच्चई से ॥
- [१२७७] मोसस्स पच्छा य पुरत्थओ य , पयोगकाले य दुही दुरं ते ।
एवं अदत्ताणि समाययं तो, रुवे अतित्तो दुहिओ अ निस्सो ॥
- [१२७८] रूवानुरत्तस्स नरस्स एवं , कुत्तो सुहं होज्ज कयाइ किं चि ? ।
तत्थोवभोगेऽवि किलेसदुक्खं , निव्वत्तई जस्स कएण दुक्खं ॥
- [१२७९] एमेव रूवं मि गओपओसं , उवेइ दुक्खोहपरंपराओ ।
पदुद्धचित्तो य चिणाइ कम्मं , जं से पुणो होइ दुहं विवागे ॥
- [१२८०] रूवे विरत्तो म नुओ विसोगो , एएण दुक्खोहपरंपरेण ।
न लिप्पए भवमज्झे ऽवि संतो, जलेण वा पोक्खरिणी पलासं ॥
- [१२८१] सोयस्स सद्धं गहणं वयंति , तं रागहेउं तु मणुन्नमाहु ।
तं दोसहेउं अमणुन्नमाहु , समो य जो तेसु स वीयरगो ॥

- [१२८२] सदस्स सोयं गहणं वयंति , सोयस्स सदं गहणं वयंति ।
रागस्स हेउं समणुन्नमाहु , दोसस्स हेउं अमणुन्नमाहु ॥
- [१२८३] सद्देषु जो गिद्धिमुवेइ तिव्वं , अकालियं पावइ से वि नासं ।
रागाउरे हरिणमिगे व मुद्धे , सद्दे अतित्ते समुवेइ मच्चुं ॥
- [१२८४] जे यावि दोसं समुवेइ तिव्वं , तंसि क्खणे से उ उवेइ दुक्खं ।
दुद्धंतदोसेण सएण जं तू, न किं चि सदं अवरज्झई से ॥
- [१२८५] एगंतरत्ते रुइरंसि सद्दे , अतालिसे से कुणई पओसं ।
दुक्खस्स सं पीलमुवेइ बाले , न लिप्पई ते न मु नी विरागो ॥
- [१२८६] सद्दानुगासानुगए य जीवे , चराचरे हिंसइऽ नेगरुवे ।
चित्तेहि ते परितावेइ बाले , पीलेइ अतट्ठगुरु किलिद्धे ॥
- [१२८७] सद्दानुवाएण परिग्गहेण , उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिलाभे ॥
- [१२८८] सद्दे अतित्ते य परिग्गहं मि, सत्तोवसत्तो न उवेइ तुद्धिं ।
अतुद्धिदोसेण दुही परस्स , लोभाविले आययई अदत्तं ॥
- [१२८९] तण्हाभिभूयस्स अदत्तहारिणो , सद्दे अतित्तस्स परिग्गहे य ।

अज्झयणं-३२

- मायामुसं व इट्ठइ लोभदोसा , तत्थावि दुक्खा न विमुच्चई ॥
- [१२९०] मोसस्स पच्छा य पुरत्थओ य , पओगकाले य दुही दुरं ते ।
एवं अदत्ताणि समाययं तो, सद्दे अतित्तो दुहीओ अ निस्सो ॥
- [१२९१] सद्दानुरत्तस्स नरस्स एवं , कुत्तो सुहं होज्ज कयाइ किंचि ? ।
तत्थोवभोगे वि किलेसदुक्खं , निव्वत्तई जस्स कएण दुक्खं ॥
- [१२९२] एमेव सदं मि गओ पओसं , उवेइ दुक्खोहपरंपराओ ।
पदुद्धचित्तो य चिणाइ कम्मं , जं से पुणो इ दुहं विवागे ॥
- [१२९३] सद्दे विरत्तो म नुओ विसोगो , एएण दुक्खोहपरंपरेण ।
न लिप्पए भवमज्झे वि सं तो, जलेण वा पोक्खरिणीपलासं ॥
- [१२९४] घाणस्स गंधं गहणं वयंति , तं रागहेउं तु मणुन्नमाहु ।
तं दोसहेउं अमणुन्नमाहु , समो य जो तेसु स वीयरगो ॥
- [१२९५] गंधस्स घाणं गहणं वयंति , घाणस्स गंधं गहणं वयंति ।
रागस्स हेउं समणुन्नमाहु , दोसस्स हेउं अमणुन्नमाहु ॥
- [१२९६] गंधेषु जो गिद्धिमुवेइ तिव्वं , अकालियं पावइ से वि नासे ।
रागाउरे ओसहगं धगिद्धे, सप्पे बिलाओ विव निक्खमं ते ॥
- [१२९७] जे यावि दोसं समुवेइ तिव्वं , तंसि क्खणे से उ उवेइ दुक्खं ।
दुद्धंतदोसेण सएण जं तू, न किंचि गंधं अवरज्झई से ॥
- [१२९८] एगंतरते रुइरंसि गं धे, अतालिसे से कुणई पओसं ।
दुक्खस्स संपीलमुवेइ बाले , न लिप्पई तेण मु नी विरागो ॥

- [१२९९] गंधानुगासानुगए य जीवे , चराचरे हिंसइऽ नेगरुवे ।
चित्तेहि ते परितावेइ बाले , पीलेइ अत्तइगुरु किलिठे ॥
- [१३००] गंधाणुवाएण परिग्गहेण , उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिलाभे ॥
- [१३०१] गंधे अतित्ते य परिग्गहं मि, सत्तोवसत्तो न उवेइ तु ढिं ।
अतुड्ढिदोसेण दुही परस्स , लोभाविले आययई अदत्तं ॥
- [१३०२] तण्हाभिभूयस्स अदत्तहारिणो , गंधे अतित्तस्स परिग्गहे य ।
मायामुसं व इडइ लोभदोसा , तत्थावि दुक्खा न विमुचइ से ॥
- [१३०३] मोसस्स पच्छा य पुरत्थओ य , पओगकाले य दुही दुरं ते ।
एवं अदत्ताणि समाययं तो, गंधे अतित्तो दुहिओ अ निस्सो ॥
- [१३०४] गंधानुरत्तस्स नरस्स एवं , कुत्तो सुहं होज्ज कयाइ किंचि ।
तत्थोवभोगे वि किलेसदुक्खं , निव्वत्तई जस्स कएण दुक्खं ॥
- [१३०५] एमेव गं धंमि गओ पओसं , उवेइ दुक्खोहपरंपराओ ।
पदुड्ढचित्तो य चिणाइ कम्मं , जं से पुणो होइ दुहं विवागे ॥
- [१३०६] गंधे विरत्तो म नुओ विसोगो , एएण दुक्खोहपरंपरेण ।

अज्झयणं-३२

- न लिप्पई भवमज्झे वि सं तो, जलेण वा पोक्खरिणीपलासं ॥
- [१३०७] जिहाए रसं गहणं वयंति , तं रागहेउं तु मणुन्नमाहु ।
तं दोसहेउं अमणुन्न माहु, समो य जो तेसु य वीयरगो ॥
- [१३०८] रसस्स जिब्भं गहणं वयंति , जिब्भाए रसं गहणं वयंति ।
रागस्स हेउं समणुन्नमाहु , दोसस्स हेउं अमणुन्नमाहु ॥
- [१३०९] रसेसु जो गिद्धिमुवेइ तिव्वं , अकालियं पावइ से वि नासं ।
रागाउरे बडिसविभिन्नकाए , मच्छे जहा आमिसभोगगिद्धे ॥
- [१३१०] जे यावि दोसं समुवेइ तिव्वं , तंसि क्खणे से उ उवेइ दुक्खं ।
दुद्धंतदोसेण सएण जं तू, न किंचि रसं अवरज्झई से ॥
- [१३११] एगंतरत्ते रुइरंसि रसे , अतालिसे से कुणई पओसं ।
दुक्खस्स संपीलमुवेइ बाले , न लिप्पई तेण मु नी विरागो ॥
- [१३१२] रसानुगासानुगए य जीवे , चराचरे हिंसइऽ नेगरुवे ।
चित्तेहि ते परितावेइ बाले , पीलेइ अत्त इगुरु किलि ठे ॥
- [१३१३] रसानुवाएण परिग्गहेण उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिलाभे ॥
- [१३१४] रसे अतित्ते य परिग्गहं मि, सत्तोवसत्तो न उवेइ तुड्ढिं ।
अतुड्ढिदोसेण दुही परस्स , लोभाविले आययई अदत्तं ॥
- [१३१५] तण्हाभिभूयस्स अदत्तहारिणो , रसे अतित्तस्स परिग्गहे य ।
मायामुसं व इडइ लोभदोसा , तत्थावि दुक्खा न विमुचइ से ॥

- [१३१६] मोसस्स पच्छा य पुरत्थओ य , पओगकाले य दुही दुरं ते ।
एवं अदत्ताणि समाययं तो, रसे अतित्तो दुहिओ अ निस्सो ॥
- [१३१७] रसानुरत्तस्स नरस्स एवं , कुत्तो सुहं होज्ज कयाइ किंचि ।
तत्थोवभोगे वि किलेसदुक्खं , निव्वत्तई जस्स कएण दुक्खं ॥
- [१३१८] एमेव रसं मि गओ पओसं , उवेइ दुक्खोहपरंपराओ ।
पदुद्धचित्तो य चिणाइ कम्मं , जं से पुणो होइ दुहं विवागे ॥
- [१३१९] रसे विरत्तो म नुओ विसोगो , एएण दुक्खोहपरंपरेण ।
न लिप्पई भवमज्झे वि सं तो, जलेण वा पोक्खरिणीपलासं ॥
- [१३२०] कायस्स फासं गहणं वयंति , तं रागहेउं तु मणुन्नमाहु ।
तं दोसहेउं अमणुन्नमाहु , समो य जो तेसु य वीयरगो ॥
- [१३२१] फासस्स कायं गहणं वयंति , कायस्स फासं गहणं वयंति ।
रागस्स हेउं समणुन्नमाहु , दोसस्स हेउ अमणुन्नमाहु ॥
- [१३२२] फासेसु जो गिद्धइमुवेइ तिव्वं , अकालियं पावइ से वि नासं ।
रागाउरे सीयजलावसन्ने , गाहग्गहीए महिसे विवन्ने ॥
- [१३२३] जे यावि दोसं समुवेइ तिव्वं , तंसि क्खणे से उ उवेइ दुक्खं ।

अज्झयणं-३२

- दुद्धंतदोसेण सएण जं तू, न किंचि फासं अवरज्झई से ॥
- [१३२४] एगंतरत्ते रुइरंसि फासे , अतालिसे से कुणई पओसं ।
दुक्खस्स संपीलमुवेइ बाले , न लिप्पई तेण मु नी विरागो ॥
- [१३२५] फासानुगासानुगए य जीवे , चराचरे हिंसइ नेगरुवे ।
चित्तेहि ते परितावेइ बाले , पीलेइ अत्त इगुरु किलि द्वे ॥
- [१३२६] फासानुवाएण परिग्गहेण , उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिलाभे ॥
- [१३२७] फासे अतित्ते य परिग्गहं मि, सत्तोवसत्तो न उवेइ तु द्विं ।
अतुद्धिदोसेण दुही परस्स , लोभाविले आययई अदत्तं ॥
- [१३२८] तण्हाभिभूयस्स अदत्तहारिणो , फासे अतित्तस्स परिग्गहे य ।
मायामुसं व इढइ लोभदोसा , तत्थावि दुक्खा न विमुच्चई से ॥
- [१३२९] मोसस्स पच्छा य पुरत्थओ य , पओगकाले य दुही दुरंते ।
एवं अदत्ताणि समाययं तो, फासे अतित्तो दुहिओ अ निस्सो ॥
- [१३३०] फासानुरत्तस्स नरस्स एवं , कुत्तो सुहं होज्ज कयाइ किंचि ? ।
तत्थोवभोगेवि किलेसदुक्खं , निव्वत्तई जस्स कएण दुक्खं ॥
- [१३३१] एमेव फासं मि गओ पओसं , उवेइ दुक्खोहपरंपराओ ।
पदुद्धचित्तो य चिणाइ कम्मं , जं से पुणो होइ दुहे विवागे ॥
- [१३३२] फासे विरत्तो म नुओ विसोगो , एएण दुक्खोहपरंपरेण ।
न लिप्पई भवमज्झे वि सं तो, जलेण वा पोक्खरिणीपलासं ॥

- [१३३३] मनस्स भावं गहणं वयंति , तं रागहेउं तुं मणुन्नमाहु ।
तं दोसहेउं अमणुन्नमाहु , समो य जो तेसु स वीयरगो ॥
- [१३३४] भावस्स म नं गहणं वयंति , मनस्स भावं गहणं वयंति ।
रागस्स हेउं समणुन्नमाहु , दोसस्स हेउं अमणुन्नमाहु ॥
- [१३३५] भावेसु जो गिद्धिमुवेइ तिव्वं , अकालियं पावइ से वि नासं ।
रागाउरे कामगुणेषु गिद्धे , करेणुमग्गावहिए गजे वा ॥
- [१३३६] जे यावि दोसं समुवेइ तिव्वं , तंसि क्खणे से उ उवेइ दुक्खं ।
दुद्धंतदोसेण सएण जंतू , न किंचि भावं अवरज्झई से ॥
- [१३३७] एगंतरत्ते रुइरंसि भावे , अतालिसे से कुणई पओसं ।
दुक्खस्स संपीलमुवेइ बाले , न लिप्पई तेण मु नी विरागो ॥
- [१३३८] भावानुगासानुगए य जीवे , चराचरे हिंसइs नेगरुवे ।
चित्तेहि ते परितावेइ बाले , पीलेइ अत्त इगुरु किलि डे ॥
- [१३३९] भावानुवाएण परिग्गहेण , उप्पायणे रक्खणसन्निओगे ।
वए विओगे य कहं सुहं से , संभोगकाले य अतित्तिलाभे ॥
- [१३४०] भावे अतित्ते य परिग्गहं मि, सत्तोवसत्तो न उवेइ तुडिं ।

अज्झयणं-३२

- अतुद्धिदोसेण दुही परस्स , लोभाविले आययई अदत्तं ॥
- [१३४१] तण्हाभिभूयस्स अदत्तहारिणो , भावे अतित्तस्स परिग्गहे य ।
मायामुसं व इडइ लोभदोसा , तत्थावि दुक्खा न विमुच्चई से ॥
- [१३४२] मोसस्स पच्छा य पुरत्थओ य , पओगकाले य दुही दुरंते ।
एवं अदत्ताणि समाययं तो, भावे अतित्तो दुहिओ अ निस्सो ॥
- [१३४३] भावानुरत्तस्स नरस्स एवं , कुत्तो सुहं होज्ज कयाइ किंचि ।
तत्थोवभोगे वि किलेसदुक्खं , निव्वत्तई जस्स कएण दुक्खं ॥
- [१३४४] एमेव भावं मि गओ पओसं , उवेइ दुक्खोहपरंपराओ ।
पदुद्धचित्तो य चिणाइ कम्मं , जं से पुणो होइ दुहं विवागे ॥
- [१३४५] भावे विरत्तो म नुओ विसोगो , एएण दुक्खोहपरंपरेण ।
न लिप्पई भवमज्जे वि संतो , जलेण वा पोक्खरिणीपिलासं ॥
- [१३४६] एविंदियत्था य म नस्स अत्था, दुक्खस्स हेउं म नुयस्स रागिणो ।
ते चेव थोवं पि कयाइ दुक्खं न वीयरगस्स करे ति किंचि ॥
- [१३४७] न कामभोगा समयं उवें ति, न यावि भोगा विगइं उवें ति ।
जे तप्पओसी य परिग्गही य , सो तेसु मोहा विगइं उवेइ ॥
- [१३४८] कोहं च मा नं च तहेव मायं , लोहं दुगुच्छं अरइं रइं च ।
हासं भयं सोगपुमित्थिवेयं , नपुंसवेयं विविहे य भावे ॥
- [१३४९] आवज्जई एवम नेगरुवे, एवंविहे कामगुणेषु सत्तो ।
अन्ने य एयप्पभवे विसेसे , कारुण्णदीणे हिरिमे वइस्से ॥

- [१३५०] कप्पं न इच्छिज्ज सहायलिच्छू , पच्छानुतावेण तव्वप्पभावं ।
ए वं वियारे अमियप्पयारे , आवज्जई इं दियचोरवस्से ॥
- [१३५१] तओ से जायं ति पओयणाइं , निमज्जिउं मोहमहण्णवं मि ।
सुहेसिणो दुक्खविणोयणद्वा , तपच्चयं उज्जमए य रागी ॥
- [१३५२] विरज्जमाणस्स य इं दियत्था, सद्दाइया तावइयप्पगारा ।
न तस्स सव्वे वि मणुन्नयं वा , निव्वतयंती अमणुन्नयं वा ॥
- [१३५३] एवं स संकप्पविकप्पणासुं , संजायई समयमुव द्वियस्स ।
अत्थे असंकप्पयओ तओ से , पहीयए कामगुणेसु तण्हा ॥
- [१३५४] सो वीयरागो कयसव्वकिच्चो , खवेइ नाणावरणं खणेणं ।
तहेव जं दंसणमावरेइ , जं चं तरायं पकरेइ कम्मं ॥
- [१३५५] सव्वं तओ जाणइ पासए य , अमोहणे होइ निरं तराए ।
अनासवे झाणसमाहिजुत्ते , आउक्खए मोक्खमुवेइ सुद्धे ॥
- [१३५६] सो तस्स सव्वस्स दुहस्स मु क्खो, जं बाहई सययं जं तुमेयं ।
दीहामयं विप्पमुक्को पसत्थो , तो होइ अच्चं तसुही कयत्थो ॥
- [१३५७] अनाइकालप्पभवस्स एसो , सव्वस्स दुक्खस्स पमोक्खमग्गो ।

अज्झयणं-३२

वियाहिओ जं समुविच्च सत्ता , कमेण अच्चंतसुही भवंति ॥ त्ति
बेमि

• बत्तीसइमं अज्झयणं सम्मत्तं •

• **तेत्तीसइमं अज्झयणं कम्मपयडी** •

- [१३५८] अट्ठं कम्माइं वोच्छामि , आनुपुत्विं जह क्कमं ।
जेहिं बद्धो अयं जीवो , संसारे परिव इई ।
- [१३५९] नाणस्सावरणिज्जं, दंसणावरणं तहा ।
वेयणिज्जं तहा मोहं , आउकम्मं तहेव य ॥
- [१३६०] नामकम्मं च गोयं च , अंतरायं तहेव य ।
ए वमेयाइ कम्माइं , अट्ठेव उ समासओ ॥
- [१३६१] नाणावरणं पं चविहं, सुयं आभि निबोहियं ।
ओहिनाणं च तइयं , मणनाणं च केवलं ॥
- [१३६२] निद्धा तहेव पयला , निद्धानिद्धा पयलपयला य ।
तत्तो य थीणगिद्धी उ , पंचमा होइ नायव्वा ॥
- [१३६३] चक्खुमचक्खूओहिस्स, दंसणे केवले य आवरणे ।
एवं तु नवविगप्पं , नायव्वं दंसणावरणं ॥
- [१३६४] वेयणीयंपि य दुविहं , सायमसायं च आहियं ।
सायस्स उ बहू भेया , एमेव असायस्स वि ॥

- [१३६५] मोहणिज्जंपि दुविहं , दंसणे चरणे तथा ।
दंसणे तिविहं वुत्तं , चरणे दुविहं भवे ॥
- [१३६६] सम्मत्तं चेव मिच्छत्तं , सम्मामिच्छत्तमेव य ।
एयाओ तिन्नि पयडीओ , मोहणिज्जस्स दंसणे ॥
- [१३६७] चरित्तमोहणं कम्मं , दुविहं तं वियाहियं ।
कसायमोहणिज्जं तु , नोकसायं तहेव य ॥
- [१३६८] सोलसविहभेएणं, कम्मं तु कसायजं ।
सत्तविहं नवविहं वा , कम्मं च नोकसायजं ॥
- [१३६९] नेरइयतिरिक्खाऊ, मणुस्साउं तहेव य ।
देवाउयं चउत्थं तु , आउकम्मं चउत्विहं ॥
- [१३७०] नामकम्मं तु दुविहं , सुहमसुहं च आहियं ।
सुहस्स उ बहू भेया , एमेव असुहस्स वि ॥
- [१३७१] गोयं कम्मं दुविहं , उच्चं नियं च आहियं ।
उच्चं अ इविहं होइ , एवं नीयं पि आहियं ॥
- [१३७२] दाने लाभे य भोगे य , उवभोगे वीरिए तथा ।
पंचविहमंतरायं, समासेण वियाहियं ॥

अज्झयणं-३३

- [१३७३] एयाओ मूलपयडीओ , उत्तराओ य आहिया ।
पएसग्गं खेत्तकाले य , भावं च उत्तरं सुण ॥
- [१३७४] सव्वेसिं चेव कम्माणं , पएसग्गमनंतगं ।
गंठियसत्ताईयं, अंतो सिद्धाण आहियं ॥
- [१३७५] सव्वजीवाण कम्मं तु , संगहे छदिसागयं ।
सव्वेसु वि पएसेसु , सव्वं सव्वेण बद्धगं ॥
- [१३७६] उदहीसरिसनामाण, तीसई कोडिकोडीओ ।
उक्कोसिया ठिई होइ , अंतोमुहुत्तं जहन्निया ॥
- [१३७७] आवरणिज्जाण दुण्हंपि , वेयणिज्जे तहेव य ।
अंतराए य कम्मं मि, ठिई एसा वियाहिया ॥
- [१३७८] उदहीसरिसनामाणं, सत्तरिं कोडिकोडीओ ।
मोहणिज्जस्स उक्कोसा , अंतोमुहुत्तं जहन्निया ॥
- [१३७९] तेत्तीस सागरोवमा , उक्कोसेण वियाहिया ।
ठिइ उ आउकम्मस्स , अंतोमुहुत्तं जहन्निया ॥
- [१३८०] उदहीसरिसनामाण, वीसई कोडिकोडीओ ।
नामगोत्ताणं उक्कोसा , अंतो मुहुत्तं जहन्निया ॥
- [१३८१] सिद्धाणऽनंतभागो य , अनुभागा हवं ति उ ।
सव्वेसु वि पएसग्गं , सव्वजीवेसु इच्छियं ॥

- [१३८२] तम्हा एएसिं कम्माणं , अनुभाग वियाणिया ।
एएसिं संवरे चेव , खवणे य जए बुहो ॥ त्तिबेमि
• तेत्तीसइमं अज्झयणं सम्मत्तं •

• चउतीसइमं अज्झयणं - लेसज्झयणं •

- [१३८३] लेसज्झयणं पवक्खामि , आनुपुत्विं जहक्कमं ।
छण्हंपि कम्मलेसाणं , अनुभावे सुणेह मे ॥
- [१३८४] नामाइं वण्णरसगं ध फासपरिणामलक्खणं ठाणं ।
ठिइं गइं आउं य , लेसाणं तु सुणेह मे ॥
- [१३८५] किण्हा नीला य काऊ य , तेऊ पम्हा तहेव य ।
सुक्कलेसा य छट्ठा य , नामाइं तु जहक्कमं ॥
- [१३८६] जीमूयनिद्ध संकासा, गवलरिद्धग संनिभा ।
खंजंजण नयननिभा, किण्हेसा उ वण्णओ ॥
- [१३८७] नीलासोग संकासा, चासपिच्छ समप्पभा ।
वेरुलियनिद्ध संकासा, नीललेसा उ वण्णओ ॥
- [१३८८] अयसीपुप्फ संकासा, कोइलच्छ दसंनिभा ।

अज्झयणं-३४

- पारेवयगीवनिभा, काऊलेसा उ वण्णओ ॥
- [१३८९] हिंगुलयधाउ संकासा, तरुणाइच्च सन्निभा ।
सुयतुंड पईवनिभा, तेऊलेसा उ वण्णओ ॥
- [१३९०] हरियालभेय संकासा, हलिद्धाभेय समप्पभा ।
सणासण कुसुमनिभा, पम्हलेसा उ व ण्णओ ॥
- [१३९१] संखंककुंद संकासा, खीरपूर समप्पभा ।
रययहार संकासा, सुक्कलेसा उ वण्णओ ॥
- [१३९२] जह कडुय तुंबगरसो, निंबरसो कडुय रोहिणिरसो वा ।
एत्तो वि अ नंतगुणो, रसो य किण्हाए नायव्वो ॥
- [१३९३] जह तिगडुयस्स य रसो, तिक्खो जह हत्थिपिप्पलीए वा ।
एत्तो वि अ नंतगुणो, रसो उ नीलाए नायव्वो ॥
- [१३९४] जह तरुण अंबगरसो, तुवरकविद्धस्स वावि जारिसओ ।
एत्तो वि अनंतगुणो , रसो उ काऊए नायव्वो ॥
- [१३९५] जह परिणयं बगरसो, पक्ककविद्धस्स वावि जारिसओ ।
एत्तो वि अनंतगुणो , रसो उ तेऊए नायव्वो ॥
- [१३९६] वरवारुणीए व रसो , विविहाण व आसवाण जारिसओ ।
महुमेरगस्स व रसो , एत्तो पम्हाए परएणं ॥
- [१३९७] खज्जूर मुद्धियरसो, खीररसो खं ड सक्कररसो वा ।

- एत्तो वि अनंतगुणो , रसो उ सुक्काए नायव्वो ॥
- [१३९८] जह गोमडस्स गं धो, सुणगमडस्स व जहा अहिमडस्स ।
एत्तो वि अनंतगुणो , लेसाणं अप्पसत्थाणं ॥
- [१३९९] जह सुरहि कुसुमगंधो, गंधवासाण पिस्समाणा णं ।
एत्तो वि अनंतगुणो , पसत्थलेसाण तिण्हंपि ॥
- [१४००] जह करगयस्स फासो , गोजिब्भाए य सागपत्ताणं ।
एत्तो वि अनंतगुणो , लेसाणं अप्पसत्थाणं ॥
- [१४०१] जह बूरस्स व फासो , नवनीयस्स व सिरीसकुसुमाणं ।
एत्तो वि अनंतगुणो , पसत्थलेसाण तिण्हंपि ॥
- [१४०२] तिविहो व नवविहो वा , सत्तावीसइविहेक्कसीओ वा ।
दुसओ तेयालो वा , लेसाणं होइ परिणामो ॥
- [१४०३] पंचासवप्पमत्तो, तीहिं अगुत्तो छसुं अविरओ य ।
तिव्वारंभ परिणओ, खुद्धो साहसिओ नरो ॥
- [१४०४] निद्धंधस परिणामो, निस्संसो अजिइं दिओ ।
एयजोगसमाउत्तो, किण्हलेसं तु परिणमे ॥
- [१४०५] इस्सा अमरिस अतवो , अविज्ज माया अहीरिया ।

अज्झयणं-३४

- गेही पओसे य सढे , पमत्ते रसलोलुए सायगवेसए य ॥
- [१४०६] आरंभओ अविरओ , खुद्धो साहस्सिओ नरो ।
एयजोग समाउत्तो, नीललेसं तु परिणमे ॥
- [१४०७] वंके वंकसमायारे , नियडिल्ले अ नुज्जुए ।
पलिउंचग ओवहिए, मिच्छदिट्ठी अ नारिए ॥
- [१४०८] उप्फालगदुडुवाई य , तेणे यावि य मच्छरी ।
एयजोग समाउत्तो, काउलेसं तु परिणमे ॥
- [१४०९] नीयावित्ती अचवले , अमाई अकुऊहले ।
विनीय विनए दं ते, जोगवं उवहाणवं ॥
- [१४१०] पियधम्ममे दढधम्ममे ऽवज्जभीरु हिएसए ।
एयजोग समाउत्तो, तेऊलेसं तु परिणमे ॥
- [१४११] पयणु कोहमाणे य , मायालोभे य पयणुए ।
पसंतचित्ते दं तप्पा, जोगवं उवहाणवं ॥
- [१४१२] तहा य पयणुवाई य , उवसंते जिइं दिए ।
एयजोग समाउत्तो, पम्हलेसं तु परिणमे ॥
- [१४१३] अट्टरुद्धाणि वज्जित्ता , धम्मसुक्काणि ज्ञायए ।
पसंतचित्ते दं तप्पा, समिए गुत्ते य गुत्तिसु ॥
- [१४१४] सरागे वीयरागे वा , उवसंते जिइं दिए ।

- एयजोगसमाउत्तो, सुक्कलेसं तु परिणमे ॥
- [१४१५] असंखिज्जाणोसप्पिणीण, उस्सप्पिणीण जे समया ।
संखाईया लोगा , लेसाण हवं ति ठाणाइं ॥
- [१४१६] मुहुत्तद्धं तु जहन्ना , तेत्तीसा सागरा मुहुत्त ऽहिया ।
उक्कोसा होइ ठिई , नायच्चा किण्हलेसाए ॥
- [१४१७] मुहुत्तद्धं तु जहन्ना , दस उदही पलियमसंखभागमब्भहिया
।
उक्कोसा इ ठिई, नायच्चा नीललेसाए ॥
- [१४१८] मुहुत्तद्धं तु जहन्ना, तिण्णुदही पलियमसंखभागमब्भहिया ।
उक्कोसा होइ ठिई , नायच्चा काउलेसाए ॥
- [१४१९] मुहुत्तद्धं तु जहन्ना, दोण्णुदही पलियमसंखभागमब्भहिया ।
उक्कोसा होइ ठिई , नायच्चा तेउलेसाए ॥
- [१४२०] मुहुत्तद्धं तु जहन्ना , दस होंति य सागरा मुहुत्तऽहिया ।
उक्कोसा होइ ठिई , नायच्चा सुक्कलेसाए ॥
- [१४२१] मुहुत्तद्धं तु जहन्ना तेत्तीसं सागरा मुहुत्त ऽहिया ।
उक्कोसा होइ ठिई नायच्चा सुक्कलेसाए ॥
- [१४२२] एसा खलु लेसाणं , ओहेण ठिई उ वण्णिया होइ ।

अज्झयणं-३४

- चउसु वि गईसु एत्तो , लेसाण ठिइं तु वोच्छामि ॥
- [१४२३] दस वाससहस्साइं , काउए ठिई जहन्निया होइ ।
तिण्णुदही पलिओवमं , असंखभागं च उक्कोसा ॥
- [१४२४] तिण्णुदही पलिओवमं , असंखभागो जहन्नेण नीलठिई ।
दसउदही पलिओवमं असंखभागं च उक्कोसा ॥
- [१४२५] दसउदही पलिओवमं असंखभागं जहन्निया होइ ।
तेत्तीससागराइं उक्कोसा , होइ किण्हाए लेसाए ॥
- [१४२६] एसा नेरइयाणं , लेसाण ठिई उ वण्णिया होइ ।
तेणं परं वोच्छामि , तिरियमनुस्साण देवाणं ॥
- [१४२७] अंतोमुहुत्तमद्धं, लेसाण ठिई जहिं जहिं जा उ ।
तिरियाण नराणं वा , वज्जित्ता केवलं लेसं ॥
- [१४२८] मुहुत्तद्धं तु जहन्ना , उक्कोसा होइ पुव्वकोडीओ ।
नवहिं वरिसेहिं ऊणा , नायच्चा सुक्कलेसाए ॥
- [१४२९] एसा तिरियनराणं , लेसाण ठिई उ वण्णिया होइ ।
तेण परं वोच्छामि , लेसाण ठिई उ देवाणं ॥
- [१४३०] दस वाससहस्साइं , किण्हाए ठिई जहन्निया होइ ।
पलियमसंखिज्जइमो, उक्कोसो होइ किण्हाए ॥

- [१४३१] जा किण्हाए ठिई खलु , उक्कोसा सा उ समयमब्भहिया ।
जहन्नेणं नीलाए , पलियमसंखं च उक्कोसा ॥
- [१४३२] जा नीलाए ठिई खलु , उक्कोसा सा उ समयमब्भहिया ।
जहन्नेणं काऊए , पलियमसंखं च उक्कोसा ॥
- [१४३३] तेण परं वोच्छामि , तेऊलेसा जहा सुरगणाणं ।
भवणवइवाणमंतर जोइसवेमाणियाणं च ॥
- [१४३४] पलिओवमं जहन्नं , उक्कोसा सागरा उ दु ण्हऽहिआ ।
पलियमसंखेज्जेणं, होइ भागेण तेऊए ॥
- [१४३५] दसवाससहस्साइं, तेऊए ठिई जहन्निया होइ ।
दुन्नुदही पलिओवम असंखभागं च उक्कोसा ॥
- [१४३६] जा तेऊए ठिई खलु , उक्कोसा सा उ समयमब्भहिया ।
जहन्नेणं पम्हाए , दस उ मुहुत्त ऽहियाइं उक्कोसा ॥
- [१४३७] जा पम्हाए ठिई खलु , उक्कोसा सा उ समयमब्भहिया ।
जहन्नेणं सुक्काए , तेत्तीस मुहुत्तं अ ब्भहिया ॥
- [१४३८] किण्हा नीला काऊ , तिन्नि वि एयाओ अहम्मलेसाओ ।
एयाहिं तिहिवि जीवो , दुग्गइं उववज्जई बहुसो ॥
- [१४३९] तेऊ पम्हा सुक्का , तिन्निवि एयाओ धम्मलेसाओ ।

अज्झयणं-३४

- एयाहि तिहिवि जीवो , सुग्गइं उववज्जई ॥
- [१४४०] लेसाहिं सव्वाहिं , पढमे समयं मि परिणयाहिं तु , ।
न हु कस्सइ उववाओ , परे भवे अत्थि जीवस्स ॥
- [१४४१] लेसाहिं सव्वाहिं , चरिमे समयं मि परिणया हिं तु ।
न हु कस्सइ उववाओ , परे भवे होइ जीवस्स ॥
- [१४४२] अंतमुहुत्तंमि गए , अंतमुहुत्तंमि सेसए चेव ।
लेसाहि परिणयाहिं , जीवा गच्छं ति परलोयं ॥
- [१४४३] तम्हा एयासि लेसाणं , अनुभावे वियाणिया ।
अप्पसत्थाओ वज्जित्ता , पसत्थाओऽहिद्विए मु नी ॥ त्तिबेमि
• चउतीसइमं अज्झयणं सम्मत्तं •

• पणतीसइमं अज्झयणं - अणगारमग्गई •

- [१४४४] सुणेह मे एगग्गमणा , मग्गं बुद्धेहिं देसियं ।
जमायरंतो भिक्खू , दुक्खाणंतकरे भवे ॥
- [१४४५] गिहवासं परिचचज्ज , पवज्जामस्सिए मु नी ।
इमे संगे वियाणिज्जा , जेहिं सज्जं ति मा नवा ॥
- [१४४६] तहेव हिंसं अलियं , चोज्जं अबं भसेवणं ।

- इच्छाकामं च लोभं च , संजओ परिवज्जए ॥
 [१४४७] मनोहरं चित्तघरं , मल्लधूवेण वासियं ।
 सकवाडं पं डुरुल्लोयं, मनसा वि न पत्थए ॥
 [१४४८] इंदियाणि उ भिक्खुस्स , तारिसंमि उव्वस्सए ।
 दुक्कराइं निवारेउं , कामरागविवड्ढणे ॥
 [१४४९] सुसाणे सुन्नगारे वा , रुक्खमूले व इक्कओ ।
 पइरिक्के परकडे वा , वासं तत्थ ऽभिरोयए ॥
 [१४५०] फासुयंमि अ नाबाहे, इत्थीहिं अ नभिद्दुए ।
 तत्थ संकप्पए वासं , भिक्खू परमसंजए ॥
 [१४५१] न सयं गिहाइं कुव्विज्जा , नेव अन्नेहिं कारए ।
 गिहकम्मसमारंभे, भूयाणं दिस्सए वहो ॥
 [१४५२] तसाणं थावराणं च , सुहुमाणं बादराण य ।
 तम्हा गिहसमारं भं, संजओ परिवज्जए ॥
 [१४५३] तहेव भत्तपा नेसु, पयणे पयावणेसु य ।
 पाणभूयदयद्वाए, न पए न पयावए ॥
 [१४५४] जलधन्ननिस्सिया जीवा , पुढवीकट्टनिस्सिया ।
 हम्मंति भत्तपा नेसु, तम्हा भिक्खू न पयावए ॥

अज्झयणं-३५

- [१४५५] विसप्पे सव्वओ धारे , बहुपाण विनासणे ।
 नत्थि जोइसमे सत्थे , तम्हा जोइं न दीवए ॥
 [१४५६] हिरण्णं जायरूवं च , मनसा वि न पत्थए ।
 समलेट्टुकंचने भिक्खू , विरए कयविक्कए ॥
 [१४५७] किणंतो कइओ होइ , विक्किणंतो य वाणिओ ।
 कयविक्कयंमि वट्टं तो, भिक्खू न भवइ तारिसो ॥
 [१४५८] भिक्खियव्वं न केयव्वं , भिक्खुणा भिक्खुवित्तिणा ।
 कयविक्कओ महादोसो , भिक्खवित्ती सुहावहा ॥
 [१४५९] समुयाणं उंछमेसिज्जा , जहासुत्तमनिंदियं ।
 लाभालाभंमि संतुट्ठे , पिंडवायं चरे मु नी ॥
 [१४६०] अलोले न रसे गिद्धे , जिब्भादंते अमु च्छिए ।
 न रसद्वाए भुंजिज्जा , जवणद्वाए महामु नी ॥
 [१४६१] अच्चणं रयणं चेव , वंदनं पूयणं तहा ।
 इड्ढीसक्कारसम्माणं, मनसा वि न पत्थए ॥
 [१४६२] सुक्कं ज्झाणं झियाएज्जा , अनियाणे अकिंच ने ।
 वोसट्टकाए विहरेज्जा , जाव कालस्स पज्जओ ॥
 [१४६३] निज्जूहिऊणं आहारं , कालधम्ममे उव ढिए ।

- जहिऊण मा नुसं बों दिं, पहू दुक्खा विमुच्चई ॥
 [१४६४] निमम्मे निरहंकारो , वीयरागो अ नासवो ।
 संपत्तो केवलं नाणं , सासयं परि निव्वुए ॥ त्ति बेमि
 • पणतीसइमं अज्झयणं सम्मत्तं •

• छत्तीसइमं अज्झयणं - जीवाजीवविभत्ती •

- [१४६५] जीवाजीवविभत्तिं, सुणेह मे एगम ना इओ ।
 जं जाणिऊण भिक्खू , सम्मं जयइ संजमे ॥
 [१४६६] जीवा चेव अजीवा य , एस लोए वियाहिए ।
 अजीव देसमागासे , अलोए से वियाहिए ॥
 [१४६७] दव्वओ खेत्तओ चेव , कालओ भावओ तहा ।
 परूवणा तेसिं भवे , जीवाणमजीवाण य ॥
 [१४६८] रूविणो चेव अरूवी य , अजीवा दुविहा भवे ।
 अरूवी दसहा वुत्ता , रूविणो य चउव्विहा ॥
 [१४६९] धम्मत्थिकाए तद्देसे , तप्पएसे य आहिए ।
 अहम्मं तस्स देसे य , तप्पएसे य आहिए ॥
 [१४७०] आगासे तस्स देसे य , तप्पएसे य आहिए ।

अज्झयणं-३६

- अद्धासमए चेव , अरूवी दसहा भवे ॥
 [१४७१] धम्माधम्मं य दो चेव , लोगमित्ता वियाहिया ।
 लोगालोगे य आगासे , समए समयखेत्तिए ॥
 [१४७२] धम्माधम्मागासा, तिन्नि वि एए अ नाइया ।
 अपज्जवस्सिया चेव , सव्वद्धं तु वियाहिया ॥
 [१४७३] समए वि संतइं पप्प , एवमेव वियाहिए ।
 आएसं पप्प साइए , सपज्जवसिए वि य ॥
 [१४७४] खंधा य खंधदेसा य , तप्पएसा तहेव य ।
 परमाणुणो य बोद्धव्वा , रूविणो य चउव्विहा ॥
 [१४७५] एगत्तेण पुहुत्तेण खंधा य परमाणु य ।
 लोएगदेसे लोए य , भइयव्वा ते उ खेत्तओ ॥
 [सुहुमा सव्वलोगं मि, लोगदेसे य बायरा ।
 इत्तो कालविभागं तु , तेसिं वुच्छं चउव्विहं ॥]
 [१४७६] संतइं पप्प तेऽ नाई, अपज्जवसिया वि य ।
 ठिइं पडुच्च साइया , सपज्जवसिया वि य ॥
 [१४७७] असंखकालमुक्कोसं, इक्कं समयं जह न्नयं ।
 अजीवाण य रूवीणं , ठिई एसा वियाहिया ॥

- [१४७८] अनंतकालमुक्कोसं, इक्कं समयं जह न्नयं ।
अजीवाण य रूवीणं , अंतरेयं वियाहियं ॥
- [१४७९] वण्णओ गंधओ चेव , रसओ फासओ तहा ।
संठाणओ य विण्णेओ , परिणामो तेसिं पंचहा ॥
- [१४८०] वण्णओ परिणया जे उ , पंचहा ते पकित्तिया ।
किण्हा नीला य लोहिया , हालिद्धा सुक्किला तहा ॥
- [१४८१] गंधओ परिणया जे उ , दुविहा ते वियाहिया ।
सुब्धिगंध परिणामा , दुब्धिगंधा तहेव य ॥
- [१४८२] रसओ परिणया जे उ , पंचहा ते पकित्तिया ।
तित्त-कडुय-कसाया, अंबिला महुरा तहा ॥
- [१४८३] फासओ परिणया जे उ , अड्डहा ते पकित्तिया ।
कक्खडा मउया चेव , गुरुया लहुया तहा ॥
- [१४८४] सीया उण्हा य णिद्धा य , तहा लुक्खा य आहिया ।
इय फास-परिणया एए , पुग्गला समुदाहिया ॥
- [१४८५] संठाणओ परिणया जे उ , पंचहा ते पकित्तिया ।
परिमंडला य वट्टा य , तंसा चउरंसमायया ॥
- [१४८६] वण्णओ जे भवे किण्हे , भइए से उ गंधओ ।

अज्झयणं-३६

- रसओ फासओ चेव , भइए संठाणओ वि य ॥
- [१४८७] वण्णओ जे भवे नीले, भइए से उ गंधओ ।
रसओ फासओ चेव , भइए संठाणओ वि य ॥
- [१४८८] वण्णओ लोहिए जे उ , भइए से उ गंधओ ।
रसओ फासओ चेव , भइए संठाणओ वि य ॥
- [१४८९] वण्णओ पीयए जे उ , भइए से उ गंधओ ।
रसओ फासओ चेव , भइए संठाणओ वि य ॥
- [१४९०] वण्णओ सुक्किले जे उ , भइए से उ गंधओ ।
रसओ फासओ चेव , भइए संठाणओ वि य ॥
- [१४९१] गंधओ जे भवे सुब्धी , भइए से उ वण्णओ ।
रसओ फासओ चेव , भइए संठाणओ वि य ॥
- [१४९२] गंधओ जे भवे दुब्धी , भइए से उ वण्णओ ।
रसओ फासओ चेव , भइए संठाणओ वि य ॥
- [१४९३] रसओ तित्तए जे उ , भइए से उ वण्णओ ।
गंधओ फासओ चेव , भइए संठाणओ वि य ॥
- [१४९४] रसओ कडुए जे उ , भइए से उ वण्णओ ।
गंधओ फासओ चेव , भइए संठाणओ वि य ॥

- [१४९५] रसओ कसाए जे उ , भइए से उ वण्णओ ।
गंधओ फासओ चेव , भइए संठाणओ वि य ॥
- [१४९६] रसओ अंबिले जे उ , भइए से उ वण्णओ ।
गंधओ फासओ चेव , भइए संठाणओ वि य ॥
- [१४९७] रसओ महुरए जे उ , भइए से उ वण्णओ ।
गंधओ फासओ चेव , भइए संठाणओ वि य ॥
- [१४९८] फासओ कक्खडे जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१४९९] फासओ मउए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५००] फासओ गुरुए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५०१] फासओ लहुए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५०२] फासओ सीयए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५०३] फासओ उण्हए जे उ , भइए से उ वण्णओ ।

अज्झयणं-३६

- गंधओ रसओ चेव , भइए संठाणओ वि य ॥
- [१५०४] फासओ निद्धए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५०५] फासओ लुक्खए जे उ , भइए से उ वण्णओ ।
गंधओ रसओ चेव , भइए संठाणओ वि य ॥
- [१५०६] परिमंडल-संठाणे, भइए से उ वण्णओ ।
गंधओ रसओ चेव , भइए फासओ वि य ॥
- [१५०७] संठाणओ भवे वट्टे , भइए से उ वण्णओ ।
गंधओ रसओ चेव , भइए फासओ वि य ॥
- [१५०८] संठाणओ भवे तंसे भइए से उ वण्णओ ।
गंधओ रसओ चेव , भइए फासओ वि य ॥
- [१५०९] संठाणओ जे चउरंसे , भइए से उ वण्णओ ।
गंधओ रसओ चेव , भइए फासओ वि य ॥
- [१५१०] जे आययसंठाणे भइए से उ वण्णओ ।
गंधओ रसओ चेव , भइए फासओ वि य ॥
- [१५११] एसा अजीव-विभत्ती , समासेण वियाहिया ।
इत्तो जीवविभत्तिं , वुच्छामि अ नुपुव्वसो ॥

- [१५१२] संसारत्था य सिद्धा य , दुविहा जीवा वियाहिया ।
सिद्धा नेगविहा वुत्ता , तं मे कित्तयओ सुण ॥
- [१५१३] इत्थी पुरिस-सिद्धा य , तहेव य नपुंसगा ।
सलिंगे अ न्नलिंगे य , गिहिलिंगे तहेव य ॥
- [१५१४] उक्कोसोगाहणाए य , जहन्नमज्झिमाइ य ।
उड्ढं अहे य तिरियं च , समुद्धंमि जलं मि य ॥
- [१५१५] दस य नपुंसएसु, बीसं इत्थियासु य ।
पुरिसेसु य अट्ठसयं , समए ने गेण सिज्झइ ॥
- [१५१६] चत्तारि य गिहिलिंगे , अन्नलिंगे दसेव य ।
सलिंगेण अट्ठसयं , समए ने गेण सिज्झइ ॥
- [१५१७] उक्कोस्सोगाहणाए य , सिज्झंते जुगवं दुवे ।
चत्तारि जह न्नाए, जवमज्झेदुत्तरं सयं ॥
- [१५१८] चउरुड्ढलोए य दुवे समुद्धे , तओ जले वीसमहे तहेव य ।
सयं च अदुत्तरं तिरिय लोए , समए नेगेण सिज्झइ धुवं ।
- [१५१९] कहिं पडिहया सिद्धा ? , कहिं सिद्धा पइट्ठिया ? , ।
कहिं बोदि चइत्ताणं ? , कत्थ गंतूण सिज्झइ ? ॥
- [१५२०] अलोए पडिहया सिद्धा , लोयग्गे य पइट्ठिया ।

अज्झयणं-३६

- इ हं बोदिं चइत्ताणं , तत्थ गंतूण सिज्झइ ॥
- [१५२१] बारसहिं जोयणेहिं , सव्वट्ठस्सुवरिं भवे ।
ईसिपब्भार-नामा उ , पुढवी छत्त-संठिया ॥
- [१५२२] पणयाल सयसहस्सा, जोयणाणं तु आयया ।
तावइयं चेव वित्थिण्णा , तिगुणो साहिय परिरओ ॥
- [१५२३] अट्ठजोयण-बाहल्ला, सा मज्झं मि वियाहिया ।
परिहायंति चरिमंते , मच्छिपत्ताउ त नुयरी ॥
- [१५२४] अज्जुणसुवण्णगमई, सा पुढवी निम्मला सहावेणं ।
उत्ताणगच्छत्तयसंठिया य , भणिया जि नवरेहिं ॥
- [१५२५] संखं ककुंद संकासा, पंडुरा निम्मला सुहा ।
सीयाए जोयणे तत्तो , लोयंतो उ वियाहिओ ॥
- [१५२६] जोयणस्स उ जो तत्थ , कोसो उवरिमो भवे ।
तस्स कोसस्स छब्भाए , सिद्धाणोगाहणा भवे ॥
- [१५२७] तत्थ सिद्धा महाभागा , लोयगंगंमि पइट्ठिया ।
भवप्पपंचओ मुक्का , सिद्धिं वरगइं गया ॥
- [१५२८] उस्सेहो जस्स जो होइ , भवंमि चरिमं मि उ ।
तिभागहीना तत्तो य , सिद्धाणोगाहणा भवे ॥

- [१५२९] एगत्तेण साइया , अपज्जवसिया वि य ।
पुहत्तेण अ नाइया, अपज्जवसिया वि य ॥
- [१५३०] अरुविणो जीवघ ना, नाणदंसण-सन्निया ।
अउलं सुहं संपत्ता , उवमा जस्स नत्थि उ ॥
- [१५३१] लोगेगदेसे ते सव्वे , नाणदंसण-सन्निया ।
संसारपारनित्थिण्णा, सिद्धिं वरगई गया ॥
- [१५३२] संसारत्था उ जे जीवा , दुविहा ते वियाहिया ।
तसा य थावरा चेव , थावरा तिविहा तहिं ॥
- [१५३३] पुढवी आउ-जीवा य , तहेव य वणस्सई ।
इच्चेए थावरा तिविहा , तेसिं भेए सुणेह मे ॥
- [१५३४] दुविहा पुढवी जीवा य , सुहुमा बायरा तहा ।
पज्जत्तं अ पज्जत्ता, एवमेए दुहा पुणो ॥
- [१५३५] बायरा जे उ पज्जत्ता , दुविहा ते वियाहिया ।
सण्हा खरा य बोधच्चा , सण्हा सत्तविहा तहिं ॥
- [१५३६] किण्हा नीला य रुहिरा हालिद्धा सुक्किला तहा ।
पंडुपणग मट्टिया, खरा छत्तीसई विहा ॥
- [१५३७] पुढवी य सक्करा वालुया य , उवले सिला य लोणूसे ।

अज्झयणं-३६

- अय तंब तउय सीसग , रूप्पसुवण्णे य वइरे य ॥
- [१५३८] हरियाले हिंगुलुए , मनोसिला सासगंजण-पवाले ।
अब्भपडल ऽब्भवालुय, बायरकाए मणिविहाणा ॥
- [१५३९] गोमेज्जए य रुयगे , अंके फलिहे य लोहियक्खे य ।
मरगय मसारगल्ले, भुयमोयग इंदनीले य ॥
- [१५४०] चंदन गेरुय हंसगब्भे, पुलए सोगंधिए य बोधच्चे ।
चंदप्पह वेरुलिए, जलकंते सूरकंते य ॥
- [१५४१] एए खरपुढवीए , भेया छत्तीसमाहिया ।
एगविहमनाणत्ता, सुहुमा तत्थ वियाहिया ॥
- [१५४२] सुहुमा य सव्वलोगंमि, लोगदेसे य बायरा ।
इत्तो कालविभागं तु , वुच्छं तेसिं चउच्चिहं ॥
- [१५४३] संतइं पप्प ऽनाईया, अपज्जवसिया वि य ।
ठिइं पडुच्च सा ईया, सपज्जवसिया वि य ॥
- [१५४४] बावीस सहस्साइं, वासाणुक्कोसिया भवे ।
आउठिई पुढवीणं , अंतोमुहुत्तं जह न्निया ॥
- [१५४५] असंखकालमुक्कोसा, अंतोमुहुत्तं जह न्निया ।
कायठिई पुढवीणं , तं कायं तु अमुंचओ ॥

- [१५४६] अनंतकालमुक्कोसं, अंतोमुहुत्तं जह न्नयं ।
विजढंमि सए काए , पुढवी जीवाण अंतरं ॥
- [१५४७] एएसिं वण्णओ चेव , गंधओ रस-फासओ ।
संठाणदेसओ वावि , विहाणाइं सहस्सओ ॥
- [१५४८] दुविहा आउजीवा उ , सुहुमा बायरा तहा ।
पज्जत्तं अ पज्जत्ता, एवमेए दुहा पुणो ॥
- [१५४९] बायरा जे उ पज्जत्ता , पंचहा ते पकित्तिया ।
सुद्धोदए य उस्से य , हरतन् म्हािया हिमे ॥
- [१५५०] एगविहमनाणत्ता, सुहुमा तत्थ वियाहिया ।
सुहुमा सव्वलोगं मि, लोगदेसे य बायरा ॥
- [१५५१] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१५५२] सत्तेव सहस्साइं , वासाणुक्कोसिया भवे ।
आउठिई आऊणं , अंतोमुहुत्तं जह न्नियं ॥
- [१५५३] असंखकालमुक्कोसं, अंतोमुहुत्तं जह न्नयं ।
कायठिई आऊणं , तं कायं तु अमंचओ ॥
- [१५५४] अनंतकालमुक्कोसं, अंतोमुहुत्तं जह न्नयं ।

अज्झयणं-३६

- विजढंमि सए का ए, आउजीवाण अंतरं ॥
- [१५५५] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्सओ ॥
- [१५५६] दुविहा वणस्सई जीवा , सुहुमा बायरा तहा ।
पज्जत्तं अ पज्जत्ता, एवमेए दुहा पुणो ॥
- [१५५७] बायरा जे उ पज्जत्ता , दुविहा ते वियाहिया ।
साहारण सरीरा य , पत्तेगा य तहेव य ॥
- [१५५८] पत्तेग-सरीराउ नेगहा ते पकित्तिया ।
रुक्खा गुच्छा य गुम्मा य , लया वल्ली तणा तहा ॥
- [१५५९] वलया पव्वगा कुहणा , जलरुहा ओसही तहा ।
हरियकाया उ बोधव्वा , पत्तेगाइ वियाहिया ॥
- [१५६०] साहारण सरीराओ, नेगहा ते पकित्तिया ।
आलुए मूलए चेव , सिंगबेरे तहेव य ॥
- [१५६१] हिरिली सिरिली स स्सिरिली, जावई के य कंदली ।
पलंडु ल्हसुण कंदे य , कंदली य कुहुव्वए ॥
- [१५६२] लोहि णीहू य थीहू य, कुहगा य तहेव य ।
कण्हे य वज्जकंदे य , कंदे सूरणए तहा ॥

- [१५६३] अस्सकणी य बोधच्वा , सीहकणी तहेव य ।
मुसुंढी य हलिद्धा य , नेगहा एवमायओ ॥
- [१५६४] एगविहमनाणत्ता, सुहुमा तत्थ वियाहिया ।
सुहुमा सव्वलोगं मि, लोगदेसे य बायरा ॥
- [१५६५] संतइं पप्पणाइया , अपज्जवसिया वि य ।
ठिईं पडुच्च साइया , सपज्जवसिया वि य ॥
- [१५६६] दस चेव सहस्साइं , वासाणुक्कोसिया भवे ।
वणस्सईणं आउं तु , अंतोमुहुत्तं जह न्नयं ॥
- [१५६७] अनंतकालमुक्कोसा, अंतोमुहुत्तं जह न्निया ।
कायठिईं पणगाणं , तं कायं तु अमुंचओ ॥
- [१५६८] असंखकालमुक्कोसं, अंतोमुहुत्तं जह न्नयं ।
विजढंमि सए काए , पणगजीवाण अंतरं ॥
- [१५६९] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१५७०] इच्चेए थावरा तिविहा , समासेण वियाहिया ।
इत्तो उ तसे तिविहे , वुच्छामि अ नुपुव्वसो ॥
- [१५७१] तेऊ वाऊ य बोधच्वा , उराला य तसा तथा ।

अज्झयणं-३६

- इच्चेए तसा तिविहा , तेसिं भेए सुणेह मे ॥
- [१५७२] दुविहा तेऊ जीवा उ , सुहुमा बायरा तथा ।
पज्जत्तमपज्जत्ता, एवमेए दुहा पुणो ॥
- [१५७३] बायरा जे उ पज्जत्ता , नेगहा ते वियाहिया ।
इंगाले मुम्मुरे अग नी, अच्चिजाला तहेव य ॥
- [१५७४] उक्का विज्जू य बोधच्वा , नेगहा एवमेयओ ।
एगविहमनाणत्ता, सुहुमा ते वियाहिया ॥
- [१५७५] सुहुमा सव्वलोगं मि, लोगदेसे य बायरा ।
इत्तो कालविभागं तु , तेसिं वुच्छं चउव्विहं ॥
- [१५७६] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१५७७] त्तिन्नेव अहोरत्ता , उक्कोसेण वियाहिया ।
आउठिईं तेऊणं , अंतोमुहुत्तं जह न्नियं ॥
- [१५७८] असंखकालमुक्कोसा, अंतोमुहुत्तं जह न्निया ।
कायठिईं तेऊणं , तं कायं तु अमुंचओ ॥
- [१५७९] अनंतकालमुक्कोसं, अंतोमुहुत्तं जह न्नयं ।
विजढंमि सए काए , तेऊ जीवाण अंतरं ॥

- [१५८०] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१५८१] दुविहा वाउजीवा उ , सुहुमा बायरा तथा ।
पज्जत्तमपज्जत्ता, एवमेव दुहा पुणो ॥
- [१५८२] बायरा जे उ पज्जत्ता , पंचहा ते पकित्तिया ।
उक्कलिया मंडलिया , घनगुंजा सुद्धवाया य ॥
- [१५८३] संवट्टगवाए य , नेगहा एवमायओ ।
एगविहमनाणत्ता, सुहुमा तत्थ वियाहिया ॥
- [१५८४] सुहुमा सव्वलोगं मि, लोगदेसे य बायरा ।
इत्तो कालविभागं तु , तेसिं वुच्छं चउच्चिहं ॥
- [१५८५] संतइं पप्पणाइया , अपज्जवसिया वि य ।
ठिइं पडुच्चं साइया , सपज्जवसिया वि य ॥
- [१५८६] तिन्नेव सहस्साइं , वासाणुक्कोसिया भवे ।
आउठिई वाऊणं , अंतोमुहुत्तं जह न्निया ॥
- [१५८७] असंखखालमुक्कोसा, अंतोमुहुत्तं जहन्निया ।
कायठिई वाऊणं , तं कायं तु अमुंचओ ॥
- [१५८८] अनंतकालमुक्कोसं, अंतोमुहुत्तं जहन्नयं ।

अज्झयणं-३६

- विजढंमि सए काए , वाऊजीवाण अंतरं ॥
- [१५८९] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१५९०] उराला य तसा जे उ , चउहा ते पकित्तिया ।
बेइंदिया-तेइंदिया, चउरो पंचिंदिया चेव ॥
- [१५९१] बेइंदिया उ जे जीवा , दुविहा ते पकित्तिया ।
पज्जत्तं अ पज्जत्ता, तेसिं भे ए सुणेह मे ॥
- [१५९२] किमिणो सोमंगला चेव , अलसा माइवाहया ।
वासीमुहा य सिप्पीया , संखा संखणगा तथा ॥
- [१५९३] पल्लोयाणुल्लया चेव , तहेव य वराडगा ।
जलूगा जालगा चेव , चंदना य तहेव य ॥
- [१५९४] इइ बेइंदिया एए , नेगहा एवमायओ ।
लोगेगदेसे ते सव्वे , न सव्वत्थ वियाहिया ॥
- [१५९५] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१५९६] वासाइं बारसा चेव , उक्कोसेण वियाहिया ।
बेइंदिय आउठिई, अंतोमुहुत्तं जहन्निया ॥

- [१५९७] संखिज्जकालमुक्कोसा, अंतोमुहुत्तं जहन्निया ।
 बेइंदिय कायठिई , तं कायं तु अमुंचओ ॥
- [१५९८] अनंतकालमुक्कोसं, अंतोमुहुत्तं जहन्नयं ।
 बेइंदिय-जीवाणं, अंतरं च वियाहियं ॥
- [१५९९] एएसिं वण्णओ चेव , गंधओ रस-फासओ ।
 संठाणादेसओ वावि , विहाणाइं सहस्ससो ॥
- [१६००] तेइंदिया उ जे जीवा , दुविहा ते पकित्तिया ।
 पज्जत्तं अ पज्जत्ता, तेसिं भेए सुणेह मे ॥
- [१६०१] कुंथुपिवीलिउद्धंसा, उक्कलुद्धेहिया तथा ।
 तणहारा कद्धहारा य , मालूगा पत्तहारगा ॥
- [१६०२] कप्पासऽड्ढिमिजाया, तिंदुगा तउसमिंजगा ।
 सदावरी य गुम्मी य , बोधव्वा इंदगाइया ॥
- [१६०३] इंदगोवसमाइया, नेगहा एवमायओ ।
 लोगेगदेसे ते सव्वे , न सव्वत्थ वियाहिया ॥
- [१६०४] संतइं पप्पणाइया , अप्पज्जवसिया वि य ।
 ठिइं पडुच्च साइया , सप्पज्जवसिया वि य ॥
- [१६०५] एगूणपन्नहोरत्ता, उक्कोसेण वियाहिया ।

अज्झयणं-३६

- तेइंदिय आउठिई, अंतोमुहुत्तं जहन्निया ॥
- [१६०६] संखिज्जकालमुक्कोसा, अंतोमुहुत्तं जहन्निया ।
 तेइंदिय-कायठिई, तं कायं तु अमुंचओ ॥
- [१६०७] अनंतकालमुक्कोसं, अंतोमुहुत्तं जहन्नयं ।
 तेइंदिय-जीवाणं, अंतरं तु वियाहियां ॥
- [१६०८] एएसिं वण्णओ चेव , गंधओ रस-फासओ ।
 संठाणादेसओ वावि , विहाणाइं सहस्ससो ॥
- [१६०९] चउरिंदिया उ जे जीवा , दुविहा ते पकित्तिया ।
 पज्जत्तं अ पज्जत्ता, तेसिं भेए सुणेह मे ॥
- [१६१०] अंधिया पोत्तिया चेव , मुच्छिया मसगा तथा ।
 भमरे कीडपयंगे य , ढिंकुणे कुंकणे तथा ॥
- [१६११] कुक्कुडे सिंगिरीडी य , नंदावत्ते य विच्छुए ।
 डोले भिं गिरीडी य , विरिली अच्छिवेहए ॥
- [१६१२] अच्छिरे माहले अच्छि , रोडए विचित्ते चित्तपत्तए ।
 ओहिंजलिया जलकारी य , नियया तंब बगाइया ॥
- [१६१३] इय चउरिंदिया एए , नेगहा एवमायओ ।
 लोगस्स एगदेसंमि ते सव्वे परिकित्तिया ॥

- [१६१४] संतइ पप्प णाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१६१५] छच्चेव य मासा उ , उक्कोसेण वियाहिया ।
चउरिंदिय आउठिई , अंतोमुहुत्तं जहन्निया ॥
- [१६१६] संखिज्जकालमुक्कोसं, अंतोमुहुत्तं जह न्नियं ।
चउरिंदिय कायठिई , तं कायं तु अमुंचओ ॥
- [१६१७] अनंतकालमुक्कोसं, अंतोमुहुत्तं जहन्नयं ।
विजढमिं सए काए , अंतरं च वियाहियं ॥
- [१६१८] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१६१९] पंचिंदिया उ जे जीवा , चउच्चिहा ते वियाहिया ।
ने रइया तिरिक्खा य , मनुया देवा य आहिया ॥
- [१६२०] नेरइया सत्तविहा , पुढवीसु सत्तसु भवे ।
रयणाभा सक्कराभा, वालुयाभा य आहिया ॥
- [१६२१] पंकाभा धुमाभा , तमा तमतमा तहा ।
इइ नेरइया एए , सत्तहा परिकित्तिया ॥
- [१६२२] लोगस्स एगदेसं मि, ते सव्वे उ वियाहिया ।

अज्झयणं-३६

- इत्तो कालविभागं तु , तेसिं वुच्छं चउच्चिहं ॥
- [१६२३] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया य ॥
- [१६२४] सागरोवममेगं तु , उक्कोसेण वियाहिया ।
पढमाए जह न्नेणं, दसवाससहस्सिया ॥
- [१६२५] तिन्नेव सागराऊ , उक्कोसेण वियाहिया ।
दोच्चाए जह न्नेणं, एगं तु सागरोवमं ॥
- [१६२६] सत्तेव सागराऊ , उक्कोसेण वियाहिया ।
तइयाए जह न्नेणं, तिन्नेव सागरोवमा ॥
- [१६२७] दस सागरोवमाऊ , उक्कोसेण वियाहिया ।
चउत्थीए जह न्नेणं, सत्तेव सागरोवमा ॥
- [१६२८] सत्तरस सागराऊ , उक्कोसेण वियाहिया ।
पंचमाए जह न्नेणं, दस चेव सागरोवमा ॥
- [१६२९] बावीस सागराऊ , उक्कोसेण वियाहिया ।
छट्ठीए जह न्नेणं, सत्तरस सागरोवमा ॥
- [१६३०] तेत्तीसं सागराऊ , उक्कोसेण वियाहिया ।
सत्तमाए, जहन्नेणं, बावीसं सागरोवमा ॥

- [१६३१] जा चेव य आउठिई , नेरइयाणं वियाहिया ।
सा तेसिं कायठिई , जहन्नुक्कोसिया भवे ॥
- [१६३२] अनंतकालमुक्कोसं, अंतोमुहुत्तं जहन्नयं ।
विजढंमि सए का ए, नेरइयाणं तु अंतरं ॥
- [१६३३] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१६३४] पंचिंदियतिरिक्खाओ, दुविहा ते वियाहिया ।
सम्मच्छिम-तिरिक्खाओ, गब्भवक्कंतिया तहा ॥
- [१६३५] दुविहा वि ते भवे तिविहा , जलयरा थलयरा तहा ।
ख हयरा य बोधच्चा , तेसिं भेए सुणेह मे ॥
- [१६३६] मच्छा य कच्छभा य , गाहा य मगरा तहा ।
सुंसुमारा य बोधच्चा , पंचहा जलयरा ष्हिया ॥
- [१६३७] लोएगदेसे ते सव्वे , न सव्वत्थ वियाहिया ।
इत्तो कालविभागं तु , तेसिं वुच्छं चउच्चिहं ॥
- [१६३८] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१६३९] एगा य पुव्वकोडी उ , उक्कोसेण वियाहिया ।

अज्झयणं-३६

- आउठिई जलयराणं , अंतोमुहुत्तं जहन्निया ॥
- [१६४०] पुव्वकोडिपुहत्तं तु , उक्कोसेण वियाहिया ।
कायठिई जलयराणं , अंतोमुहुत्तं जहन्निया ॥
- [१६४१] अनंतकालमुक्कोसं, अंतोमुहुत्तं जहन्नयं ।
विजढंमि सए काए , जलयराणं अंतरं ॥
- [१६४२] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१६४३] चउप्पया य परिसप्पा , दुविहा थलयरा भवे ।
चउप्पया चउच्चिहा , ते मे कित्तयओ सुण ॥
- [१६४४] एगखुरा दुखुरा चेव , गंडीपया सणप्पया ।
हयमाइ गोणमाइ , गयमाइ सीहमाइणो ॥
- [१६४५] भुओरगपरिसप्पा य , परिसप्पा दुविहा भवे ।
गोहाई अहिमा ई य , एक्केक्का नेगहा भवे ॥
- [१६४६] लोएगदेसे ते सव्वे , न सव्वत्थ वियाहिया ।
इत्तो कालविभागं तु , तेसिं वुच्छं चउच्चिहं ॥
- [१६४७] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥

- [१६४८] पलिओवमाइं ति न्नि उ , उक्कोसेण वियाहिया ।
आउट्टिई थलयराणं , अंतोमुहुत्तं जहन्निया ॥
- [१६४९] पलिओवमाइं ति न्नि उ , उक्कोसेण वियाहिया ।
पुव्वकोडिपुहत्तेणं अंतोमुहुत्तं जहन्निया ॥
- [१६५०] कायठिई थलयराणं , अंतरं तेसिमं भवे ।
अनंतकालमुक्कोसं, अंतोमुहुत्तं जहन्नयं ॥
- [१६५१] विजढंमि सए काए , थलयराणं तु अंतरं ।
चम्मे य लोमपक्खी य , तइया समुग्गपक्खिया । ।
- [१६५२] विययपक्खी य बोधच्चा , पक्खिणो य चउच्चिहा ।
लोएगदेसे ते सच्चे , न सच्चत्थ वियाहिया ।
- [१६५३] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१६५४] पलिओवमस्स भागो , असंखेज्जइमो भवे ।
आउठिई खहयराणं , अंतोमुहुत्तं जहन्निया ॥
- [१६५५] असंखभागो पलियस्स , उक्कोसेण उ साहिया ।
पुव्वकोडी पुहत्तेणं , अंतोमुहुत्तं जहन्निया ॥
- [१६५६] कायठिई खहयराणं , अंतरं तेसिमं भवे ।

अज्झयणं-३६

- अनंतकालमुक्कोसं, अंतोमुहुत्तं जहन्नयं ॥
- [१६५७] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्सओ ॥
- [१६५८] मनुया दुविह भेया उ , ते मे कित्तयओ सुण ।
संमुच्छिमा य मणुया , गब्भवक्कंतिया तहा ॥
- [१६५९] गब्भवक्कंतिया जे उ , तिविहा ते वियाहिया ।
कम्मअकम्मभूमा य , अंतरदीवया तहा ॥
- [१६६०] पन्नरस-तीसइविहा, भेया दुअट्टवीस ई ।
संखा उ कमसो तेसिं , इइ एसा वियाहिया ॥
- [१६६१] संमुच्छिमाण एसेव , भेओ होइ वियाहिओ ।
लोगस्स एगदेसं मि, ते सच्चे वि वियाहिया ॥
- [१६६२] संतइं पप्पणाइया , अपज्जवसिया वि य ।
ठिइं पडुच्च साइया , सपज्जवसिया वि य ॥
- [१६६३] पलिओवमाइं ति न्नि उ , उक्कोसेण वियाहिया ।
आउट्टिई म नुयाणं, अंतोमुहुत्तं जहन्निया ॥
- [१६६४] पलिओवमाइं ति न्नि उ , उक्कोसेण वियाहिया ।
पुव्वकोडिपुहत्ते णं, अंतोमुहुत्तं जहन्निया ॥

- [१६६५] कायठिई मणुयाणं , अंतरं तेसिमं भवे ।
अनंतकालमुक्कोसं, अंतोमुहुत्तं जहन्नयं ॥
- [१६६६] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१६६७] देवा चउच्चिहा वुत्ता , ते मे कित्तयओ सुण ।
भोमिज्ज वाणमंतर , जोइस वेमाणिया तथा ॥
- [१६६८] दसहा उ भव नवासी, अट्टहा व नचारिणो ।
पंचविहा जोइसिया , दुविहा वेमाणिया तथा ॥
- [१६६९] असुरा नाग-सुवण्णा, विज्जू अग्गी य वियाहिया ।
दीवोदहि-दिसा वाया , थणिया भव नवासिणो ॥
- [१६७०] पिसाय-भूया जक्खा य , रक्खसा कि न्नरा किंपुरिसा ।
महोरगा य गंधच्वा , अट्टविहा वाणमंतरा ॥
- [१६७१] चंदा सूरा य नक्खत्ता, गहा तारागणा तथा ।
दि या विचारिणो चेव , पंचहा जोइसालया ॥
- [१६७२] वेमाणिया उ जे देवा , दुविहा ते पकित्तिया ।
कप्पोवगा य बोधच्वा कप्पाईया तहेव य ॥
- [१६७३] कप्पोवगा य बारसहा , सोहम्मीसाणगा तथा ।

अज्झयणं-३६

- सणंकुमार माहिंदा, बंभलोगा य लंतगा ॥
- [१६७४] महासुक्का सहस्सारा , आणया पाणया तथा ।
आरणा अच्चुया चेव , इइ कप्पोवगा सुरा ॥
- [१६७५] कप्पाईया उ जे देवा , दुविहा ते वियाहिया ।
गेविज्जानुत्तरा चेव , गेविज्जा नवविहा तहिं ॥
- [१६७६] हेट्टिमाहेट्टिमा चेव , हेट्टिमामज्झिमा तथा ।
हेट्टिमाउवरिमा चेव , मज्झिमाहेट्टिमा तथा ॥
- [१६७७] मज्झिमा मज्झिमा चेव , मज्झिमाउवरिमा तथा ।
उवरिमा हेट्टिमा चेव , उवरिमामज्झिमा तथा ॥
- [१६७८] उवरिमाउवरिमा चेव , इय गेविज्जगा सुरा ।
विजय वेजयंता य , जयंता अपराजिया ॥
- [१६७९] सव्वट्टिसिद्धगा चेव , पंचहाऽनुत्तरा सुरा ।
इइ वेमाणिया एए , नेगहा एवमायओ ॥
- [१६८०] लोगस्स एगदेसं मि, ते सव्वे परिकित्तिया ।
इत्तो कालविभागं तु , तेसिं वुच्छं चउच्चिहं ॥
- [१६८१] संतइं पप्प ऽणाइया, अपज्जवसिया वि य ।
ठिइं प डुच्च साइया , सपज्जवसिया वि य ॥

- [१६८२] साहियं सागरं इक्कं , उक्कोसेण ठिई भवे ।
भोमेज्जाणं जह न्नेणं, दसवाससहस्सिया ॥
- [१६८३] पलिओवममेगं तु , उक्कोसेण ठिई भवे ।
वंतराणं जह न्नेणं, दस वाससहस्सिया ॥
- [१६८४] पलिओवममेगमं तु , वासलक्खेण साहियं ।
पलिओवमद्वभागो, जोइसेसु जहन्निया ॥
- [१६८५] दो चेव सागराइं , उक्कोसेण वियाहिया ।
सोहम्ममि जह न्नेणं, एगं च पलिओवमं ॥
- [१६८६] सागरा साहिया दु न्नि, उक्कोसेण वियाहिया ।
ईसाणमि जह न्नेणं, साहियं पलिओवमं ॥
- [१६८७] सागराणि य सत्तेव , उक्कोसेण ठिई भवे ।
सणकुमारे जह न्नेणं, दुन्नि उ सागरोवमा ॥
- [१६८८] साहिया सागरा सत्त , उक्कोसेण ठिई भवे ।
माहिंदमि जह न्नेणं, साहिया दु न्नि सागरा ॥
- [१६८९] दस चेव सागराइं , उक्कोसेण ठिई भवे ।
बंधलोए जह न्नेणं, सत्त उ सागरोवमा ॥
- [१६९०] चउद्दस सागराइं , उक्कोसेण ठिई भवे ।

अज्झयणं-३६

- लंतगंमि जह न्नेणं, दस उ सागरोवमा ॥
- [१६९१] सत्तरस सागराइं , उक्कोसेणं ठिई भवे ।
महासुक्के जहन्नेणं, चउद्दस सागरोवमा ॥
- [१६९२] अद्वारस सागराइं , उक्कोसेण ठिई भवे ।
सहस्सारमि जहन्नेणं, सत्तरस सागरोवमा ॥
- [१६९३] सागरा अउणवीसं तु , उक्कोसेण ठिई भवे ।
आणयंमि जह न्नेणं, अद्वारस सागरोवमा ॥
- [१६९४] वीसं तु सागराइं , उक्कोसेण ठिई भवे ।
पाणयंमि ज न्नेणं, सागरा अउणवीसई ॥
- [१६९५] सागरा इक्कवीसं तु , उक्कोसेण ठिई भवे ।
आरणमि जहन्नेणं, वीसई सागरोवमा ॥
- [१६९६] बावीसं सागराइं , उक्कोसेण ठिई भवे ।
अच्चुयंमि जहन्नेणं, सागरा इक्कवीसई ॥
- [१६९७] तेवीसं सागराइं , उक्कोसेण ठिई भवे ।
पढमंमि जहन्नेणं, बावीसं सागरोवमा ॥
- [१६९८] चउवीसं सागराइं , उक्कोसेण ठिई भवे ।
बिइयंमि जहन्नेणं, तेवीसं सागरोवमा ॥

- [१६९९] पणवीसं सागराइं , उक्कोसेण ठिई भवे ।
तइयंमि जहन्नेणं, चउवीसं सागरोवमा ॥
- [१७००] छव्वीसं सागराइं , उक्कोसेण ठिई भवे ।
चउत्थंमि जहन्नेणं, सागरा पणवीसई ॥
- [१७०१] सागरा सत्तवीसं तु , उक्कोसेण ठिई भवे ।
पंचमंमि जहन्नेणं, सागरा उ छवीसई ॥
- [१७०२] सागरा अट्टवीसं तु , उक्कोसेण ठिई भवे ।
छट्ठंमि जहन्नेणं, सागरा सत्तवीसई ॥
- [१७०३] सागरा अउणतीसं तु , उक्कोसेण ठिई भवे ।
सत्तमंमि जहन्नेणं, सागरा अट्टवीसई ॥
- [१७०४] तीसं तु सागराइं , उक्कोसेणं ठिई भवे ।
अट्ठमंमि जहन्नेणं, सागरा अउणतीसई ॥
- [१७०५] सागरा इक्कतीसं तु , उक्कोसेण ठिई भवे ।
न वमंमि जहन्नेणं, तीसई सागरोवमा ॥
- [१७०६] तेत्तीसं सागराइं , उक्कोसेण ठिई भवे ।
चउसुं पि विजयाईसु , जहन्नेणेक्कतीसई ॥
- [१७०७] अजहन्नमनुक्कोसं, तेत्तीसं सागरोवमा ।

अज्झयणं-३६

- [१७०८] महाविमाणे सव्वट्ठे , ठिई एसा वियाहिया ॥
जा चेव उ आउठिई , देवाणं तु वियाहिया ।
सा तेसिं कायठिई , जहन्नमुक्कोसिया भवे ॥
- [१७०९] अनंतकालमुक्कोसं, अंतोमुहुत्तं जहन्नयं ।
विजढंमि सए काए , देवाणं हुज्जं अंतरं ॥
- [१७१०] एएसिं वण्णओ चेव , गंधओ रस-फासओ ।
संठाणादेसओ वावि , विहाणाइं सहस्ससो ॥
- [१७११] संसारत्था य सिद्धा य , इइ जीवा वियाहिया ।
रूविणो चेव ऽरूवी य , अजीवा दुविहा वि य ॥
- [१७१२] इय जीवमजीवे य , सोच्चा सद्दहिऊण य ।
सव्वनयाणं अनु मए, रमेज्ज संजमे मु नी ॥
- [१७१३] तओ बहूणि वासाणि , सामण्णमनुपालिया ।
इमेणं कम्मजोगेणं , अप्पाणं संलिहे मु नी ॥
- [१७१४] बारसेव उ वासाइं , संलेहुक्कोसिया भवे ।
संवच्छरं मज्झिमिया , छम्मासा य जहन्निया ॥
- [१७१५] पढमे वासचउक्कं मि, विगइं नि ज्जूहणं करे ।
बिइए वासचउक्कं मि, विचित्तं तु तवं चरे ॥

- [१७१६] एगंतरमायामं, कट्टु संवच्छरे दुवे ।
तओ संच्छरद्धं तु , नाइविगिट्टं तवं चरे ॥
- [१७१७] तओ संवच्छरद्धं तु , विगिट्टं तु तवं चरे ।
परिमियं चेव आयामं , तंमि संवच्छरे करे ॥
- [१७१८] कोडीसहियमायामं, कट्टु संवच्छरे मु नी ।
मासद्धमासिएणं तु , आहारेणं तवं चरे ॥
- [१७१९] कंदप्पमाभिओगं, किच्चिसियं मोहमासुरत्तं च ।
एयाओ दुग्गईओ , मरणंमि विराहिया होंति ॥
- [१७२०] मिच्छादंसणरत्ता, सनियाणा हु हिंस गा ।
इय जे मरंति जीवा , तेसिं पुण दुल्लहा बोही ॥
- [१७२१] सम्मद्धंसणरत्ता, अनियाणा सुक्कलेसमोगाढा ।
इय जे मरंति जीवा , तेसिं सुलहा भवे बोही ॥
- [१७२२] मिच्छादंसणरत्ता, सनियाणा कण्हलेसमोगाढा ।
इय जे मरंति जीवा , तेसिं पुण दुल्लहा बोही ॥
- [१७२३] जिनवयणे अ नुरत्ता, जिनवयणं जे करंति भावेणं ।
अमला असंकिलिद्धा , ते होंति-परित्त-संसारी ॥
- [१७२४] बालमरणाणि बहुसो , अकाममरणाणि चेव य बहु याणि ।

अज्झयणं-३६

- मरिहंति ते वराया , जिनवयणं जे न जाणंति ॥
- [१७२५] बहुआगम-विण्णाणा, समाहिउप्पायगा य गुणगाही ।
एएणं कारणेणं , अरिहा आलोयणं सोउं ॥
- [१७२६] कंदप्पकुक्कुयाइं तहा सीलसहाव हासविगहाहिं ।
विम्हावेतो य परं , कंदप्पं भाव नं कुणइ ॥
- [१७२७] मंता जोगं काउं , भूइकम्मं च जे पउंजंति ।
सायरस इइदिहेउं, अभिओगं भाव नं कुणइ ॥
- [१७२८] नाणस्स केवलीणं , धम्मयारियस्स संघसाहूणं ।
माई अवण्णवाई , किच्चिसियं भाव नं कुणइ ॥
- [१७२९] अनुबद्धरोसपसरो, तह य निमित्तंमि होइ पडिसेवी ।
एएहिं कारणेहिं , आसुरियं भाव नं कुणइ ॥
- [१७३०] सत्थगहणं विसभक्खणं च , जलणं च जलपवेसो य ।
अनायारभंडसेवी, जम्मणमरणाणि बंधंति ॥
- [१७३१] इइ पाउकरे बुद्धे , नायए परि निव्वुए ।
छत्तीसं उत्तरज्झाए , भवसिद्धिय संमए ॥ त्ति बेमि

• छत्तीसइमं अज्झयणं सम्मत्तं •

मुनि दीपरत्नसागरेण संशोधिताः सम्पादिताश्च “उत्तरज्झयणं मूलसुत्तं” सम्मत्तं

४३

उत्तरज्झयणं-चउत्थं मूलसुत्तं सम्मत्तं